

O LE EKALESIA A IESU KERISO O LE AU PAIA O ASO E GATA AI • IULAI 2011

O Le Liahona



**Paionia Latina Amerika,
i. 16**

Filifilia o se Ala i le Olaga, i. 42

**O Le Mau Na Suia Ai Mea Uma,
i. 50**

O Le Povi ma le Malumalu, i. 68



Faamoemoe o Siona, saunia e Miroslava Menssen-Bezakova

E toatele le Au Paia o Aso e Gata Ai na faigamalaga i sisifo i le Vanu o Sate Leki i le ogatotonu o le seneturi lona 19. I tausaga e tele na muamua atu, i le aso 1 o Aokuso, 1831, sa saunoa atu ai le Perofeta o Iosefa Samita i le Au Paia i Misuri, ma tuuina atu ia i latou le faamoemoe mo lo latou lumanai i Misuri ma mo la latou savaliga mulimuli i sisifo.

I se faaaliga na tuuina atu i le Perofeta, na fetalai mai ai le Alii: “Aua e oo mai faamanuiaga pe a mavae atu puapuaga e tele.

O lea o le a oo mai le mamalu e matua tele; e le'i oo i le ituaso a ua lata mai lava.

“Ia manatua lenei mea, e pei ona ou muai tau atu ia te outou, ina ia outou teu ai i le loto, ma talia mea o le a mulimuli mai” (MFF 58:4–5).

Ua tatou vaai iinei i nisi o i latou o e na tumau i le faamaoni, ma ua fai ma sui o i latou uma na agai i luma i le faatuatua e fausia Siona.

SAVALI

- 4 Savali a le Au Peresitene Sili: Uso, Ua Ou Tautino**
Saunia e Peresitene Dieter F. Uchtdorf
- 7 Savali a Faiaoga Asiasi: O Mai i le Malumalu ma Maua o Outou Faamanuiaga**

TALA FAAALIA

- 16 Mi Vida, Mi Historia**
O tala o le faatuatua ma le liliu mai o tagata e toaiva o le Au Paia o Aso e Gata Ai i Latina Amerika.
- 22 Faatuatua e Tali Atu i le Valaauga**
Na Saunia e Elder Jeffery R. Holland
O le talitonuga lea na taitaiina atu ai le au paionia e nofoia ma faato'a nofoaga naumati e mafai ona musuia ai i tatou e tuu atu le mea sili tatou te mafaia i le galuega a le Atua.
- 29 "Faapei ona Ou Alofa Atu ia te Outou"**
Saunia e Barbara Thompson
E lua uiga taua e iloa ai o i tatou o soo o Iesu Keriso.
- 32 Motu o le Faatuatua: O Se Tala i le Maelega**
Saunia e Adam C. Olson
O le motu opeopea o le au Coila e faatusa faaletino i ai mea o loo latou taumafai e fausia faaleagaga mo lo latou aiga.
- 36 Sa Le Popole i le Vai**
Saunia e Adam C. Olson
Na fefe Iosefa e alu i lalo o le vai mo lona papatisoga. Ae na fesoasoani lona aiga ia te ia e foia lona fefe.

MATAGALUEGA

- 8 O Mea Faatauva'a ma Faavalea**
- 10 Tatou te Talanoa ia Keriso: Ia Matuai Feinu i le Vai Ola**
Saunia e Matthew Heaps
- 12 O Le Mea Tatou Te Talitonu I Ai: O Le Galue o se Mataupu Faavae e Faavavau**
- 14 Auaunaga i le Ekalesia: Valaauina e le Atua**
Saunia e Ramona Dutton
- 15 O Tatou Aiga, O Tatou Auaiga: O Le Misiona o le Olaga a se Tina Alofa**
Saunia e Peiholani Kauvaka
- 38 O Leo o le Au Paia o Aso e Gata Ai**
- 75 Tala Fou o le Ekalesia**
- 79 Manatu mo Afiafi Faaleaiga**
- 80 Seia Tatou Toe Feiloai: O Le Tausaga Lenei o se Vao—Vele Ese**
Saunia e Mont Poulsen

I LE FAAVAA

Luma: ata na pueina e Mark J. Davis.
Tua: ata na pueina e Kent Miles.

AUTALAVOU MATUTUA



42 Amata Minoi Loa

Saunia e Elder Von G. Keetch
*O se tala e uiga i le au tineimu
 i luga o se mauga e mafai ona
 tatou aoao ai e uiga i le maua-
 ina o musumusuga i o tatou
 olaga.*



Vaai pe mafai
 ona e mauaina
 le Liahona o loo
 natia i le lomiga
 lenei. Faaiteite:
 taavaletoso, o!

58

AUTALAVOU

46 Tuusao i le Mataupu

48 Pepa Lautele o I Ai se Savali: Faitatala

49 O La Tatou Avanoa

50 O Le Auala Na Ou Iloa Ai: O Le Tali i le Fuaiupu e Valu

Saunia e Angelica Nelson

52 O Lo Tatou Talatuu Faamamaluina o Paionia

Saunia e Peresitene
 Thomas S. Monson
*E mafai ona tatou aoaoina le
 tele o mea mai o tatou tuua
 paionia anamua.*

54 Fesoasoani le Tasi i le Isi i Initia

Saunia e Elder Charles ma Sister
 Carol Kewish
*Fesoasoani le autalavou ma
 talavou matutua e tuumama
 mafatiaga o i latou na aafia
 i lologa i Initia i saute.*

56 Mai le Misiona: O Se Mea e Le Tauga i se Tasi Tagata o se Oa Lea i se Isi Tagata

Saunia e Andrej Bozhenov

58 Tau Lava o le Aau Pea

*Na faapefea ona taulimaina
 e se tasi o tagata aau talavou
 lauiloa i Niu Sila le maliu
 faafuasei o lona tamā?*



TAMAITI



61 Molimau Faapitoa: Aisea e Tauga ai le Auauna Atu i Isi?

Saunia e Elder Dallin H. Oaks

62 Taitaiina Oe i le Aiga

Saunia e Peresitene
 Henry B. Eyring
*Ua tuuina i le ala e lo tatou
 Tama Faalelagi alofa ni tagata
 laveai e fesoasoani ia i tatou e
 toe foi atu ia te Ia.*

64 Aumaia o le Peraimeri i le Fale: O Le Malumalu o Le Maota o le Atua

Saunia e JoAnn Child
 ma Cristina Franco

66 O Le Aso Paionia i Tahiti

Saunia e Maria T. Moody
*Tagai i le auala e faamanatu
 ai e tamaiti i Tahiti le Aso o
 Paionia.*

67 O La Tatou Itulau

68 O Le Valaauga

Saunia e Corine Pugh
*O Isaako, Taurus, ma le
 Malumalu o Navu.*

70 Mo Tamaiti Laiti

74 Kata o Upusii Faamama- faina o le Konafesi

O Le Lomiga Faamaonia Faa-Samoa a le Ekalesia a lesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:
Boyd K. Packer, L. Tom Perry, Russell M. Nelson,
Dallin H. Oaks, M. Russell Ballard, Richard G. Scott,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen

Faatonu: Paul B. Pieper

Fautua: Stanley G. Ellis, Christoffel Golden Jr.,
Yoshihiko Kikuchi

Pule Faatonusili: David L. Frischknecht

Faatonusili e Fuafuaina ma Faatonutonu:
Vincent A. Vaughn

Faatonu o Karafi: Allan R. Loyborg

Pule Faatonutonu: R. Val Johnson

Pule Faatonutonu Lagolago: Jenifer L. Greenwood,
Adam C. Olson

Faatonutonu Fesoasoani: Ryan Carr

Faatonu Fesoasoani: Susan Barrett

Aufaigaluega Faatonutonu: Brittany Beatties, David
A. Edwards, Matthew D. Flitton, LaRene Porter Gaunt,
Carrie Kasten, Larry Hiller, Jennifer Maddy, Melissa Merrill,
Michael R. Morris, Sally J. Odekirk, Joshua J. Perkey, Chad E.
Phares, Jan Pinborough, Richard M. Romney, Janet Thomas,
Paul VanDenBerghe, Melissa Zenteno

Pule Faatonusili o Faatufugaga: J. Scott Knudsen

Faatonusili Tusiata: Scott Van Kampen

Pule i le Gaosiga: Jane Ann Peters

Au Mamanu Sinia: C. Kimball Bott, Thomas S. Child,
Colleen Hincley, Eric P. Johnsen, Scott M. Mooy

Aufaigaluega e Mamanuina ma Gaosia: Collette
Nebeker Aune, Howard G. Brown, Julie Burdett, Reginald J.
Christensen, Kim Fenstermaker, Kathleen Howard, Denise
Kirby, Ginny J. Nilson, Ty Pilcher

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo O le okaina o mekasini, ia faaafesootai le Faletusi
Tutotonu i Pesega. Telefoni 64127. Totogi o le Mekasini:
\$0.55 (Samoa) i le kopi. Totogi mo le Tausaga Atoa \$6.60
(Samoa).

Auina atu tusitusiga ma faafesili i le Liahona,
Rm. 2420, 50 E. North Temple, Salt Lake City, UT
84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa"
po o se "faatunuala") e lomia i le faa-Alepania, Aminia
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Iglisi, Esitonia,
Fiti, Finelani, Farani, Siamani, Eleni, Hanikeri, Initu, Iselani,
Initonesia, Italia, Iapani, Kiripati, Korea, Lativia, Litunia,
Malakasa, Masela, Monokolia, Nouel, Polani, Potukale,
Romania, Rusia, Samoa, Silovenia, Sipaniolo, Suetena,
Tagaloka, Tahiti, Tai, Toga, Iukureini, ma Urutu, ma
Viatename. (E eese lava gagana.)

© 2011 Puletaofia e le Intellectual Reserve, Inc. Ua taofia
aia tatau uma. Lomia i le lunaite Setete o Amerika.

E mafai ona kopi tala ma ata o le Liahona mo le toe
faaogaina i lotu po o le aiga ae ia le faia ai ni pisinisi. E le
tatau ona kopi ni tala po o ni ata pe afai o faasa mai i le
laina o loo ta'ua ai le e ona lea faatufugaga. Auina atu fesili
e uiga i le puletaofia i le Intellectual Property Office, 50 East
North Temple Street, Salt Lake City, UT 84150, USA; i-meli:
cor-intellectualproperty@ldschurch.org.

For Readers in the United States and Canada:

July 2011 Vol. 35 No. 7. O LE LIAHONA (USPS 311) Samoan
(ISSN 1045-0947) is published monthly by The Church of
Jesus Christ of Latter-day Saints, 50 East North Temple,
Salt Lake City, UT 84150. USA subscription price is \$10.00
per year; Canada, \$12.00 plus applicable taxes. Periodicals
Postage Paid at Salt Lake City, Utah. Sixty days' notice
required for change of address. Include address label from
a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Poste
Information: Publication Agreement #40017431)

POSTMASTER: Send address changes to Salt Lake
Distribution Center, Church Magazines, PO Box 26368,
Salt Lake City, UT 84126-0368.

Faaopoopoga o loo maua i le Initoneti Liahona.Lds.org

MO TAGATA MATUTUA




E nonofo le aiga o Coila i se motu ope-
opea i le Vaituloto o Titicaca. O le motu
e fai i vao ofe; o lona tausiga o se lesona
lea o le maelega (tagai i le itulau e 32).
Tagai i nisi o ata i le www.liahona.Lds.org.

MO LE AUTALAVOU



O Monika Saili e sefulu lua tausaga o
se tasi lea o tagata aau talavou iloga i
Niu Sila. Ina ua maliu faafuasei lona tamā,
sa ia aoaoina o "mea faigata e mafai
ona faamalolosia ai i tatou. Pau lava le
mea e fai na o le faauau pea ona aau"
(tagai i le itulau e 58). Tagai i nisi o ata i
le www.liahona.Lds.org.

MO TAMAITI



E mafai ona e maua gaoioiga mo
tamaiti i le www.liahona.Lds.org.

I LAU GAGANA

O loo maua le Liahona ma isi tusi a le Ekalesia i le tele o gagana i le
www.languages.Lds.org.

AUTU I LENEI LOMIGA

E ta'u mai e numera le itulau muamua o le tusiga.

Agaga Paia, 42, 47

Aiga, 15, 32, 39, 58, 67, 70

Ala o Faasalalauga, 47

Alofa, 29

Alofa mutimutivale, 41

Anapogi, 9

Aualofa, 7

Auauna atu, 29, 54, 61, 62, 68

Faatuatua, 22, 32

Faitatala, 48

Galue, 12, 32

Galuega faafaifeautalai, 56

Iesu Keriso, 10, 29

Liua, 16, 40

Malumalu, 8, 64, 67, 70

Molimau, 16, 38, 50

Musumusuga, 42

Paionia, 22, 40, 52, 66

Papatisoga, 36, 46

Suesue i tusitusiga paia, 50

Talafaasolopito o le Ekalesia, 9

Tautinoga, 4, 22, 50, 58

Toetu, 39

Tulaga faatinā, 15

Tusi a Mamona, 38, 49, 56

Usiusitai, 22, 58, 80

Valaauga, 14, 68

**Saunia e Peresitene
Dieter F. Uchtdorf**

Fesoasoani Lua i le
Au Peresitene Sili



U^{USO,}a Ou Tautino

Sa tutu se au uso tama talavou e toalua i luga o se tamai pupū e iloa atu vaimanino o se vaituloto lanumoana. O se nofoaga lauiloa lea e fepuna ai, ma sa masani lava ona talanoa le au uso e uiga i le fepuna ai—o se mea na la vaai o faia e nisi.

E ui lava sa la mananao uma e fepuna, a e sa le'i manao se isi o i laua e puna muamua. E le maualuga tele le pupū, ae i tama talavou ia e toalua, na foliga mai na faateleina le maualalo i taimi uma sa la punonou ai agai i luma—ma na vave ona mou ese atu le lotototoa.

Mulimuli ane, na tuu e le tasi o le au uso lona vae i le tausiusiuga o le pupū ma agai atu i luma ma le mautino. O le taimi lena na musumusu atu ai lona uso, “Pei e lelei ona ta faatali seia oo i le taumafanafana a sau.”

Peitai, o le taimi foi lea ua toso atu ai e le malosi o le uso muamua o ia i luma. “Uso,” o lana tali mai, “ua ou tautino!”

Sa palasi o ia i totonu o le vai ma ea vave a'e ma se alaga o le faamanuiaina. Sa vave ona sosoo atu ai ma le uso lona lua. Mulimuli ane, na la talie e uiga i upu mulimuli a le alii lea na muamua ao le'i puna i le vai: “Uso, ua ou tautino.”

O le tautino e tai pei lava o le puna i totonu o le vai. A lē o lou tautino po o lou lē tautino foi. A lē o lou minoi i luma po o lou tutu sasao ai lava. E leai se faalotolotolua. Tatou te feagai uma lava ma taimi o filifiliga e sui atoa ai taimi o totoe o o tatou olaga. I le aveai ai ma ni tagata o le Ekalesia, e tataua ona tatou fesili ifo ia i tatou lava, “Pe ou te puna i totonu pe na o le tutu i le taufaasiusiuga? Pe ou te laa i luma pe na o le sue o le malulu o le vai i ou tamata-mai vae?”

E faia nisi o agasala ona tatou te faia mea sese; o nisi o agasala tatou te faia ona o lo tatou le faia o se mea. O le faatagā tautino i le talalelei, e mafai ona oo atu ai i

le le fiafia, faanoanoaga, ma le tausalaina. E le tataua ona faatatau lenei tulaga ia i tatou ona o i tatou o ni tagata o le feagaiga. Tatou te osi feagaiga ma le Alii pe a papatisoina i tatou ma pe a tatou ulu atu i le maota o le Alii. E osi feagaiga tama tane ma le Alii pe a faaeina atu ia i latou le perisitua. E leai se mea e sili atu ona taua nai lo le tausia o se tautinoga na tatou faia ma le Alii. Ia tatou manatua le tali a Rasela ma Lea ia Iakopo i le Feagaiga Tuai. O se tali faigofie ma tuusao ma na faaalai ai la la'ua tautinoga: “O mea uma ua fetalai mai e le Atua ia te oe, ina faia ia o lea” (Kenese 31:16).

O i latou o e faatagā tautino atu e ono faamoemoe e maua na o ni nai faamanuiaga o le molimau, olioli, ma le filemu. E na ona faataga tatala mai foi i ai pupuni o le lagi ia i latou. Pe le o se tulaga faavalevarea ea le mafaufau faapea, “O le a ou tautino atu le 50 pasene i le taimi nei, ae 100 pasene pe a afio mai Keriso i le Afio Mai Faalua?”

O le tautino i a tatou feagaiga ma le Alii o se fua lea o lo tatou liua. O le tautinoga i lo tatou Faaola ma Lana Ekalesia e galueaiina ai o tatou tagata ma faamalolosia ai o tatou agaga ina ia oo ai i le taimi tatou te feiloai ai ma Keriso, o le a Ia opoina i tatou ma faapea mai, “Ua lelei ia, le auauna lelei e ma le faamaoni” (Mataio 25:21).

E i ai se eseese i le va o le faamoemoega ma le faatinoga. O i latou o e na o le faamoemoe lava e tautino atu e ono maua ni 'alofaga i soo se itu. O i latou o e tautino faamaoni atu o le a fetalai lelei lava ma o latou luitau ma faapea atu ia i latou lava,” Ioe, o se mafuaaga lelei lena e faatuai ai, peitai ua uma ona ou osi feagaiga, ma o lea o le a ou faia ai le mea na ou tautino e fai.” Latou te sutesue i tusitusiga paia ma saili ma le faamaoni le taitaiga a lo latou Tama oi le Lagi. Latou te talia ma faalautele o latou vala-auga i le Ekalesia. Latou te auai i a latou fonotaga. E fai a latou asiasiga faaleaiga po o faiaoga asiati.



Fai mai se alagaupu faa-Siamani, “O folafolaga e pei lava o le masina ua atoa. Afai e le tausia i le taimi lava lea, o le a faaititia i lea aso ma lea aso.” I le avea ai ma tagata O Le Ekalesia a Iesu Keriso o le Au Paia o Aso e Gata Ai, ua tatou tautino atu e savavali i le ala o le avea ma soo. Ua tatou tautino atu e mulimuli i le faataitaiga a lo tatou Faaola. Mafaufau i le faamanuiaina ma le liua o le lalolagi mo le lelei pe a ola tagata uma o le Ekalesia a le Alii i o latou gafatia moni—liuaina i le taele o o latou loto ma tautino atu i le fausia o le malo o le Atua.

O nisi o tulaga, tatou te tutu uma ai i se tulaga e faia ai filifiliga lea e iloa atu ai le vai. O la’u tatalo ia tatou maua le faatuatua, agai i luma, faafetauia ma le lototele o tatou atugaluga ma masalosologa, ma faapea ifo ia i tatou lava, “Ua ou tautino!” ■

AOAO ATU MAI LENEI SAVALI

“O se tasi auala e fesoasoani ai i tagata o loo aoaoina ia malamalama i mataupu faavae o le talalelei o le tuuina atu lea ia i latou e tusi ni ata. O le tusiata e faatagaina ai i latou e sailiili ma faailoa mai o latou malamalamaaga ma lagona i tala o le talalelei ma mataupu” (*O Le Aoao Atu, E Lei Se Isi Valaauga E Sili Ai* [1999], 175). Mafaufau e faitau le tusiga, talatalanoa i mataupu faavae o le tautino i le talalelei, ona fesili atu lea ia i latou o e fia auai e tusi se ata o se gaoioiga o le talalelei lea e faaalai ai le tautino. E ono manaomia e tamaiti laiti ifo ni fautuaga e uiga i mea e tusi.

AUTALAVOU

O Mea Uma e Mafai ona Ou Tuuina Atu

Saunia e Alyssa Hansen

Sa ou popole pe o le a faapefea ona ou totogiina mea na ou manao e fai i le taimi o le taumafanafana: vasega, mafutaga faaleaoaoga, tolauapiga i le taumafanafana, ma isi lava mea. Sa ou faapea o le a ou tagi. Ona ou manatuaina lea o mea uma lava na aoaoina ai au e uiga i le faalagolago ma le faatuatua i le Alii. Sa ou filifili e tuu atu lea tulaga i aao o le Alii ma faalagolago afai o

Lona finagalo lea, o le a la saunia se auala.

I se taimi e lei mamao mulimuli ane, na maua ai e lo'u tina se siaki e le'i talaina mai se galuega sa ou faia i le amataga o lona tausaga, ma o le aso lava na sosoo ai sa ou maua ai se faailoga tinoitupe laitiiti mai le meli i le tu lua i se tauvaga. O se molimau maoae lea ia te au o loo soifua le Atua, ma e alofa ma popole o la ia te au.

Sa faatumulia au i le agaga faafetai ma le alofa mo lo'u Tama Faalelagi ma le Faaola. Sa matuai ou lagonaina le fiafia! Sa ou naunau

lava e faaali atu lo'u agaga faafetai, e vivii atu i le Atua i le mea sili ou te mafaia, ma faasoa atu lona lagona. Sa faia e nisi lenei tulaga i le fatuina o se pese, tusia o se solo, po o le valiina o se ata, ae na ou lagona lou le agavaa e faia soo se mea o na mea. Sa ou iloaina e pau lava le mea e mafai ona ou tuuina atu e avea ma se viiga talafeagai o lou ola lea—ina ia fai “ma faaaoao i e ua faatuatua” (1 Timoteo 4:12), ia tuu atu lou ola ia Keriso. Pau lava lona o le mea o loo la finagalo ai, ma e pau foi lona o le mea e mafai ona ou tuuina atu.


TAMAITI

Ua E Tautino Atu?

Atatou folafola atu e mulimuli ia lesu Keriso, tatou te faia le mea sa'o e aunoa ma ni 'alofaga.

O loo faatasi atu nei tamaiti e toafa ma la latou vasega o le Pe-raimeri e faamama se malae taalo i le nuu. O fea o tamaiti e le o foliga ua tautino atu? Aisea? O faapefea ona faaalua e isi lo latou tautino po o le naunau?

Lio ni mea se lima o le a fesoasoani i lenei tamaitiiti ia auai faatasi ma isi i le gaoi-oiga fesoasoani. E mafai ona e mauaina se lako, pulumu vali fale, apefai, pakete, ma le suō?





O Mai i le Malumalu ma Maua o Outou Faamanuiaga

Suesue i mea nei, ma pe a talafeagai ai, ia talanoaina faatasi ai ma uso e te asia. Faaoga fesili e fesoasoani ai ia te oe e faamalositia ai ou uso ma aveia ai le Aualofa ma se vaega ola o lou lava olaga.

Faatuatua • Aiga • Toomaga

Uso e, ua matua faamanuiaina i tatou. O le Faaola e tu i le ulu o lenei Ekalesia. O loo taitaiina i tatou e perofeta soifua. Ua tatou maua tusitusiga paia. Ma e tele malumalu paia i le lalolagi atoa e mafai ona tatou maua ai sauniga e manaomia e fesoasoani i lo tatou toe foi atu i lo tatou Tama Faalelagi.

Tatou te o muamua i le malumalu mo i tatou lava. “O le faamoemoea autu o le malumalu,” na faamalalamala mai e Elder Robert D. Hales o le Korama a Aposetolo e Toasefululua, “o le tuuina mai lea o sauniga e manaomia mo lo tatou faa-eaga i le malo selesitila. O sauniga o le malumalu e taitaiina atu ai i tatou i lo tatou Faaola ma tatou maua ai faamanuiaga lea e oo mai ia i tatou e ala i le Togiola a Iesu Keriso. O malumalu o iunivesite aupito sili ia o le aoaoga ua iloa e tagata, ua tuuina mai ai ia i tatou le malamalama ma le poto e uiga i le Foafoaga o le lalolagi. O aoaoga o faaeega paia e aumaia ai le taitaiga i le ala e tatau ona taitaiina ai o tatou olaga iinei i le olaga i le tino. . . . O le sauniga e i ai se faagasologa o aoaoga i le ala e tatau ona tatou ola ai ma feagaiga tatou te osia ina ia ola amiotonu ai e ala i le mulimuli i lo tatou Faaola.”¹

Peitai, e le gata ai iina la tatou auauunaga i le malumalu. Na aoao mai Peresitene Boyd K. Packer, Peresitene o le Korama a Aposetolo e Toasefululua: “O iina tou te faamanatu ai feagaiga ua outou osia, a o aveia outou ma sui o se tasi ua maluu. O le a outou faamautuina ai i o outou mafauafau ia faamanuiaga silisili faaleagaga e faatatau i le maota o le Alii. . . . O le totonugalemu o feagaiga ma sauniga o loo i ai faamanuiaga e mafai ona outou maua i totonu o le malumalu paia.”²

O mai i le malumalu ma toe o mai. O le osia ma le tausia o feagaiga o le malumalu o le a taitaiina atu ai i tatou i le faamanuiaga pito i sili o faamanuiaga uma lava o le—ola e faavavau.

Barbara Thompson, fesoasoani lua i le au peresitene aoao o le Aualofa.

Mai Tusitusiga Paia

Isaia 2:3; 1 Korinito 11:11; Faaaliga 7:13–15; Mataupu Faavae ma Feagaiga 109

O Le a se Mea e Mafai ona Ou Faia?

1. O le a se aafiaga o le a ou faasoa atu e faamalositia ai i latou ou te asia i lo latou naunautiga ina ia “o mai i le malumalu”?

2. E mafai faapefea ona ou mauaina patino faamanuiaga o le malumalu?

Mai lo Tatou Talafaasolopito

Sa masani lava ona saunoa atu le Perofeta o Iosefa i tamaitai o le Aualofa i a latou sauniga. A o fausiaina le Malumalu o Navu, na aoaoina e le Perofeta ia tamaitai i aoaoga faavae, ma saunia i latou ina ia maua le malamalama atili e uiga i sauniga o le malumalu. I le 1842 na ia faapea atu ai ia Mercy Fielding Thompson o le faaeega paia “o le a aumaia ai oe mai le pouliuli i le malamalama matagofie.”³

E tusa ma le 6,000 tagata o le Au Paia o Aso e Gata Ai na mauaina ia sauniga o le malumalu a o lei amataina le malaga tele mai Navu. Na saunoa Peresitene Polika Iaga (1801–77), “O lena le naunautiga e pei ona molimauina e le Au Paia ina ia maua sauniga [o le malumalu], ma o lo matou naunautiga foi lena ia i matou, ina ia faataunuuina ia sauniga mo i latou, o lea sa ou tuuina atu ai au atoa i le galuega a le Alii i le Malumalu i le po ma le ao, e le sili atu i le fa itula e moe ai, i lona averesi, i le aso, ma alu i le fale tai tasi i le vaiaso.”⁴ O le malosi ma le mana o feagaiga o le malumalu na faaaaupegaina ai le Au Paia a o latou tuua lo latou nuu ma le malumalu mo se malaga e le mailoa.

FAAMATALAGA

1. Robert D. Hales, “O Faamanuiaga o le Malumalu,” *Liahona*, Oke. 2009, 14.
2. Boyd K. Packer, *I Le Malumalu Paia* (1980), 35, 36.
3. *Aoaoga a Peresitene o le Ekalesia: Iosefa Samita* (2007), 442.
4. *Aoaoga a Peresitene o le Ekalesia: Polika Iaga* (1997), 10, 11.

Mo nisi faamatalaga, alu i le www.reliefsociety.lds.org.



O Mea Faatauva & Faavalea

“O mea faatauva ma mea faavalea ua faataunuina ai mea tetele” (Alema 37:6).

MOLISULU O LE MALUMALU

Malumalu o Vancouver British Columbia


O le aso 2 o Me 2010, na avea ai le Malumalu o Vancouver British Columbia ma malumalu lona 131 ua faapaiaina i lenei tisipenisione. O le malumalu e 28,165 futu faatafafa (2,617 m²) lona tele, ma e aofia ai se vai papatisoga, se potu selesitila, potu e lua mo faaeega paia, ma potu e lua mo faamauga. O totonu, o loo i ai mamanu lanumeamata, lanumoana vaivai, ma le lanuauro, e faamamaluina ai le matagofie o vaomatua, sami, ma le vanimonimo o le Pasefika Matusisifo. O le laau o le dogwood a le Pasefika, o se fugalaau a le atunuu o British Columbia, o loo faaalia i atavali ma ie i totonu o le fale atoa.

O le po a o lumanai le faapaiaia, e silia ma le 1,200 le autalavou na auai i faafiafiaga faaleaganuu. Na



faaautuina “O Se Faailoga i le Lalolagi,” na faaalia ai i le faafiafiaga le talafaasolopito ma tagata o Kanata. I le amataga o le faafiafiaga, na sui ai e Peresitene Monson le viiga amata i le vii o le fu’a o Kanata, ma sa ia faapea atu, “Ua matou o mai tatou te fafia faatasi ma outou ona o Kanata.”

I le tatalo o le faapaiaia, na saunoa ai Peresitene Monson: “Ia mama lima ma loto o i latou uma o e ulufale mai i ai. Ia faateleina lo latou faatuatua a o latou galulue iinei mo i latou o e maliliu. Ia latou o ese atu ma se lagona o le filemu, ma viia ai Lou suafa paia.”¹



Mai luga: O se vaaiga i le vai papatisoga, faamatalaga o mamamu, ma le potu selesitila o le Malumalu o Vancouver British Columbia.

FAAMATALAGA

1. Thomas S. Monson, “Dedicatory Prayer,” ldschurchtemples.com/vancouver/prayer.



Api Talaaga o le Anapogi

Sa masani ona faigata le anapogi ia te au—seia oo ina ou tausia se api talaaga o le anapogi. I le taimi nei, a o le'i amataina a'u anapogi taitasi, ou te tusia i lalo se faamoemoega faapitoa mo la'u anapogi. Mo se faataitaiga, ou te ono tusia, “Ona o lo'u matua popole lava i lo'u tofiga fou o se faufautua o le Ofagapi, o loo ou anapogi ai ma tatalo ina ia faamanuia a'u e le Alii ia ou to'a, mautinoa, ma ou le popole i le aso a taeao pe a ou aoaoina atu la'u lesonea muamua.”

I le taimi o la'u anapogi, ou te tusia ai i lalo mea e musuia ai a'u; o manatu, lagona, ma musu-musuga e oo mai i lo'u mafaufau ma lo'u lotu; ma mau e faatatau i ai lea e matua talafeagai lava i le faamoemoega o la'u anapogi.

A o o'u faasoaina atu ou manaoga i le Tama Faalelagi, e masani lava ona ia faamanuiaina au i auala ou te le'i mafaufauina. O mea e ono foliga mai e tutupu faafuasei i lo'u olaga e manino lava le fesootai pe a ou tusia i lalo ma vaai i le auala e saofaga uma ai i lo'u tuputupu ae ma lo'u alualu i luma. Talu mai le 1996, i le taimi muamua na ou tausia ai se api talaaga o le anapogi, ua ou vaai ai i auala ua faamanuiaina ai e le Tama Faalelagi lo'u olaga. Ou te molimau atu i le matautia o le mana faaleagaga o le anapogi ma le tatalo ma mafaufau i le anapogi o se avanoa o le “olioli ma le tatalo” (MFF 59:14).

Renee Harding, Karolaina i Matu, ISA

Maria Filitia Samita

O Maria Filitia Samita, o se tamaitai faamaoni o le Au Paia o Aso e Gata Ai, na tuua na o ia ma ni tamaiti laiti a o i ai lona toaluia i le Falepuipui i Liperate i le taumalulu o le 1838–39. Na osofaia e tagata faatupu faalavelave lona fale, ma na toeitiiti lava a fasiotia ai lana tama tama ona o le osofaiga. O Maria o le avā a Ailama Samita, na tuua o ia o se tina ua oti lana tane ina ua fasiotia lona toaluia i le Falepuipui o Karefasi i le aso 27 Iuni, 1844. Sa la onosaia ma Ema Samita le tele o tofotofoga faatasi ai ma o la taitoalua o Ailama ma Iosefa Samita. O le asō, ua faamamaluina ai Maria o se tasi o paionia sili ona malos i le Ekalesia anamua.

Na faaipoipo Maria ia Ailama Samita i le aso 24 o Tesema, 1837. Na maluu le faletua muamua o Ailama o Jerusha i le fanauina o lana pepe, ma o Maria na tausia le fanau laiti a Ailama e pei lava o sana fanau. E toaluia foi le fanau a Ailama ma Maria, e aofia ai Iosefa F. Samita, lea na avea mulimuli ane o le Peresitene lona ono o le Ekalesia.

Ina ua tuua e le Au Paia ia Navu mo le Vanu o Sate Leki ina ua mavae le maluu fasia o Iosefa ma Ailama, na tonu ia Maria e o i le malaga. Sa tofi o ia ma lona aiga i se vaega o le aumalaga, ma na ta'u atu e le kapeteni ia te ia o le a avea o ia ma avega i isi ma e le tataua ona latou o i lenei malaga faigata. Na tali atu Maria, “O le a ou muamua ia te oe i le vanu ma o le a ou le talosagaina foi se fesoasoani mai ia te oe.”¹ Na faamaonia lava le faigata o le savaliga, ae na latou taunuu ma lona aiga i Sate Leki i le aso 23 o Setema, 1848, e tasi le aso na muamua ai i le kapeteni lea na masalomia o ia.



Luga: O Maria Filitia Samita o loo sopoia laufanua valevalenoa.

Luga: O Iosefa F. Samita ma tagata o lona aiga i le fale o Maria Filitia Samita i le Aai o Sate Leki, pe tusa o le 1910.

Sa tumau faamaoni lava Maria Filitia Samita seia oo ina uma lona soifua. Sa ia totogiina ana sefuluai, e ui lava ina mativa o ia. Pe a fautua atu ma le faaletatau se tasi e aua nei ona tuuina atu se tasi vae sefulu o pateta na ia totoina i lona tausaga, sa ia tali atu, “E tataua ona e maasiasi ia te oe lava ia. E mafai ea ona e taofia mai se faamanuiaga mo au? . . . Ou te totogiina la'u sefuluai, e le gata ona o se tulafono a le Atua, ae ona ou te faamoemoeina foi se faamanuiaga e ala i lo'u faia.”² Sa ia totoina se faatoaga i le Vanu o Sate Leki ma aoao atu i lana fanau le talalelei. Na saunoa mulimuli ane Peresitene Iosefa F. Samita, “Sa ia aoao mai ia te au le mamalu, ma le lotu mama, ma le upumoni, ma le faamaoni i le malo o le Atua, ma sa ia aoaoina au e le gata i upu ae faapea foi i faataitaiga.”³

FAAMATALAGA

1. Tagai i le Don Cecil Corbett, *Mary Fielding Smith: Daughter of Britain* (1966), 228.
2. Maria Filitia Samita, na siina mai e Iosefa F. Samita, i le Conference Report, Ape. 1900, 48.
3. *Aoaoga a Peresitene o le Ekalesia: Iosefa F. Samita* (1998), 36.



O IA O LE VAI OLA

“Pe tou te mananao ea e inu i lenei vai o le ola [o loo ta’ua i le Ioane 4:14] ma iloa ai lena vaipuna faalelagi e puna mai i totonu ia te oe e oo atu i le ola e faavavau?”

“Aua la tou te fefefe. la talitonu ma o outou loto atoa. la atiina ae se faatuatua e le maluelue i le Alo o le Atua. la aapa atu o outou loto i le tatalo faatauana. la faatutumu o outou mafauafau i le malamalama e uiga ia te la. la lafoai o outou vaivaiga. Savavali i le paia ma ia ogatasi ma poloaiga.

“Ia matuai feinu i le vai ola o le talalelei a lesu Keriso.”

Elder Joseph B. Wirthlin (1917–2008) o le Korama a Aposetolo e Toasefululua, “O Le Maua Atili o le Ola,” *Liahona*, Me 2006, 100.

IA MATUAI FEINU I LE Vai Ola

*“A o se inu i le vai ou te avatu ia te ia, e le toe fia inu”
(Ioane 4:14).*

Saunia e Matthew Heaps

Tautua a le Ulelefea

O la’u galuega e aveina atu ai au i nuu o le lalolagi atoa lea e le maua ai e tagata se vai mama. Matou te galulue faatasi ma malo ma tagata o le atunuu ina ia tuuina atu ni puna o vai mama e mafai ona tausia ma vaavaaia mo le tausiga o le ola e pei o vaieli ma vaipuna po o faatanoa e tali ai vai vaitimu.

Ua ofo atu e nei galuega faatino mo le suavai se faaleleia maoae o le tulaga lelei o le olaga. Ua maoae le faaleleia atili o le soifua maloloina aua o vai mama ua taofia ai le pipisi o le taifoi, kolera, ma isi faama’i e mafua mai i le vai. Ua faaleleia foi le tamaoiga aua o matua ma fanau sa masani ona faaaluina o latou taimi e la’u ai vai ua mafai nei ona faaaauina galuega ma aoaoga. E oo lava foi i nuu e tele le mau faafitauli lautele, e masani lava ona fai mai tagata o vai mama o le mea sili lea ona latou manaomia.

Na faataunuu e le Faaola Lana galuega i le lalolagi i se taimi ma se nofoaga lea sa faalagolago ai tagata i vaieli mo le suavai. A o Ia aoaoina le fafine i le vaieli i le fetalai atu “a o se inu i le vai ou te avatu ia te ia, e le toe fia inu ia” (Ioane 4:14), pe sa

Ia aoao mai foi ia i tatou e faapea, o Lana talalelei e faamalieleina ai—tumau—mea masani e sili ona tatou manaomia? Ou te talitonu o lena lava.

O le a ou faafetai pea i se tamaitai i Kenya, Aferika, o lē na aoaoina au e uiga i le naunautai e galue mo le mauaina o le suavai. Sa ou feiloai ia te ia i se faafiafiaga ina ua uma ona fausia se vaieli i lona nuu. Ma le agaga faafetai sa ia ta’u mai ai ia te au o le vaieli fou o le a faaititia ai lana malaga i aso uma mo le iva maila (14 km) e aumai ni vai, i le na o le tasi le maila (1.6km). Sa matuai fiafia o ia i avanoa o le a ia maua.

Sa le mafai ona aveese mai lo’u mafau-fau pe faapei sou lagona pe afai *ou te* savali mo se maila e aumai ni vai. Sa faagaeetia a’u i lona tuueseina o mea uma—mai galuega o le fale i le faiga o le togalaau—ae alu lana malaga e aumai ni vai. Sa ia iloaia e le mafai ona faauma isi ana galuega e aunoa ma lena vai. Sa ou mafauafau i le mamafa o lana avega. O le amoina o le vai e manaomia ai le malosi ma le onosai. Ae, mo le manuia o lona aiga, sa naunau ai o ia e savali i le iva maila i aso uma e aumai [ia vai].



Na aoao mai le Faaola, “A o se inu i le vai ou te avatu ia te ia, e le toe fia inu ia e faavavau; a o le vai ou te avatu ia te ia, e avea i totonu ia te ia o le vaipuna, e puna i luga i le ola e faavavau” (Ioane 4:14).

Ou te le iloa pe mafai e i tatou o e maua mai le suavai mama mai paipa i o tatou fale, ona faamoemoe i nisi taimi ia tutusa le faigofie o le o mai ia Keriso ma le mimiloina o se ki ia maua ai se ipuvai. Pe o tatou naunau ea e faataatia ese isi galuega, e oo lava i galuega taua, ina ia saili ai ia iloa Iesu Keriso ma Lona Tama?

Ou te iloa o le vaieli o le vai ola ua ofoina mai e le Faaola ia i tatou e le matutu lava ma e mama atoatoa ma maua ai le ola. A tatou o mai ia te Ia ma se ipu e leai se mea o i ai, o le a Ia faatumuina, o le tele lava o taimi, e sili atu nai lo lo tatou malosi e gafataulima ai. O Ia moni lava o le vai ola, o se faaaliga o le alofa o le Atua. ■

O LE A LE VAI OLA?

- O le vai ola o le talalelei lea a Iesu Keriso.
- “O le puna o le vai o le ola . . . o se faatusa lea o le alofa o le Atua” (1 Nifae 11:25).
- E mafai e le vai ola ona aumaia ia i tatou le “ola e faavavau” (Ioane 4:14; MFF 63:23).

Mo nisi faamatalaga e uiga i lenei autu, tagai i le 1 Nifae 8; 11; ma le Richard G. Scott, “O Le Mana e Liua ai o le Faatuatua ma Uiga Tauleleia,” *Liahona*, Nov. 2010, 43.

E FAAPEFEA ONA FAAMANUIAINA I TATOU E LE VAI OLA?

Na fesoasoani Kathleen H. Hughes, o le sa avea ma se fesoasoani muamua i le au peresitene aoao o le Aualofa, e tali lenei fesili i lana saunoaga i le konafesi aoao “Faamanuiaina i le Vai Ola” (*Liahona*, Me 2003, 13).

1. E faamaloloina i tatou e le vai ola e ala i le mana o le Agaga Paia.
2. E faafaileleina ma tausia i tatou e le vai ola (tagai i le Mataio 11:28).
3. E aumaia le filemu ma le olioli e le vai ola (tagai i le Ioane 14:27; MFF 101:16).

Fuafua e faitau faatasi le 1 Nifae 11:25 ma lou aiga po o se uo. Ia talanoaina le sootaga i le va o le puna o le vai ola ma le laau o le ola.

O LE GALUE

O SE MATAUPU FAAVAE E FAAVAVAU

Sa galulue lo tatou Tama Faalelagi ma Iesu Keriso e foafoa le lagi ma le lalolagi. Sa La foafoaina le la, le masina, ma fetu. Sa la faapotopotoina le sami ma faia ia alia'e le laueleele matutu ma laau ina ia ola ai. Ona La foafoaina lea o meaola uma i le sami ma luga o le laueleele. (Tagai i le Kenese 1; Mose 2.) Ua faaalua i la La'ua faataitaiga o le galue e taua i le lagi ma le lalolagi. (Tagai foi i le Ioane 5:17; 9:4.)

Ina ua foafoaina e le Atua le tane ma le fafine i Lona lava faatusa, sa Ia tuuina i laua i le Faatoaga o Etena (tagai i le Kenese 1:26–27; 2:8). Mulimuli ane, ina ua tuliese a i laua mai le faatoaga, sa fetalai atu le Alii ia Atamu, “E te ‘ai foi au mea e ‘ai ma le afu o ou mata” (Kenese 3:19). Talu mai lena taimi, na galulue Atamu ma Eva ina ia tausua o laua manaoga ma manaoga o le la fanau (tagai i le Mose 5:1).

Talu mai le taimi o Atamu ma Eva, ua avea le galue ma se ituaiga olaga mo i tatou uma i le lalolagi. Tatou te galulue e saunia mea mo le manuia faaletino, faaleagaga, ma le faalelagona mo i tatou lava faapea ma o tatou aiga. E taumafai matua e faatutaga ni aiga e aoaoina ai le mataupu faavae o le galue. O le tuuina atu i le fanau o ni galuega e fai e fetai ma o latou tomam faamalo atu ia latou taumafaga, e fesoasoani lea latou te maua ai ni aafiaga lelei o le galue. O se taunuuga, e mafai ona latou atiina

ae se talitonuga malos i le galue, se uiga lelei, ma ni tomam masani.

E tatou foi ona tatou saili ia maua le paleni lelei i le va o le galue ma le malolo. E ono aso i le vaiaso, e mafai ona tatou maua faamanuiga a o tatou manatua e faafefilo le galue ma gaoioiga e toe faafouina ai lo tatou malos. Ae peitai, i Aso Sa, ua folafola mai e le Alii ia i tatou ni faamanuiga faapitoa pe a tatou usitaia Ana poloaiga ina ia aloese mai le faia o a tatou galuega faaletino ae ia tausua le aso Sapati ia paia (tagai i le Esoto 20:9–11; MFF 59:9–19).

O le galue o se vaega o le fuafuaga a lo tatou Tama Faalelagi mo i tatou i le lagi ma le lalolagi. Afai tatou te amiotonu, o le a tatou toe foi atu e mau faatasi ma Ia. O iina o le a faaauau ai pea ona tatou

maua avanoa e galulue ai a o tatou fesoasoani i le fausiaina o le malo o le Atua (tagai i le Mose 1:39). ■

Ao tatou fesoasoani atu i le tasi ma le isi ma tausua le mamafa o a tatou galuega, e oo lava i le avega e sili ona mamafa o le a faapea ona faamamaina.



Tatou te nafa ma le tausiga o i tatou lava ma o tatou aiga.




1. Ua i ai i matua se tiute paia e tausia a latou fanau (tagai i le MFF 83).



2. O le a faamanuiaina le fanau a o latou tausaiaina o latou matua matutua (tagai i le 1 Timoteo 5:3–4, 8).



3. E tatau ona tatou fesoasoani atu i tagata o tatou aiga lautele pe a talafeagai ai.



1. E faamalolosia o tatou uiga faaletagata ma atiina ae tomai o le galue.

E oo mai faamanuiaga ia i tatou o se taunuuga o le galue.



2. Tatou te lagonaina le olioli i le fuafuaga a le Atua mo i tatou i le lalolagi.



3. Tatou te lava saunia ma ola faalagolago le tagata ia te ia lava pe a tatou faaputuina se sapalai o meaai, vai, ma isi mea e manaomia mo le tolu masina.

“A e lelei ina faamalosi o ia i galuega a ona lima i mea aoga, ia maua e ia se mea e avatu i le ua mativa” (Efeso 4:28).

Mo nisi faamatalaga, tagai i le *Mataupu Faavae o le Tala-lelei* (2009), 160–75; ma le “O Le Aiga: O Se Folafolaga i le Lalolagi,” *Liahona*, Nov. 2010, 129.

VALAAUINA E LE ATUA

Saunia e Ramona Dutton

Sa vave ona ou iloina le uiga o le “valaauina e le Atua, i le valoaga, ma le faaee atu o lima, o e o i ai le pule” (Mataupu Faavae o le Faatuatua 1:5).



Ele'i leva ona ma siitia atu ma lo'u toalua i se aai fou ma sa ma naunau lava e auai atu i la maua uarota fou. Na iloa mulimuli ane ua sui tuaoi o le uarota, ma sa vaelua ai le uarota.

Ina ua tuua le lotu i le ma Aso Sa lona lua, sa faatulaga e le failautusi o le uarota se taimi matou te feiloai ai ma le epikopo fou i le afiafi o le Aso Lua. Ina ua maea se feiloaiga puupuu, sa talosagaina e le epikopo le faatagaga a lo'u toalua ina ia valaauina au e avea ma se peresitene o le Peraimeri o le uarota fou. Ona ia tuuina mai lea o le valaauga ia te au. Sa ou te'i, peitai sa aoaoina a'u e aua nei tete'eina se valaauga, o lea sa ou ioe ai o le a ou faia le mea sili ou te mafaia.

Sa tuu mai e le epikopo ia te a'u se lisi o igoa ma talosaga mai ma te feiloai i le isi lua o aso e sosoo ai ma tuu atu igoa ua filifilia mo ni o'u fesoasoani ma se failautusi. Sa ou lagona le lofituina. Ina ua ma taunuu i le fale, sa ou lokaina a'u lava i totonu o le fale-taele ma ou tagi ai. Ona sasaa atu lea o lo'u loto i le Tama Faalelagi, ma faailoa atu o'u popolega e uiga i lo'u valaauga fou. Ou te le'i iloina se tasi i le uarota fou, ma sa ou manaomia Lana fesoasoani. Ina ua uma la'u tatalo, na faatmulia lo'u loto i le filemu.

O le taeao na sosoo ai, sa ou tatalo ona fai ai lea o a'u galuega masani i le

fale. Sa i luga o le laulau o le umukuka le lisi o igoa na tuu mai e le epikopo ia te au, ma e le umi lava ona ou tilotilo i ai i taimi uma ou te pasia ai. Ina ua uma ona ou tilotilo i le lisi mo ni nai taimi, e lua lava ni igoa na foliga e tutu matilatila mai. Sa ou uuina le lisi ma faitau ia igoa. A o ou faaleoina ia igoa, sa siomia a'u e se lagona mafanafana. Ou te le'i lagonaina muamua le malosi o le Agaga Paia.

Sa vave loa ona ou alu atu i le Tama Faalelagi i le tatalo, ma loimata e tafe ifo i o'u alafau a o o'u toe ta'uina ia igoa. Ou te le'i iloa ma se mea e uiga i nei tamaitai, ae sa ou iloa i totonu o lo'u loto e tatau ona avea i laua ma o'u fesoasoani.

I se taimi mulimuli ane i lena taeao, sa ou toe mafaufau ai i le lisi o igoa. O taimi uma lava ou te manatunatu ai i le lisi, e tasi lava le igoa e oo mai i lo'u mafaufau. Sa avea o ia ma a'u failautusi.

Sa ma feiloai ma le epikopo i le aso na sosoo ai ma tuu atu ia te ia ia igoa o o'u fesoasoani ma le failautusi. Sa faate'ia a'u ona, o tamaitai foi ia na manatu le epikopo o le a fetauilelei i le Peraimeri. Ina ua ou taunuu atu i le lotu i le Aso Sa, sa ma tutu i fafo o le falelotu ma le fesoasoani muamua o le au epikopo, ma faasino mai o'u fesoasoani ma le failautusi a o latou

SAILIA O LE TAITAIGA A LE AGAGA

“E ao ona valaauina se tagata e le Atua e auauna i le Ekalesia (tagai i le Mataupu Faavae o le Faatuatua 1:5). E sailia e taitai le taitaiga a le Agaga i le iloilo ina po o ai e valaau. Latou te iloilo ina le agavaa e manaomia mo le valaauga. Latou te iloilo ina foi tulaga patino po o tulaga faaleaiga o le tagata. O valaauga taitasi e tatau ona manuia ai tagata o loo auauna atu i ai, le tagata, ma le aiga o le tagata.”

Tusitaulima 2: Taitaiina o le Ekalesia (2010), 19.1.1.

taunuu atu. A o ou vaai atu i nei uso, sa ou lagona e pei lava ua leva ona ou iloina i latou. Sa toe faamautu mai e le Agaga ia te a'u o nei tamaitai ua valaauina e le Atua.

Sa ou iloina e mafai ona matou galulue faatasi i le tautuaina o le Alii—ma na matou faia. E ui ou te le'i masani i nei uso, ae na fetauilelei lava i latou mo o latou valaauga. Sa silafia e le Alii i latou sa Ia finagalo e valaauina. O se aafiaga tuputupu pea lenei mo a'u le iloina lelei o le uiga o le valaauina e le Atua e ala i valoaga. ■

O LE MISIONA O LE OLAGA A SE TINA ALOFA

Saunia e Peiholani Kauvaka

Ao o'u tuputupu ae i Toga, sa masani lava ona fesoasoani lo'u tina e faiaoga i le seminare. Mai le taimi na 5 ai ou tausaga seia oo i lo'u 10 tausaga, sa masani lava ona ia fafaguina a'u a o le'i faia le seminare ma taitai atu a'u i le fale sa faia ai le vasega. E ui ina sa le atoa se kuata maila (0.4 km) e savali atu ai i le auala e ui atu i le toga kuava, ae na te fesili mai ia te au, "O e fefe?" Ou te tali atu ma le lototele, "Leai."

Ona ia fai mai lea, "E i ai se aso e tatau ai ona e lototele ma auauna atu i lou Tama Faalelagi. Ua Ia sauniaina mea uma mo i tatou, e oo lava i se fuafuaga ina ia mafai ona tatou toe foi atu ma mau faatasi ma Ia. E i ai se aso o le a e alu ai i se misiona ma auauna atu ia te Ia ma lou loto atoa, mafau fau atoa, manatu atoa, ma le malosi atoa. E ao ona e amata tapena i le taimi nei e avea o se faifeautalai lelei."

Na iu ina ave e ou matua lo matou aiga i Ontario, Kalefoni, ISA. Sa i ai lo'u tina i se atunuu sa le masani ai, sa le mafai ona tautala i le gagana ma sa faateia foi i tu ma aga. E pei o le matuamoa o loo ofoofotai ana tamatamaimoa i lalo o ona apaau, e na te ofoofotai ai i matou uma o lana fanau ma faapau i ona tulivae, ma aoi atu i le Tama Faalelagi ina ia leai se tasi o le fanau na Ia tuuina mai ia te ia e alu ese mai Le Ekalesia a Iesu Keriso o le Au Paia o Aso e Gata Ai. Sa faaoga e o'u matua ia tatalo faaleaiga, faitauina o tusitusiga paia i aso uma, anapogi faaleaiga e faia soo, afiafi faaleaiga faalevaiaso, ma sauniga o le Ekalesia e saili ai le fesoasoaniga a le Tama Faalelagi e faamalositia ai lo matou aiga.

Sa fautuaina i matou e o'u matua a o matou laiti ia matou amio e pei o ni faifeautalai. Sa



Luga: O Mose, o le tamā o le tusitala, lona tina o Lavinia, ma lona tei i le lotoa o le Malumalu o Los Angeles Kalefonia i le 1999.

masani lava ona matou ofuina ni ofutino papae i le lotu ma oti o matou ulu e pei o ni faifeautalai. I le aveai ai ma se ositaulaga ou te faamanuina ai le faamanatuga, ae tapena ma tufa e o'u uso laiti le faamanatuga o ni aoao ma ni tiakono. Sa ou iloa atu lo'u tina ma lo'u tama o vaavaai mai ia i matou, ma faamautinoa e faamaeaina ma le faamaoni o matou tiute.

Ae ou te le'i alu i la'u misiona, sa fai mai lo'u tina, "Fai lau vaega, ma o le a fai foi la'u vaega. O le a ou anapogi ma tatalo ina ia e maua ni tagata e aoao." Sa faaauau pea ona ia anapogi ma tatalo mo ana fanau tama uma e toafa i le taimi o a latou misiona. Sa matou auauna uma ma le faamaoni ma toe foi mai i le aiga ma le mamalu.

I le taimi o la'u asiasiga mulimuli ia te ia a o le'i maluu, sa fai mai lo'u tina, "Peiholani, ua uma ona ou aoaoina oe i mea uma ou te iloa e sili ona taua i lenei olaga ma le olaga a sau. O lena mea, e moni le talalelei a Iesu Keriso. O le toto togiola o Iesu Keriso o se faaolataga lea i lou agaga. Ia e faamamalu i feagaiga na e osia ma le Alii i le malumalu. A e faia lenei mea, o le a toe faatasia ai lo tatou aiga. Ua ou iloa lenei mea e aunoa ma se masalosalo aua o loo soifua le Tama Faalelagi ma Iesu Keriso."

Na fausia la'u molimau i le talalelei, i upu uma na fai mai ai lo'u tina ma lo'u tama. Ou te iloa o le a toe faatasia lo matou aiga i se aso aua na faataunuu e o'u matua le la misiona o le aoao o i matou i le talalelei ma taitai atu i matou i le Faaola. ■

MI VIDA, MI HISTORIA

*O tala o le faatuatua
ma musumusuga mai le
Au Paia o Aso e Gata Ai
i Latina Amerika.*

Na faasoa mai e tagata o le Au Paia o Aso e Gata Ai i nei itulau a latou tala o le tuuto ma le talitonuga i le talalelei a Iesu Keriso i se faaaliga talu ai nei a le Falemataaga o Talafaasolopito a le Ekalesia. Ua fai i latou ma sui o le faitau miliona o tagata o le Au Paia i Latina Amerika.

E luasefulu fa tala na faaali i totonu o le Falemataaga o Talafaasolopito a le Ekalesia i le Aai o Sate Leki, Iuta, ia Iuni 2011. O loo mafai lava ona maimoaina lenei faaaliga tuufaatasi i luga o le initoneti i le lds.org/churchhistory/museum/exhibits/mividamihistoria.

Carmen Echeverría Wood

Na fanau Carmen i totonu o se aiga lotu i le Aai o Guatemala, Kua-temala. Ina ua iva ona tausaga, sa aoaoina e tamaitai faifeautalai o le Au Paia o Aso e Gata Ai le talalelei ia te ia ma lona aiga. Sa fiafia o ia e auai i le Peraimeri ma talanoa e uiga i se lagona fou o le fiafia i totonu o lona aiga. O se tausaga mulimuli ane, sa papatisoina ai le aiga. Fai mai o ia, “O se taimi e maeu, le matagofie lenei.” Na te manatua le asiasiga a Peresitene Tavita O. MaKei (1873–1970) i Kuatemala i le 1954 ma aoao atu i tamaiti le mataupu faavae o le sefuluai. I le 17 o ona tausaga na valaauina ai o ia e auauina atu i le Misiona a Amerika Tutotonu ma sa fiafia e faasoa atu “le faamoemoe mo se olaga sili atu ma le faatasia e faavavau.”





**Miriam
Puerta Amato**

O Miriama o se tagatanuu o Pasila. Ina ua manao o ia e alu i se misiona, sa ia faatumuina ana pepa.

I le fitu o vaiaso mulimuli ane, a o faatasi ai ma lona aiga i le fale, sa ia faitaua ai le tusi o loo valaauina ai o ia i le Misiona a Utah Salt Lake City Temple Square. Fai mai a ia, “Ina ua ou faitauina le tusi, sa ese le malie o le feei o lo’u aiga e pei lava ona latou faia pe a sikoia le au soka a le atunuu o Pasila. Sa ou fialia foi, ma sa ou iloa na auina atu a’u e le Alii.”



**Nelson
Mousqués**

E le’i leva lava ona fanau Nelson i Asunción, Parakuei, ae feiloai loa ona matua ma faife-

autalai. “I se tasi aso a o nofonofo lo’u tamā i le faapaologa o lo matou fale, sa ia iloa atu Elder Higbee ma Elder Johnson ae na te le’i iloa o i laua o ni faifeautalai,” na toe manatua ai e Brother Mousqués. “Na fai atu o ia i lo’u tuafafine e aumai ni nofoa se lua aua, fai mai a ia, “O le a suia o tatou olaga e na alii talavou.’ Ina ua tuitui mai faifeautalai i le faitotoa, sa ia tatalaina ma fai atu, ‘Susū mai i totonu. Sa matou faatali atu mo oulua.’ Sa auai lo’u tama ma le matou aiga atoa i le Ekalesia.”

ATA NA PUJINA E MARK J. DAVIS, CRAIG DIMOND, KENT MILES, MA CRAIG J. LAW



Robin Mendoza

Sa ola ae Robin i le tulaga mativa i Ekuatoa, ae sa manao o ia ia sili atu se olaga mo ia lava. I se tasi taimi, a o galue ai i se faatoaga mo le 12 itula i le aso, sa ia tatalo mo le taitaiga, ma sa

feemo uila i le taimi o lana tatalo. Sa manatu Robin o lenei mea o se savali lea mai le Atua e faapea o loo i ai se faamoemoega o le olaga. “Sa ou iloa o o’u lagona na sau mai le Atua,” na manatua ai e Robin. Na iu ina ia iloa o le faatuatua, e mafai ai ona ia suia lona olaga. I le 16 o ona tausaga na alu ai e faigaluega i Guayaquil, ma o iina na ia papatiso ai. O musumusuga faaauau pea na taitaiina atu ai o ia i le Iunivesite o Polika Iaga, lea na ia faataunuaina ai lana sini o le mauaina o se aoaoga.



Ursula Binder Brock

E manatua e Sister Brock lona mafaufau i le uiga o le olaga i le na o le lima o ona tausaga. A o talavou o ia i Venesuela, sa aoao atu e faifeautalai le talalelei ia te ia ma lona aiga, ma sa papatisoina

i latou. Sa tumu o ia i le faatuatua, ma sa valaauina o ia e avea ma se peresitene o le Peraimeri o le paranesi i le 16 o ona tausaga. I le taimi nei, ina ua maea se soifuaga o au-aunaga, ua ia iloa ai mo ia lava o le, “faatua-tua o se filifiliga.” Sa ia faamatala mai, “Sa ou filifili ina ia i ai se avanoa mo le Faaola i lo’u olaga. Ua ou iloa o le Togiola o le faatinoga aupito sili lea ona matagofie ma le le manatu faapito o le alofa mo tagata uma. Ua avea ma a’u uo mamae, lo’u Faaola ma le Togiola, o le Na te aumaia le filemu—o se tulaga faaauau pea mo a’u.”





Lincoln Peters

Sa nonofo Lincoln ma lona aiga i Santiago, Chile, seia oo ina maliu lona tina i le 10 o ona tausaga. Mulimuli ane, sa nofo o ia i le fafine ma le tamaloa o lona aiga. Ina ua 18 tausaga o Lincoln, na o mai ia Elder Barton ma Elder Bentley i lo latou fale. Sa vave ona talia e le fafine o le aiga o Lincoln ma lona tinamatua le talalelei, ae sa fealofa'i solo Lincoln mai faifeautalai. I se taeao o se tasi Aso Sa, sa sau ai i lona potu lona tinamatua o lē e masani lava ona agamalu, ma toso ese le ie o lona moega, ma fai atu ia te ia o le a latou o faatasi i le lotu. O lona te'i i lea amioga e le masani ai a lona tinamatua ma ona o lona faaaloalo ia te ia, sa ia tu ai i luga ma alu i le lotu. O lona aso, sa ia lagonaina ai se mea fou ma mamana i totonu o lona agaga ma na suia ai lona olaga. E le'i umi ae avea o ia ma uluai tagata na liliu mai i le Ekalesia i Chile.

Luis ma Karla Hernández

Na fetaui ia Luis ma Karla a o talavou i Honetura. Sa amata ona la tafafao faama-sani ma sa le'i umi ae faa-ipoipo. O Luis, e le auai i le Ekalesia, ma e faamemelo lava i matua o Karla, lea e "faaalua e le tasi i le isi le faaaloalo ma le alofa, ma o lea tulaga na ou manao ai ia ou malamalama i o laua tulaga faatauaina." E le'i leva a e papatiso loa ia Luis, ma sa faamauina ia Karla ma Luis i le Malumalu o le Aai o Kuatamala i Kuatamala. I le ta'i 30 ma ona tupu o o la tausaga, sa tulaga faaletonu ai le la mafutaga, ma tuua ai e Karla le aiga, ma fesiligia ai pe le o se mea sese lo la faaipoipo talavou. Sa anapogi ma tatalo Luis ma aoi atu i le Atua ina ia "toe aumai Karla i le aiga, ma sa Ia faia lava. Sa Ia faia." Ua sili atu le malosi o le la ulugalii i le taimi nei nai lo se isi lava taimi.





Noemí Guzman de Abrea

Sa fanau Noemí i Atenitina, lea na auai ai lona aiga i le Ekalesia. Sa latou malaga atu i le Iunaite Setete a o tala-

vou o ia. E ui i lona fiafia e avea ma se tagatanuu o Amerika, ae e sili atu lona fiafia pe a mafai ona ia iloa ia aganuu a Atenitina. “E matuai agalelei lava tagata, i Latina Amerika. E vave ona latou faamasani ia te oe; faauo ia te oe; ma faaaumea ia te oe. Latou te fiafia e faatasi ma aiga ma uo, ma taumafa i meaai lelei. O se mea matagofie tele lona, ma o le iloina o lona vaega o le aganuu o se mea lea ou te le fia suia mo se isi lava mea.”



Omar Canals

I Iurukuei i le 1948, sa ofo atu e le tina o Omar lona faamalu i tamaitai faifeautalai e toalua o le Au Paia o Aso e Gata Ai. O se taunuuga

la, sa amata ona latou talatalanoa ma faifeautalai, ma na papatiso mulimuli ane ai le tuafafine matua o Omar. Na fanau Omar i le 1948, ma o ia le pepe muamua na faamanuiaina i le Misiona a Iurukuei, lea na tatalaina i le 1947. Na papatiso Omar ma ona matua ina ua valu ona tausaga. I ni nai tausaga talu ona faaipoipo Omar ma lana manamea, sa la malaga atu ai i le Iunaite Setete. Sa avea lava o ia ma se tagata faasalalau, ma sa faafaigaluega ai Omar e le Ekalesia i le 1973 ma avea ai ma tagata faaliliu o le gagana Sipaniolo mo le konafesi aoao. ■

Faatuatua e Tali Atu I LE VALA AUGA

E tatau ona tatou maua uma se tautinoga mumu i totonu o tatou loto e faapea, o le galuega lenei a le Atua ma e manaomia ai le mea sili e mafai ona tatou tuuina atu i le fausiaina “o mea le aina ma faatafunaina o Siona.”

I le 1849, e na o le lua tausaga talu ona ulufale atu le Au Paia i le Aai o Sate Lekī, na taitaiina ai e Elder Parley P. Pratt o le Korama a Aposetolo e Toasefululua le malaga i saute. O le mamao lava i saute na oo i ai le malaga, o le faigata foi lea o le laueleele. Ina ua 3,000 futu (914 m) le malifa mai le augutu o le Faatanoa Tele e tau atu i le mea e fetai ai le Vaitafe o Virgin ma le Santa Clara (o le itu i saute o St. George, Iuta i aso nei), na amata ona matutu, oneonea, papa ma gaoa le fanua. Sa le'i fiafia i latou na muai asaina. Fai mai se tala faamaumau:

“Ua pasia . . . se nuu gaoa, maā, oneonea ma e tau le mafai ona faamatalaina, ua faaputu faatasi i se le mautonu matautia. . . .

“Na taatia mai se tulaga matautia tele, e aofia ai ni mauga tetele, toafa [lanumumū], laufanua foliga faanoanoa ma leai ni mutia, o papa maua luga faasasa'o, kelei mata-gataga, . . . maafoaga . . . ua taoto mai ma le le mautonu e matuai le talitonu lava i ai—i se faapuupuuga, o se atunuu ua faaleagaina, . . . ua matuai sueni mai totonu i fafo, luga i lalo, e ni luluuga matautia i se vaitau na muamua atu.”¹


Ae peitai po o le a lava le gaoa o foliga o laufanua e agai atu i saute, ae e foliga mai e sili atu le faigata o pupū ua faaleagaina e matagi ma ua tele ina pala, ma le loloto o le vaomatua o le itumalo o San Juan o loo i le itu i sasa'e.



O LE TAALAELOSO MUMU, SAUNIA E LYNN GRIFFIN

**Na Saunia e Elder
Jeffery R. Holland**


O Le Korama a Aposetolo
e Toasefululua



Na silafia e taitai o le Ekalesia o le a faigata le faa-
lauleleiga o lena tulimanu gaoa ma le le iloa o le
teritori, ae ui i lea, sa latou mananao pea e faavae
ai iina ni aai mo le Ekalesia. I le konafesi faalekuata
a le Siteki o Parowan i le 1879, e toa 250 tagata na
taliaina le valaau a Peresitene Ioane Teila e faavae
le Misiona i San Juan. Faatasi ai ma ni taavale toso e
80 ma povi ma solofanua na toeitiiti atoa le 1,000, sa
amata ai ona latou asaina lo latou auala e agai atu i
le teritori mataina, ma fou o mauga e lilofia ia tumu-
tumu i le kiona ma mauga maa maualuluga.

O le sailia o se auala e sili ona puupuu e tau
atu i San Juan, na foia ai e tagata folau anamua lea
faafitauli ma lea faafitauli ae sa le'i umi ae fetaiai ma
le luitau na aupito tele ma sili ona faigata o luitau
uma: o le le mafai lea ona sopoia le faga o le Vaitafe
o Colorado. Sa o se vavega le maua e le sikauti o se
ava vaiti i totonu o le vanu loloto—o se ava e 2,000
futu (610 m) le alu agai i lalo o pupū lanumumu e
tau atu i lalo i le Colorado River. O lenei “ava i le
papa” e toeitiiti lava o se mea matautia, na foliga mai
na maua ai le auala e tasi e mafai ona tau atu ai i le
itu i sasae.

Mo le tele o itu, o si tamai vaega i le maafoaga, sa
fai si vaiti tele mo solofanua ae o nisi itu sa matuai
vaiti tele mo se alii po o se tamaitai e ofi atu ai. O le
tifato faatusa'o i lalo i le pe a ma le 75 futu (23 m) e
foliga mai na faigata ai i se mamoe vao, ae le gata i
lea o ni taavaletoso e tutumu i uta. Peitai, sa leai se
manatu o le Au Paia aumalolosi e toe foi i tua, o lea,
faatasi ai ma ni pauta e tu'i ai papa ma ni meafaiga-
luega, ma le galulue ai i le tele o aso o Tesema 1879
ma Ianuari 1880, sa latou taina ai se auala maluelue,
ma le faatauvaai i totonu o le vanu gaoa.



O a ni mea ua tatou vaaia i nei faataitaiga o paionia faamaoni? O loo tatou vaaia mea na tatou vaai i ai ina ua sosola ese le Au Paia mai Niu Ioka ma Penisilevania ma Ohaio ma Misuri ona toe sosola ese lea mai Navu lea sa le'i umi ae mu a'e.

“O le maea ai o le faataatiaga o lenei auala, e pei ona sa i ai, o le galuega la o le a fai o le faaofiina lea o taavaletoso muamua e 40 i lalo o le “ava.” O isi taavaletoso, sa faatalitali mai i le lima maila (8 km) i tua i le Fifty Mile Spring, o le a sosoo mai i se taimi mulimuli.

Sa latou faatulagaina i latou lava i se faiga, “e mafai ai ona taupeupe mai ni alii se toasefululua pe sili atu i tua o le taavaletoso” i ni maea uumi e faalemu ai le ifoifo i lalo. Ona loka lea o uili i filifili, ia mafai ai ona latou faasesee ae taofia ai se faalavelave i le taavavale o uili.

I se tasi o taimi aupito maoae o le talafaasolopito o paionia, sa taitasi ona faasolosolo atu e le kamupani ia taavaletoso i lalo o le tifato matautia. Ina ua latou taunuu i le pito i lalo o le vanu, sa latou naunau loa e amata ona sopoia le vaitafe i se vaa mafolafola sa latou faia mo lena faamoemoga. E pei ona sa i ai, o le aiga o Iosefa Stanford Samita sa i ai i le taavaletoso mulimuli lava na tuutuu ifo i lena aso.

Sa fesoasoani malosi Stanford Samita i le aveina ifo i lalo o taavaletoso na muamua, ae sa galo i le kamupani o le a manaomia lava e le aiga o Uso Samita le fesoasoani ona o i latou sa i le taufaasiusiuga o le solo. I le matuai atu-atuvale ona na foliga mai ua tuulafoaia o ia ma lona aiga, sa ave atu ai e Stanford lana vaega, taavaletoso ma lona aiga i le taufaasiusiuga o le pupū. Sa faamuamua le vaega ae nonoa se solofanua lona tolu *i tua* o le taavaletoso i le uamea pito i tua. Sa tutu le au Samita mo sina taimi ma tilotilo ifo i lalo o le ava matautia. Na liliu atu ia Stanford i lona toalua o Arabella, ma faapea atu, “Ou te fefe ua le mafai ona tatou sao.”

Sa tali mai o ia, “Ae e tatau lava ona tatou sao.”

Fai mai o ia, “Ana faapea lava e i ai ni nai tagata e taofiofia i tua le taavale toso, *atonu* tatou te sao lava.”

Sa tali mai lona toalua, “*O le a ou* taofiofia tua.”

Sa ia fofolaina se ie i luga o le palapala, ma tuu ai iina lana pepe tama e vaai e Roy, o lana tama e tolu tausaga, ma Ada e lima tausaga. “Faatali iina ia tuagane laitiiti’ se’i

toe foi mai papa mo oulūa,” o lana tala lea. Ona tu lea o Belle Samita i tua o le taavaletoso, ma uumau i faagutu o le solofanua sa faamau ai i tua. Na amata ona tatai atu e Stanford le vaega i lalo o le ava. Na tau pau atu le taavaletoso i lalo. O le tosoga mua-mua na pau ai le solofanua o loo pito



Ina ua valaauina lona tamā e siitia atu lona aiga i le Misiona faigata o Muddy i Nevada o ona po nei, ISA, na tagi Elizabeth Claridge (luga) ae na fai mai, “E le ta’ua o ia o so’u tamā pe a le alu ae ua valaauina o ia.”

i tua. Na tamoe atu i ai Sister Samita i le solofanua ma le taavaletoso, ma toso mai ia manoa ma lona malosi atoa ma le lototele. Sa le’i umi ae pau atu ai ma ia, ma a o tosoina faatasi o ia ma le solofanua, sa seleia leaga lona vae mai le mulivae e tau i lona suilapalapa i se maa maamaai. O lona tamaitai toa, ma ona lavalava masae-sae ma se manu’a tuga, sa taofimau pea i na maea i lona malosi ma lona faatuatua atoa i le taimi atoa na faaifo ai i lalo seia tau atu i le faatausiusiuga o le vaitafe.

Ina ua taunuu i lalo ma na toetoe lava a le talitonu i le la taumafaiga, sa vave ona toe telea’i ane Stanford i le 2,000 futu (607 m) i luga o le pupū, ma lona popole i le saogalemu o

lana fanau. Ina ua sao o ia i luga o le augutu o le vanu, sa ia vaai atu ia i latou e le’i minoi lava ma lo latou tulaga. Sa ia siina le pepe, faatasi ai ma isi tamaiti e toalua o loo pipii atu ia te ia ma le tasi i le isi, na ia taitaiina atu ai i latou i le ava gaoa i lo latou tina popole o loo i lalo. Sa latou iloa mamao atu ni alii se toalima o agai mai ia i latou ma amo mai ni filifili ma ni maea. O lo latou iloa ina o le tulaga pagatia na i ai le au Samita, na o mai ai nei alii e fesoasoani. Na valaau atu Stanford, “Aua le popole, alii. Ua matou sao manuia mai. O [Belle] lea na o le pau lava lona o se fesoasoani e manaomia e se alii [e faataunuu ai lenei malaga].”²

Pe a Oo mai le Valaau

O le malaga i le Ava-i-le-Papa ua na o le tasi lea o le mau faataitaiga o le naunautai mataina ma le tuuto o le Au Paia anamua e tali atu ai i le valaau a lo latou perofeta pe a oo mai. O se isi faataitaiga o le faatuina ma le valaau i le Misiona a Muddy i Nevada o aso nei. E pei ona i ai le tele o nofoaga o paionia anamua, na folafola mai e le Muddy se olaga matuai faigata lava, ma sa matuai tele ni sailiiliga loloto sa faia ina ua oo mai le valaau e nofoia iina.

Masalo na fesili moni nisi o i latou na valaauina i le vaitau o 1860, “Mai nofoaga uma i le lalolagi, aisea ua filifilia ai Muddy?” Ia, na i ai moni lava ni mafuaaga. O le mea muamua lava, o le Taua i le Lotoifale o Amerika na faatupulaia ai le avanoa e auina atu ai ia sapalai i le Vaitafe o Colorado. Lona lua, ina ua faalavelaveina e le taua ia auala masani na maua mai ai ie mo lavalava, e le tele ni maila na mamao ai le nofoaga ua faavaeina ai le Misiona o Cotton i aai o St. George

ma Uosigitone. Sa faapea e mafai ona toto vave mo lena misiona i le eria o Muddy. Lona tolu, na malolosi lagona o le Au Paia o Aso e Gata Ai o lo latou tiute le galulue faatasi ma tagata Amerika Moni i le lotoifale, ma fesoasoani e fafaga i latou ma faamoemoe e faaaooga i latou.

Ae peitai o le eria lava ia o se fanua naumati, e leai ni laau e ola ai. Na foliga mai e toeitiiti lava a leai se mea e maua mai ae ua na o le vevela ma galuega faigata. Sa le'i nofoia ma o le tele lava o vaega e le'i aina, ma na sao lava le faaigoaina o le vaitafe lea na maua ai e le misiona lona igoa.

Ma o le faapefea, ae o le a foi le faatuatua ma le naunautaiga na nofoia ai le Muddy, o le a tuu atu ai i se tasi o i latou na muai nofoia e faamatala atu lana tala. E faatusaina o ia i le lototele ma le naunautai ma le tuuto amiolelei na i ai i e laiti ma e matutua—aemaise lava i e laiti i le tulaga lenei. Na tusia e Elizabeth Claridge McCune e uiga i le valaauga a lona tamē e nofoia Muddy:

“E leai se nofoaga i le lalolagi e sili ona pele ia te au i le sefululima o o'u tausaga e pei [o le nuu] pele o Nifae tuai [i le Itumalo o Iuta Juab]. Matou te tulimatai atu ma le naunautai i asi-asiga faavaitaimi a Peresitene Polika Iaga ma lana vaega! . . .

“ . . . O Bro. Brigham, Bro. Kimball ma Wells ma la [latou] vaega uma sa tulioso mai i fafo o a latou taavale solofanua, savavali atu i auala o togalaau fua . . . e agai atu i o matou aiga, [lea] na saunia ai ma faia ai le taumafataga o le afiafi. . . .

“Sa matou auai uma i le sauniga i le aoauli o le [Aso Sa], o teineiti sa ofu papae sa faaavanoa o latou nofoaga i le pito i luma. Sa mananaia ia lauga, ma sa matou fiala seia oo ina

faasilasila mai e Peresitene Iaga e i ai ni nai igoa e faalau mai, o alii na valaauina ma palotaina e avea o ni faifeautalai e o atu e nofoia . . . ia ‘Muddy.’ Na toeitiiti lava lē tata fatu o i latou uma na auai. O le toatele o o matou tagata na valaauina e o e nofoia le itumalo o Dixie—ae o Muddy, e matuai

ae o i saute mo sina taimi ona toe o mai ai lea. Peitai na iloa e tamā e le o le ituaiga misiona lea na valaauina ai o ia. ‘E tataua ona faatau ese atu mea uma ua ia te a'u,’ o lana tala lea, ‘ma ave a'u tupe e fesoasoani e fausia se isi nofoaga naumati e avea ma Siona.’”³



mamao ese lava i saute! ma e sili atu le leaga! auoi! auoi! Ou te le'i faalogo i se isi lava igoa na o 'Samuelu Claridge.' Ona ou tagi masusu ai lea, e ui lava ina faaleagaina e ou loimata [lo'u] ofu paepae fou. Na valaauina foi le tamā o le teineitiiti lea sa nofo i o'u autafa. Fai mai la'u soa, 'Aisea, e te tagi ai? Ou te le o tagi a'u ia. Ou te iloa e le alu lo'u tamā.' 'Ia, e i ai le eseese,' o la'u tala lea. 'Ou te iloa e alu lo'u tamā ma e leai ma se mea e mafai ona taofia o ia, ma e le ta'ua o ia o so'u tamā pe a le alu ae ua valaauina o ia.' Ona ou toe tagi masusu ai lea. . . .

“Ona faatoa matou siitia atu lava i se fale fou ma sa matou [matua] lagolelei lava, o lea na taumafai ai le toatele o a matou uo e tauanau ia tamā e tuu lona fale ma le faatoaga;

O le fatu lea o lo tatou talitonuga maumaututu e le gata i le tataua ona agai i luma o le galuega, ae e mafai foi ma o le a, ma e tataua lava ona agai i luma. Ou te le iloa pe na mafai faapefea ona tuua e tina ma tamā na pepe i na tuugamau le tumau i laufanua valevalenoa ma, toe tepa tasi atu i tua, ma fetagisi ao agai atu i Siona.

Faatuatua i le Galuega

O le a se mea na fafagaina ma o loo tausia ai nei le faamaoni ma le tuuto na maua i lenei tamaitai e 15 tausaga le matua ma le aiga lea na ia fanau mai ai? O le a se mea na mafua ai ona ia liliu atu i lana uo e le tau laitiiti lona lototoa ma faapea atu, “Ou te iloa e alu lo’u tamā ma e leai ma se mea e mafai ona taofia o ia”? O fea e sau ai lena ituaiga naunautai lea e mafai ai ona ia fai atu, “Ma e le ta’ua o ia o so’u tamā pe a le alu ae ua valaauina o ia”?

Ae faapefea na tamaiti laiti e toatolu lea na tilotilo atu i le mou atu o o latou matua i se taavaletoso i le faatau-siusiuga o le papa i le Vaitafe o Colorado, ae sa talitonu lava i faatonuga na tuuina atu e lo latou tina ia i latou? Sa latou nonofo ai iina ma le lototetele, ma le naunautai e aua nei minoi pe fetagisi e ui atonu o se mea sa latou matuai fefefe ai.

O a ni mea ua tatou vaaia i nei faataitaiga o paionia faamaoni? Pe o mea ea ia ua tatou vaaia mai le tele o tisi-penisione ma e mautinoa lava e oo mai i lenei tisipenisione. O loo tatou vaaia mea na tatou vaai i ai ina ua sosola ese le Au Paia mai Niu Ioka ma Penisilevania ma Ohaio ma Misuri ona toe sosola ese lea mai Navu lea na pele ae sopoia se vaitafe aisa ma le malumalu lea sa le’i umi ae mu a’e. O mea ia na tatou vaai i ai ina ua tanuina e na lava tagata o latou tagata maliliu i ni aofaiga tetele i Winter Quarters, ma sosoo ai ma le tuua o tuugamau tuulafoaia, o nisi taimi e pei lava le laitiiti o se pusa e tuu ai falaoa, i Wyoming e lata i Chimney Rock po o se tasi o le tele o magaala felavasai o le Vaitafe o Sweetwater po o se auvai aisā i Martin Cove.

O le mea na tatou vaai i ai i na aso ma mea ua tatou vaai ai nei i tagata faamanuiaina o le Au Paia i le lalolagi atoa, o le faatuatua lea i le Atua, faatuatua i le Alii o Iesu Keriso, faatuatua i le Perofeta o Iosefa Samita, faatuatua i le moni o lenei galuega ma le moni o lana savali. O le faatuatua lea na aveina atu ai se alii talavou i le vao paia e tatalo ai, ma o le faatuatua foi na mafai ai ona ia tu i luga mai ona tulivae, tuu atu o ia lava i aao o le Atua mo le Toefuataiga o le talalelei, ma iu ai lava ina savali atu i lona lava maliufasia toeitiiti lava atoa le luasefulufa tausaga mulimuli ane.

E le o se mea e ofo ai le i ai lava pea ma o le a tumau ai pea ona avea le faatuatua ma mataupu faavae muamua ma tumau o le talalelei ma la tatou galuega. O le fatu lea o la tatou tautinoga e le gata i le tataua ona agai i luma o le

O le mea na tatou vaai i ai i paionia ma mea ua tatou vaai ai nei i tagata faamanuiaina o le Au Paia i le lalolagi atoa o le faatuatua lea i le Atua, faatuatua i le Alii o Iesu Keriso, faatuatua i le Perofeta o Iosefa Samita, faatuatua i le moni o lenei galuega ma le moni o lana savali.

galuega, ae e mafai foi ma o le a, ma e tatau lava ona agai i luma.

Ou te le iloa pe na mafai faapefea ona tuua e tina ma tamā na pepe i na tuugamau le tumau i laufanua valevalenoa ma, toe tepa tasi atu i tua, ma fetagisi ao agai atu i Siona. Ou te le iloa pe na faapefea e se tamaitai e pei o Belle Samita ona tuu lana fanau i le faatausiusiuga o le pupū ae taofiofi lana taavaletoso i le tifato matautia. Ou te le iloa foi pe na faapefea ona faatau atu e Samuelu Claridge ana mea uma ae agai atu e fausia Siona i le Misiona le ainā o Muddy. O le uunaiga malosi autu o na tala o le faatuatua lea—malosi e pei o se maa, toe faafouina e pei o se uamea, faatumulia i mea na tutupu, ma le fusia faaleagaga i le faatuatua e faapea, o le Ekalesia lava lenei ma le malo o le Atua ma afai e valaauina oe, e te alu.

O Se Valaau mo le Talitonuga Maumaututu

O loo i ai lava pea ni “nofoaga le ainā i Siona” e tatau ona fausia, ma o nisi o na nofoaga e sili ona latalata atu nai lo Misiona a Muddy po o San Juan. O nisi o loo i totonu lava o o tatou loto ma totonu o tatou lava aiga.

Ma o lea ou te tuuina atu ai se valaau o le talitonuga maumaututu, e tatau ia i tatou uma ona i ai se mu i totonu o o tatou loto, o le galuega lenei a le Atua ma e manaomia ai le mea sili tatou te tuuina atu i le tau-mafaiga. O la’u talosaga ia e fafagaina lou lava malosi faaletino ma le faaleagaga ina ia i ai sau faatanoa loloto o le faatuatua e faalagolago i ai pe a oo mai ni galuega po o ni luitau po o ni poloai o soo se ituaiga. Ia tatalo atili, suesue atili, taofia le pisapisao ma tuu i lalo le feei, ia fiafia i le siosiomaga, tatalo mo se faaaliga patino,

saili lou agaga, ma saili le lagi mo le molimau lea na taitaiina o tatou matua paionia. Ma, pe a manaomia ona e aapa atu i totonu i se loloto teisi ma se mamao teisi e fetaiai ai ma le olaga ma faia lau galuega, o le a e mautinoa o loo i ai se mea e i lalo iina e faalagolago i ai.

A i ai lou lava faatuatua, ua e saunia e faamanuia lou aiga. O le faailoga e tasi e sili ona malosi o le toaga ma auaunaga, o le tuuto ma le faamaoni i lenei Ekalesia e faaauau pea ona i ai, o sootaga malolosi faaleaiga. Ou te fai atu lenei mea, ma le iloa lelei, o le vaega o le malualii o lenei Ekalesia o loo i ai lea i le *tagata lava ia* o le ekalesia. O nisi o taimi o lenei tagata o se tagata fou liliu mai; o nisi taimi o lenei tagata o le tagata e toatasi o le Au Paia o Aso e Gata Ai i totonu o le aiga. E i ai se nofoaga ma se tagata e toatasi na totonu le tagavai o le faatuatua ma amatatia se augatupulaga fou i le talalelei. Ae o le mea moni lava, o le faatuatua e sili atu ona faafaileleina lelei ma sili atu ona puipuia ma umi atu pe a i ai atoa le aiga e faamalositia. O lea la pe a uma ona e tu toatasi pe afai e tatau ai, ia galue ma le filiga ina ia mautinoa e le o tutu toatasi isi o lou aiga. Atiina ae lou aiga ma ia mautinoa o malosi le faatuatua iina.

A ausia lenei vaega, e mafai ona tatou auauna atu i le Ekalesia i nofoaga e latalata atu po o se nofoaga e mamao pe a valaauina ai. Ma o le a mafai foi ona tatou saili le mamoe lenei na leiloa—tagata o le ekalesia pe le o se tagata foi o le ekalesia, soifua pe ua maliu. E mafai ona faia ma le poto ma le lelei lenei tulaga pe afai ua saogalemu isi mamoe e 99, e aofia ai ma a tatou lava tamai lafu, ao tatou sailiili. Afai na tatou alolofa ma

aoaoina i latou i le aiga, o le a malamalama tonu lava i latou e pei ona faia e Elizabeth Claridge laitiiti: pe a oo mai le valaau, o le a e mautinoa o le a o lou tamā ma lou tina, ou tuagane ma uso.

E i ai galuega e tatau ona fai. E le mafai ona tatou faapea atu, ua loloto faatuatua o o tatou tuaoi uma taitoatasi, ua tofua uma lava tagata ma se aiga malosi, ma ua faalogo uma tagata e lata mai ma mamao i le savali o le talalelei, ma avea ma se tagata o le Au Paia o Aso e Gata Ai ua talitonu, aoaoina, ma toaga i le malumalu. Ua faateteleina le amioleaga i le lalolagi, ma o le a tofotofoina i tatou i le lumanai. Ae o le a manumalo pea ia autau o le amiotonu pe a i ai pea ni tagata e pei o Stanford ma Arabella Samita, ma ni tagata e pei o Samuelu Claridge ma lona afafine lototele o Elizabeth.

E tatau ona tatou faatuatua i lenei galuega—faatuatua i mea ua valaauina ai tagata talitonu uma e fai, faatuatua i le Alii o Iesu Keriso ma lo tatou Tama o i le Lagi. E tatau ona ogatasi o tatou manao ma o Laua [finagalo] ona avea moni lea o lenei manao ma se mea mausali ma se paionia malosi. Pe a tatou faia lenei tulaga, o le a tatou saogalemu ma malupuipuia i le savaliga le mataofiofia agai luma a le Ekalesia ma le malo o le Atua i le fogaeleele. ■


Mai se lauga na faasalalauina o le konafesi a le siteki faarisoni i le aso 12 o Setema, 2010, i le Iunivesite o Polika Iaga.

FAAMATALAGA

1. I le Milton R. Hunter, *Brigham Young the Colonizer* (1973), 47.
2. Tagai i le David E. Miller, *Hole-in-the-Rock: An Epic in the Colonization of the Great American West* (1959), 101–18; faaopoopo le faamamafa ma ua faalaugatasia ia faailoga.
3. Elizabeth Claridge McCune, i le Susa Young Gates, “Biographical Sketches,” *Young Woman’s Journal*, Iulai 1898, 292, 293; ua faalaugatasia faailoga.



**Saunia e
Barbara Thompson**
Fesoasoani Lona Lua i le Au
Peresitene Aoao o le Aualofa



“Faapei ona Ou Alofa Atu ia te Outou”

*O le alofa ma le auauna
atu o mea ia e iloa ai o
tatou o soo o Keriso.*

Sa i ai sa’u uo sa ma potu ma o se tagata lelei tele, peitai e toeitiiti lava o mea uma sa ou faia na foliga mai e le fialia ai. Sa ou mafaufau, “E faapefea ona ou faaitaina o ia? O au o se tagata e faigofie tele. E sao?”

Ona sa le fialia o ia ia te au, o lea sa ou faaaogaina ai lena mea e fai ma se ‘alofaga ou te le alofa ai foi ia te ia. O le mea na lelei ai, sa ou toe manatua le fautuaga na tuuina mai e se epikopo i le taimi o se sauniga faamanatuga ao ou i ai i le kolisi. Ou te manatua lelei lava lana fautuaga: “Afai e le tele sou alofa i se tasi, masalo e le’i lava lau auaunaga i lena tagata. Afai e te auauna atu i se tagata, o le a e alofa i lena tagata.”

Ina ua uma ona ou mafaufau i le fautuaga a lo’u epikopo, sa ou filifili loa e tatau ona ou auauna atu i lenei tamaitai ma te potu faatasi ma tofotofoto foi i le fautuaga a le epikopo. Sa amata ona ou sailia ni auala laiti e fesoasoani ai i la’u uo, faaali atu

le agalelei ia te ia, ma tali atu i mea na te manaomia ma moomia.

Ona tupu faafuasei ai lea o se vavega! Sa ou iloaia sa ou alofa moni lava ia te ia. O ia o se tagata lelei, ma talenia. O se faamanuiaga mo au le ma potu faatasi. Sa ou ofo i le vave ona suia o o’u manatu e uiga ia te ia i se taimi puupuu lava.

Alofa ma Auauna Atu i Isi

Pe a tatou suesueina le Ioane 13, tatou te iloa ai o nisi o lesone sili ona taua na aoao mai e le Faaola i le taimi o Lana galuega talai i le lalolagi, e aofia ai le:

1. Auauna atu o le tasi i le isi.
2. Alofa o le tasi i le isi.

A o faatasitasi le Faaola ma Ana Aposetolo e faamamalu le tausamiga o le Paseka, sa lagonaina le filemu i totonu o le potu. Sa silafia e le Faaola e le o toe mamao ae ofoina atu o Ia ma faasatauroina. Ou te mautinoa e tusa pe sa le’i malamalama le au

Na finagalo Iesu i le Toasefululua— faapea foi i tatou taitoatasi—ia iloa o le lotomaulalo ma le auuauna atu o ni uiga tauaoga-ina ia e tatau ona tatou saili ina ia maua. Na la aoao mai e leai se tasi e sili atu lona taua e le mafai ai ona auuauna atu i isi.



Aposetolo i lene taimi i le taua o mea na tutupu i lene po, ae o le a le toe mamao ae o latou iloa ma malamalama atili i le misiona a le Faaola.

Ina ua maea le tausamiga na ave e Iesu se solo, sasaa ni vai i totonu o se pesini, ma mulumulu ai vae o alii uma sa i ai. O le mulumuluina o vae sa faia i se tulaga o le migao ma le lotomaulalo, e pei ona taulimaina ma le le masalosalo e le Faaola ia lagona o le faanoanoa mo mea

o le a le toe mamao ona faaalua lea, e aofia ai ma le faalataina o Ia lea o loo faamalumu mai.

Sa iloa e Peteru o Iesu o le Mesia ma le Faaola na folafola mai, o lea sa manao ai e auuauna atu i le Alii nai lo le auuauna atu o le Alii ia te ia. “Afai ou te le mulumulu ia te oe,” na fetalai atu ai le Faaola, “e leai sou tofi faatasi ma a’u” (Ioane 13:8). Ona taliaina ai lea ma le fiafia e Peteru le auuaunaga alofa a le Faaola.

O IESU O LOO MULUMULUINA VAE O APOSETOLO, SAUNIA E DEL PARSON © IRI

Mulimuli ane, na faamalamalama ai e Iesu:

“Tou te ta’ua mai a’u, o le Aoao ma le Alii: ua lelei foi la outou e fai mai na; aua o a’u lava lea.

“O lenei, afai o a’u le Alii, ma le Aoao, ua ou mulumuluina o outou vae; e tataua ona outou femulumuluai o outou vae.

“Aua ua ou avatu le faaaoao ia te outou, e pei ona ou faia ia te outou, ia faapea lava e outou ona fai” (Ioane 13:13–15).

Na finagalo Iesu i le Toasefulu-lua—faapea foi i tatou taitoatasi—ia iloa o le lotomauualalo ma le auauna atu o ni uiga tauaogaina ia e tataua ona tatou saili ina ia maua. Na Ia aoao mai e leai se tasi e sili atu lona taua e auauna atu i isi. O le mea moni lava, o se tasi o mea e avea ai i tatou ma tagata maoae o lo tatou naunautai lea e auauna atu ma tuuina atu i tatou lava. E pei ona fetalai mai le Faaola, “A o le sili ia te outou e fai lea ma a outou auauna” (Mataio 23:11; tagai foi i le Luka 22:26).

Mulimuli i Faataitaiga a le Faaola

O lenei mea e toe manatua ai le auaunaga na faatino ina ua mavae nisi o mala faalenatura na tutupu i masina ma tausaga ua mavae. Sa tatou molimauina ni afa, mafuie, oge, ma faama’i. E tele tala i tagata, e ui ina mafatia foi i latou lava, ae sa latou tausia lava isi o e na manua, mama’i, pe na manaomia le fesoasoani.

Ina ua maea se mafuie i Peru lea na faataumaoia ai fale o le faitau fia o tagata, sa tuua ai e se epikopo ia mea na faaleagaina o lona lava fale ae faatopetope atu ina ia faitauina tagata o lana uarota ma faamanuia ma

faamafanafana i lana tamai lafu.

A o faavauvau se tina i Haiti i le maliliu o tagata o lona lava aiga ina ua mavae se mafuie, sa aapa atu pea o ia e fesoasoani e faatoafilemu ia popolega ma faamalulu i loto nuti-momoia o isi, ma faamalosiau atu i tagata na faasaoia ma fesoasoani ia i latou ia maua ni meaai ma ni malutaga.

Na faatalise atu le autalavou matutua a Chile e fesoasoani i le tufaina o meaai ma sapalai ia i latou na sili ona afaina i le mafuie iina. A o auauna atu nei tagata o le au paia, na nana e o latou foliga fiala ma lima naunautai le tulaga moni o le le mautu o o latou foi tulaga patino.

Na mulimuli uma lava nei tagata ma le toatele o isi i le augani mai a le Faaola “e pei ona ou faia ia te outou, ia faapea lava e outou ona fai” (Ioane 13:15). Mulimuli ane i le Ioane mataupu e 13 tatou te faitau ai:

“O le poloaiga fou ou te tuu atu ai ia te outou, Ia outou fealofani; faapei ona ou alofa atu ia te outou, ia fealofani foi outou.

“O le mea lea e iloa ai e tagata uma lava o o’u soo outou, pe afai ua outou fealofani” (fuaiupu 34–35).

Pe na outou matauina le tele o taimi e faailoa mai ai e taitai o le Ekalesia—mai ia Peresitene Thomas S. Monson i Aposetolo e Toasefulu-lua i au peresitene o le lotoifale, au epikopo, ma faiaoga—lo latou alolofa mo i latou o loo latou auauna atu i ai? O lenei alofa e oo mai i le mulimuli i faataitaiga a le Faaola.

O le auauna atu i isi o le auala lea tatou te faaalua ai lo tatou alolofa ia i latou. Atonu o le alofa ma le auauna atu e tasi ma e tutusa. E moni, o mea ia e iloa ai o i tatou o soo o Keriso. ■



FAASAFUA ATU LE ALOFA FAA-KERISO

“Ia tatou alolofa atu i taimi uma lava. Ma ia tatou i ai faapitoa iina mo o tatou tuagane ma uso i taimi o mafatiaga. . . .

“Ao aapa atu o tatou lima ma loto i le alofa faa-Keriso i isi, e faapea ona tupu ai se mea matagofie ia i tatou. E faamaloloina, ma sili atu ona faaleleia, ma malolosi atu o tatou lava agaga. E sili atu ona tatou fiala, sili atu ona toafilemu, ma sili atu ona mataala ma iloa musumusuga a le Agaga Paia.”

Peresitene Dieter F. Uchtdorf, Fesoasoani Lona Lua i le Au Peresitene Sili, “O Outou o O’u Lima,” *Liahona*, Me 2010, 70, 75.





O Nelson Coila (agavale) o loo faaopoopoina se vaega fou o vao ofe o le totora i Utama, le motu opeopea o loo nofoia e ia ma lona aiga (luga) i le Vaituloto o Titicaca.

MOTU O LE FAATUATUA: O SE TALA I LE MAELEGA

E na o le faaopoopo pea i lo latou motu e mafai ai ona le magoto le aiga o Coila.

Saunia e Adam C. Olson Mekasini a le Ekalesia

Enonofo Nelson ma Dora Coila i se motu—e le o se motu masani e fausia i ni papa malolosi e tulioso a’e mai le vasa po o le vaituloto—ae o se tamai motu na faia lava e i latou mai i ni vao ofe opeopea i le Vaituloto o Titicaca i Peru.

O le fausiaina o se motu ma fai ma ou aiga e manaomia ai le faatua-tua. Pe tusa na o le fa futu (1.2 m) o faaputuga vao ofe o loo taofiofia ai lo latou aiga ma isi faleoo pe sefululua o le latou motu i luga a’e o le

50-tikeri (10 °C) o le vai, ma o loo faaauau pea ona lamatia e elemene le faasalalauina o lo latou motu.

Ae mo Nelson ma Dora, o lo latou motu o le faatusa faaletino lea o mea o loo latou taumafai e fausia faale-agaga mo lo latou aiga: o se motu o le faatuatua e pipii faatasi e tetee atu i le lalolagi.

O le mea ua latou aoaoina mai lenei faiga, o le faatuatua e fausia ai e tatau lava ona sosoo ma le maelega e vaai ma tausia ai.

O MOTU OPEOPEA O TAGATA URO

O Utama o se tasi lea o le tusa ma le 50 o nuu o motu opeopea lea e avea ma aiga i le fia selau o tagata na tupuga mai i tagata Uro, o ni tagata na taua muamua o Incan lea na nonofo i ia ituaiga motu mo le fia selau o tausaga.

E masani lava, o aiga toatele, e tele lava ina aiga le tasi i le isi, e nonofo i se motu e tasi ma galulue faatasi i le tausiga o le motu. O le isi aiga e nonofo faatasi ma le au Coila i le afa o le motu o Utama.

O le motu pito i tele e nonofo ai le toatele e tusa ma le 10 o aiga. E nonoa faamatagataga ia motu i se maea umi lava e taula i le taele o le vai, e ui o le 2010, na faamalolosia ai ia taula ina ua mavae se savili malosi e le masani ai, lea na motusi ai le silia ma le 40 o motu mai o latou nofoaga ma lelea ese atu ai i le tele o maila.



O Le Mafuaaga mo le Faifai Pea

Mo tagata Uro, o e na fausia ma nonofo i luga o nei motu mo le tele o augatupulaga, na avea vao ofe o le totora ma se vaega taua o le olaga i aso uma. O vao ofe, lea e ola i le vaega papau o le Vaituloto o Titicaca, e mafai ona faaaoga o ni fafie mo afi e tafu ai meaai. E mafai ona aina ona a'a. E mafai ona faaaoga lona pa'u mo togafitiga faafomai. Ma, ioe, e toeitiiti lava o mea uma e fai i le vao ofe: o o latou fale, o latou vaa masani, o latou olo, o motu lava foi ia, e oo lava ia latou ato lapisi.

E fausia e tagata Uro ia motu e ala i le fatuina o lea vaega vao ofe i luga o le isi vaega vao ofe. Ae a oo loa i mea e faaaoga mo le fausia o fale, e le umi le aoga o vao ofe o le totora.

E mamago uma i le la i le taimi o le taumatutu. O le susū i le tau timuga e vave ai ona pala. Ma o vaega pito i lalo ia e susu i le vai, e faifaimalie lava ona palagia. O le faaauau pea ona faaleagaina o le motu a le au Coila o lona uiga e tatau lava ia Nelson ona faataatia se fola fou o vao ofe i le tai 10 i le 15 aso.

“O le fausiaina o le motu ua na o le amataga lea,” o lana tala lea. “Afai ou te le faaopoopoina ni vao ofe, o le a taapeape malie le motu. Ae o le tele o vaega ou te faaopoopoina, o le malosi atili foi lea o le motu i le aluga o taimi.”

O Le Matautia o le Faatuai

O le faaopoopoina o se vaega o vao ofe e le lavelave pe faigata, ae o se galuega. O le a faigofie lava ona faatuai lona faiga.

Ae peitai, o le faatuai e faateleina ai le lamatia o se tagata o le aiga e tu

i se vaega vaivai o le fola ma iu ai i totonu o le vai malulu. O lena mea e mafai ona avea ma sina faasoesa laitiiti i tagata matutua, ae o se tulaga lamatia lea mo tamaiti laiti e pei o Emerson, le tamaitiiti e lua tausaga a le au Coila.

O lea e faaopoopo ai e Nelson se vaega o vao ofe i le asō, ma le iloaina o loo faamoemoe i ai le saogalemu o tagata uma o le aiga i le aso a taeao.

O se lesonea e uiga i le maelega lea ua faia ai se eseese i olaga o le au Coila.

O Aafiaga o le Maelega

O Le Maelega o le faaauau pea lea ona fai o se mea e ui lava i mea faa-feagai.¹ Na iloa muamua lava e Dora le taua—ma le faigata—o le maelega ina ua uma ona papatisoina o ia i le 1998.

Ina ua 17 tausaga o Dora, sa papatisoina i laua ma lona uso laitiiti o Alicia—lea sa fesoasoani i le tuputupu

Mo le aiga o Coila—Nelson, Dora, ma Emerson—ma tagata Uro o loo nonofo i le Vaituloto o Titicaca, e taua vao ofe o le totora e tauti ai le olaga. Ae e pei lava o mataupu faavae o le talalelei, e tatau ona faaaoga soo.





O LE FAAMALOSIA PEA O LE FAATUATUA

“E tusa lava pe o le a le tele o lo tatou faatuatua i le taimi nei e usitai ai i le Atua, e manaomia pea ona tatou faamalasia atili ma faafouina pea e le aunoa. . . . O le aoao ina ia vave amata ma ia tumau ai, o ki ia i sauniuniga faaleagaga. O le faatuai ma le femoumouai o ona fili ia i le olaga nei.”

Peresitene Henry B. Eyring, Fesoasoani Muamua i le Au Peresitene Sili, “Sauniuniga Faaleagaga: Ia Vave Amata ma Ia Tumau Ai,” *Liahona*, Nov. 2005, 38.



AIGA FAAMAONI

“Sa matua faaloto-maulaloina au iina i na motu opeopea o le Vaituloto o

Titicaca, na talosaga mai ai ia te au nei aiga faatuatua o le Au Paia o Aso e Gata Ai, ou te tatalo mo le tamai motu o Apu Inti ma ole atu i le Alii e faamanuia [o latou] fale ma aiga.”

Elder Ronald A. Rasband o le Au Peresitene o Fitugafulu, “O Aafiaga Faapitoa,” *Liahona*, Me 2008, 12.

Ina ia aoao atili e uiga i le asiasiga a Elder Rasband i motu o tagata Uro, alu i le conference.lds.org ma saili lana lauga mai le konafesi aoao ia Aperila 2008.

Ina ia maimoaina nisi ata mai lenei tala, asiasi i le liahona.lds.org.

ae o le Ekalesia i motu o Uro. Peitai, pe a ma se masina mulimuli ane, na faasaina ai i laua e lo la tamā ona toe aafia i se mea e uiga i le Ekalesia.

Ae na ese lava se mea na tupu i teineiti. Sa faafuasei ona le manaia se mea la te i ai, ma foliga e pei o le a la feupuai. Na iloa e lo la tamā i le taimi sa la auai ai i gaoioiga a le Ekalesia, sa lelei suiga na la faia.

“Sa suia ai lona mafaufau,” o le tala lea a Dora. “Sa amata ona ia fafagu po i maua ina ia mautinoa ma te le tuai i le lotu.”

Na mafaufau Dora o suiga na faia e le talalelei i o laua olaga i mea laiti na la faia sooa ma Alicia, e pei o le totogiina o le sefuluai, tatalo, suesue i tusitusiga paia, tausia le paia o le aso Sapati, ma le faafouina o a laua feagaiga i vaiaso uma e ala i le aai ma feinu i le faamanatuga.

Mulimuli ane, o lona vaaia e ia lava o suiga na oo mai ona o le faatuatua ma le maelega,² na auai atu ai loa le tamā o Dora i le Ekalesia faatasi ai ma le aiga atoa.

O Tai o le Maelega

O le tumau pea i le faia o le mea sao—e ui i mea faafeagai—e manaomia mai i le nuu o le feagaiga a le Alii. Ae ui i lea, ua folafola mai e le Alii ia faamanuiaga sili ia i latou o e maelega i le tatalo,³ i le tausia o polo-aiga,⁴ i le usitaia o faaaliga,⁵ i le suesueina o tusitusiga paia,⁶ ma galulue ai i Lana galuega.⁷

E ala mai i aafiaga a le au Coila i le vaaiga ma le tausiga o lo latou motu o le faatuatua i lona tulaga moni ma le faatusatusa, ua latou iloa ai e moni lava tau i o le maelega. “O nisi taimi e taofia ai i matou e mea masani o aso taitasi, o galuega, kuka, ma isi lava mea,” o le tala lea a Nelson. “A galo ia i matou le Atua, ona faigata lea o mea. E tele atu ia faafitauli, ma e amata ona o eseese mea.”

Na tu Nelson e faasino atu i se vaega fou o ofe na ia tuuina i lalo i



lena taeao. “Pe a matou faia pea lava pea,” o lana tala lea, “pe a matou tatalo, suesue, anapogi, ma faia soo ia afiati faaleaiga, o le a sili atu ona matou malolosi.” ■

FAAMATALAGA

1. Tagai i le *Merriam-Webster's Collegiate Dictionary*, lomiga lona 11 (2003), “diligence”; tagai foi i le “persevere.”
2. Tagai i le Alema 32: 41–43.
3. Tagai i le 1 Nifae 2:18–19; 10:17–19; Enosa 1:12.
4. Tagai i le 1 Nifae 15:8–11; 16:28–29; Enosa 1:10; Mosaea 1:11; 4:6.
5. Tagai i le Mosaea 1:16; Alema 12:9–11.
6. Tagai i le Mosaea 1:6–7; Alema 17:2.
7. Tagai i le Iakopo 1:19; 5:75; Moronae 9:6.



TAMAITI

Sa Le Popole i le Vai

O Iosefa o le Motu o Apu Inti, Vaituloto o Titicaca, Peru

Saunia e Adam C. Olson Mekasini a le Ekalesia

Sa ola ae Iosefa e fitu tausaga le matua i nofoaga e siomia i vai. Pe faapea foi, sa ola ae o ia—o siosiomia e vai malulu o le Vaituloto o Titicaca i Peru. O le mea lena e tupu pe a e ola ae i se tamai motu e fausia i ni vao ofe opeopea.

O Iosefa ma lona aiga o se vaega o tagata Uro, o e na fausia ma ola ae i motu opeopea i le Vaituloto o Titicaca mo le faitau selau o tausaga. Latou te fagogota i le vaituloto. Latou te taele i le vaituloto. Latou te aloalo atu i le isi itu o le vaituloto e o ai i lea motu ma lea motu.

Atonu e te manatu, ona ua masani Iosefa i le vai, o le a le popole ai i lona tu i totonu o le vai papatisoga i ni nai masina o le a papatiso ai. Ae e tutusa lelei lava ona lagona ma le toatele o isi foi tamaiti.

“Ua ou fiafia lava,” o lana tala lea. “Ae ou te popole i le alu i lalo o le vai.”

I le siomia ai o i latou i vai, ua aoaoina ai tamaiti Uro ina ia faateete i le vai. O lea la ina ua uma ona tau atu e Iosefa i ona matua lona popolega, sa talanoa ai loa le aiga i le papatisoga i le taimi o le afiafi faaleaiga, ma faataitai ai e Iosefa ma lona tamā le auala e fai ai.

“O le a papatisoina a’u e lo’u tamā,” o le tala lea a Iosefa. “Sa ia fesoasoani ia te a’u ia aua ne’i o’u fefe.”

Ua sauniuni nei ma le filiga Iosefa mo lona papatisoga. O loo ia taumafai malosi lava e faalogo lelei i le taimi o le Peraimeri ma aoaoina ia Mataupu Faavae o le Faatuatua. Na te iloa o le a fesoasoani lea ia te ia i le taimi nei ma le lumanai.

“O le a ou alu i se misiona,” o lana tala lea. “E pei ona fai mai Nifae, ou te alu atu ma fai ia mea ua poloaiina ai e le Alii” (tagai i le 1 Nifae 3:7). ■



O NISI O MEA E FIAFIA I AI IOSEFA

- O le tala ia Nifae i le aumaiga o papatusi apamemea (tagai i le 1 Nifae 3–4).
- O le mataupu faavae lona sefulu o le faatuatua.
- O loo taaalo ma lona tuafafine ma ona tei (luga), lea na te valaaua o lona uso ma lona tuafafine.
- O loo ‘ai a latou i’a falai ma pateta.
- Tausia o lana tamai mamoe.



PUIPUIA O LA'U SUESUEGA— MA LE TUSI A MAMONA

Ao avea a'u ma se tagata aoga i le iunivesite, o le polokalama maua luga sa ou lesitala ai na manaomia ai tagata aoga e tusi se suesuega. O suesuega a tagata aoga taitoaitasi sa tatau ona vaavaaia ma faamaonia e ni polofesa se toalua.

Mo la'u suesuega na ou filifili ai e suesue ma sailiili i tala o taua i totonu

o le Tusi a Mamona. Sa ma talanoa ma se tasi o polofesa e uiga i lo'u manatu, ma na ioe o ia e avea ma se tasi o a'u supavaisa. Sa na fautuaina mai foi se isi polofesa e ono avea ma se supavaisa faaolioli lona lua.

I le taimi lava lena, sa osofaia ai a'u e le polofesa i ni faamatalaga malolos—e le faatatau i la'u suesuega ae o le Tusi a Mamona. I le to'a na ou mafaia ai, na ou tuuina atu ai la'u molimau e uiga i le Tusi a Mamona.

Sa ma feiloai ma le polofesa lona lua e faamatala i ai le autu o la'u suesuega. O le taimi lava na ou ta'ua ai le Tusi a Mamona, na suia ai ona uiga ma amata ona ia faitio i le Ekalesia. Sa ou faalogologo ma le filemu se'i uma ana faamatalaga ona ou faamalamalama puupuu atu lea i ai, ou te iloa e le malamalama o ia i o tatou talitonuga. E le'i foliga mai na talitonu o ia, ae na ou te'i i lona ioe mai e na te taitaia la'u suesuega.

Ina ua uma le toetoe o se tausaga atoa o sailiiliga ma tusitusiga, sa ou tuuina atu loa la'u suesuega mo le faamaoniga a faiaoga. I le aluga o



lena tausaga, sa taliaina ai a'u i le aoga faaloia, ma sa manaomia lo'u faamaeaina o lenei galuega faatino ina ia ou faauu ma agai ai i luma.

E tusa ma se vaiaso ae ou maua se i-meli mai le polofesa lea na faitioina le Ekalesia. Sa fai mai o ia ma te feiloai i lona ofisa.

Ina ua ou taunuu atu, sa fai mai o ia e tapuni le faitotoa ae ou nofo i lalo. I le taimi lava lena, sa ia osofaia ai a'u i ni faamatalaga—e le faatatau i la'u suesuega ae e uiga i le Tusi a Mamona. I le to'a na ou mafaia ai, na ou tuuina atu ai la'u molimau e uiga i le Tusi a Mamona.

Sa ou fesili atu i le polofesa ma le le mautinoa pe o le a ia faamaonia lava la'u suesuega. Na fai mai o ia e leai.

Sa ou alu i le fale ma le lagona faanoanoa ma le le mautonu i se mea a fai. A aunoa ma le faamaoniga a lenei alii, e ono le maua so'u avanoa ou te faauu ai mai le polokalama maua luga ae ou amata i le aoga faaloia. Ae sa ou tatalo pea ina ia lelei mea uma.

Ina ua ou faamatalaina atu lo'u tulaga i le isi polofesa lea na taitaia la'u suesuega, sa ia fautua mai ou te asiasi atu i le polofesa i le aso e sosoo ai ma toe tuu atu i ai se isi avanoa na te faamaonia ai la'u suesuega.

O le taeao na sosoo ai, sa ou faatalitali ai i fafo o le ofisa o le polofesa. Sa ou gatete, ma lē mautonu pe o le a faapei sana tali mai pe a toe vaai mai ia te a'u. Ina ua ia taunuu mai, sa ia tatalaina lemu le faitotoa o lona ofisa, ma geno mai ou te alu atu i totonu. E aunoa ma se upu na fai mai ai, sa ia aumaia ai se peni ma saina la'u suesuega, ma tuuina aloaia mai ai ia te a'u lana faamaoniga. Na te le'i tuuina mai se faamalamalamaga o le mafuaaga

na suia ai lona mafaufau ae na ataata mai ia te au ina ua ou faatofa atu i ai.

Ou te faafetai ona sa ou maua le avanoa e tuuina atu ai la'u molimau i lenei tamalii. Ou te iloa pe a tatou tutu atu mo mea tatou te talitonu i ai, o le a faamalosia ma faamanuia i tatou e le Tama Faalelagi. ■

Scott Macdonald, Kalefonia, ISA

PE A OU TOE FEILOAI I LO'U TUAGANE

Ao o'u laitiiti, sa ou matuai manao lava i lo'u tuagane o Juan Fernando, ia tamoe ma taalo e pei o isi tamaiti. Ina ua ou fesili atu i lo'u tina pe aisea na le mafai ai e lo'u tuagane, ae fai mai o ia na afaina lona faiai i le taimi na fanau ai ona o le le lava o le okesene ma o le a le mafai ai lava ona ia faia na mea.

Sa faaaluina e lo'u tuagane lona olaga atoa i le taoto. Ona sa ou ola ae i le Ekalesia, o lea sa ou malamalama ma talia ai lona tulaga ma iloa le maoae o lona agaga. Ae ui i lea, sa naunau lava lou loto laitiiti ina ia pei o ia o isi, e ui lava ina sa le mafai ona ou vaai faalemafaufau pe o le a faapei le vaai atu ia te ia o savali pe tamoe pe tautala foi.

Sa ou popole po o ai o le a tausia o ia pe afai e maliliu muamua ia tagata uma o le aiga nai lo ia. I a'u tatalo ma lo'u loto sa ou aioi atu ai i le Tama Faalelagi ia aua nei Ona aveina atu muamua i matou nai lo Juan Fernando. Sa ou iloa o le a Ia tali mai ia te au.

Na maliu lo'u tuagane i le 16 o ona

tausaga i se aoauli o le taumalulu, ma tuua ai se avanoa tele i totonu o lo matou aiga. Sa matou lagonaina le faanoanoa ae sa i ai foi le faamoe-moe. Ina ua mavae ni nai aso talu ona maliu o ia, sa ou moe ai a o ou mafaufau ia te ia ma ou faia ai se miti matagofie.

Sa ou savali, ae na puaoa la'u vaaiga i ao. Sa mafai ona ou iloa mamao atu se mea, o lea sa faaauau ai pea ona ou savali lemu atu i ai. A o ou latalata atu i ai, sa ou vaai ai i se taavaletoso e tumu i fugalaau matagofie. Ao o'u sioa atu i ai, sa ou vaaia ai se alii talavou aulelei, na ofu i ni ofu papae, ma o loo tutu i autafa o le taavaletoso. Sa ou tu mo se taimi, ma taumafai e matau atu o ia, ona ou iloa ai lea o lo'u tuagane lea. Sa ou matua fialia lava e vaai atu ia te ia. Sa ia tala-noa mai ia te a'u, ma sa ou manao e opo mai ma sogi atu ia te ia. Ona ou ala ai lea i luga.

Sa ou faafetai lava ona sa ou faalogo i lona leo ma vaai i lona tulaga atoatoa. Tafefe i le taimi o le a matou toe feiloai ai. Ou te mautinoa o le a i ai ni feopoaiga ma ni feasogi ma upu alofa—e faafetaia ai lava le Togiola a Iesu Keriso. O le a toetutu tagata uma mai le tuugamau ma toe faatasia o ni aiga ona o le Faaola, ma o le a le toe tetea ese lava.

Ou te manatuaina upu a Amoleka: “E toe faatasia le agaga ma le tino i lona uiga atoatoa; o ivi atoa ma gaugaivi e toe faatuina i le tino e tatau ai” (Alema 11:43).

Ou te faafetai mo le talalelei toefuataiina a Iesu Keriso, lea e aumaia ai le filemu i lo'u agaga. Ou te iloa o le a ou toe vaai i lo'u tuagane i se aso. ■

María Isabel Parra de Uribe, Mekisiko

O O'U ASO PAIONIA I CALGARY

Sa ou fanau i le 1947 i se tamai nuu i Egelani i matu. Ina ua 15 o'u tausaga, sa faailoa atu a'u i faifeautalai e ni uo, ma ou auai ai i le Ekalesia. Peitai, sa le'i auai lo'u aiga.

A o ou aoao e uiga i paionia anamua o le Ekalesia, sa ou lagona le pei na ou faimamago i le leai o so'u talatuu o tuua na sopoi ia laufanua valevalenoa. Ae a o o'u agaigai pea i luma i le talalelei, na suia o'u lagona.

Sa oo ina ou malamalama, na faavaeina e paionia anamua le ala mo tagata e pei o a'u ou te auai ai i le Ekalesia. O faifeautalai e toalua sa faailoaina mai ia te au le talalelei o ni tagata na tutupu mai i na paionia, o lea la e telē la'u aitalafu i tagata paionia. Sa ou lagona le fesootai atu ia i latou i se auala faapitoa.

Sa ou iloa ai foi e *i ai* so'u talatuu o tagata agaalofo, ma galulue malosi o e na ositaulaga, ma galulue, ma tau foi i ni taua ina ia mafai ona ou maua mea latou te le'i maua ma aumaia ia te a'u le saolotoga lea ua ou fiafia ai i le aso. E le'i auai o'u matua i le Ekalesia, ae na la faafaileleina a'u i ni tulaga faatauaina ma ni aoaoga lelei sa faapea ona saunia ai a'u e talia le talalelei.

Na ou iloaina mulimuli ane, e tele ituaiga paionia. O a'u o se augatupulaga muamua ua auai i le Ekalesia. Sa le'i fiafia lo'u aiga i la'u filifiliga e papatiso, o lea sa faigata ai ia te au ona ou auai i a'u sauniga. Sa taumafai lava si a matou tamai paranesi ona o le lava o tagata, aemaise lava o e umia le perisitua. Mulimuli ane, na

faamaonia ai o le a tapunia le matou paranesi e le misiona.

O se taunuuga la, sa ou filifili loa e siitia atu i Kanata, ma o se tasi lea o faaiuga na sili ona faigata sa ou faia. Na o a'u lava le tama a o'u matua ma sa ou alofa tele ia i laua, e pei foi ona la alofa ia te a'u, ae e ono lamatia la'u molimau pe ana ou nofo ai i se eria lea e le mafai ona auai ai i le lotu. Ou te manatuaina pea le po na ou alu ese ai—na tamoe lo'u tama i autafa o le nofoaafi ma feula mai ni kisi ia te a'u ao tilotilo mai lo'u tina. Na nutimomoia lou loto, ae na ou iloa e tatau ona ou alu ese.

Sa ou taunuu i Calgary, Alberta, i le Aso o Tina ia Me 1967. Sa matou o i le lotu faatasi ma tagata o le ekalesia sa ou nofo ai ma sa ou tagi i le taimi atoa o le sauniga. Ou te manatua lo'u tusia o ni tusi i o'u matua a o tafe ifo o'u loimata, ma ta'u atu ia i laua sa ou fiafia i Kanata ae sa ou matuai misia lava Egelani faapea lo'u aiga.

Sa ou tauivi e faamasani i lo'u olaga fou, ma le mafatia i lou ma'i manatu i lo'u aiga, tuua toatasi, ma faanoanoaga, ae sa ou tumau faamaoni pea i le talalelei. Na ou auai i a'u sauniga uma ma talia valauaga. O o'u aso paionia ia.

Mulimuli ane, sa ou feiloai i lo'u toalua. Sa faamauina i maua i le Malu-malu o Cardston Alberta ma tausia se fanau e toatolu i le Ekalesia.



Ou te manatuaina pea le po na ou alu ese ai—na tamoe lo'u tama i autafa o le nofoaafi ma feula mai ni kisi ia te a'u ao tilotilo mai lo'u tina. Na nutimomoia lou loto, ae na ou iloa e tatau ona ou alu ese.

O taimi uma lava ou te toe foi ai i Egelani, e faatumulia a'u i mea e manatua o lo'u liliuga ma e le mafai ona faagaloina lou agaga faafetai mo o'u faamanuiaga. O fea semanu ou te i ai i le asō pe ana ou le maua le lototele e faia ai se filifiliga faigata ma mulimuli ai i le Agaga?

O le a faavavau ona ou faafetai i paionia anamua i totonu ma fafo atu o le Ekalesia o e na asaina le ala ua mafai ai e a'u faapea foi ma isi e pei o a'u ona faalogo i le talalelei. Na aumaia e i latou o e na muamua atu ia te a'u le avanoa ma le lototele e avea ai ma se paionia faaonapo nei. ■

Lorraine Gilmour, Ontario, Kanata

O AAI E LUA MA SE ALOFA MUTIMUTIVALE

Epei foi o Navu, Ilinoi, o le aai o Natchez, Misisipi, ISA, e tu matilatila i luga o se papa lautele e iloa atu ai le Vaitafe o Misisipi. O tagata anamua o le Au Paia o Aso e Gata Ai e o mai mai Egelani e tele lava ina ui atu i Natchez e agai atu i le mata o le vai mai New Orleans i Navu. O le mea moni, i le 1844 sa susunuina ai e tagata faatupu faalavelave se vaa na taula i Natchez lea sa malaga ai se vaega o tagata o le Au Paia o Aso e Gata Ai.

Ina ua ou taunuu i Natchez e talia se galuega i le Tautua a le U.S. National Park sa ou mafaufau ai i faaletonu ma atuatuvalega. Sa ou tuua mea uma na ou fiafia ma ou masani ai i Iuta, ma ina ua ou nofo i lenei aai fou ou te le masani ai, sa ou lagona le le mautonu ma le tuua toatasi.

I lo'u aso muamua lava o aoaoga faamasani, sa amata e le taitai e vaaia le paka la'u aoaoga i le aveina atu o au i le fale tele o le vaitaimi o le Taua i le Lotoifale ma faataitai mai le ituaiga maimoaga taamilo o le a le toe umi ae ou faatinoina. Na oo atu i le taimi ua maea ai ona ma matamata i le fogafale muamua, ua le mafai ona ou manatuaina

ia faatamatalaga uma. E amata mai i meaafale teuteu ua toe faafou mai Farani e oo atu i ipu omea mai Egelani, o le fale taugata ua faatusaina i ai le manuia o le itu i Saute—na matuai lofituina ai a'u. O le iloa ina ma te le'i oo i le fogafale lua o le fale, na oo mai ai ia te a'u i se lagona o le le fiafia ma le toe fia foi i le aiga.

Ao ma a'ea'e atu i le faasitepu matagofie, sa tosina atu la'u vaai i se atavali suauu o se taulaga. Ou te le'i vaai muamua i ai, ae na i ai se vaaiga masani e uiga i ai. Na tatai atu ou mata i le ata o se fale tele i luga o le papa lautele o le aai, ma sa ou matauina ai le pioga tele lea na faia faataamilo e le vaitafe i le aai. Mata o le mea tonu lea sa o'u mafaufau i ai?


Sa ou fesili po o le atavali o se ata lea o Navu. Sa te'i lo'u supavaisa i

la'u fesili, ma tali mai o lea lava. Sa vave ona ou iloa ina, o le atavali sa faatau mai e se tasi na umia mulimuli le fale, ona sa faapea na valiina i le ogatotonu o le seneturi lona 19 ma o le vaaiga i le vaitafe na talafeagai lelei lava ma le vaaiga i Natchez.

E masalo na lagona e le Au Paia o e na ui atu i Natchez i le ogatotonu o sauaga se lagona maoae o le toomaga ma le agaga faafetai ina ua latou taunuu i Navu. Na faapena foi, ona ou lagonaina le mafanafana ina ua ou vaai i le ata o Navu i le fale tele i Natchez. O lo'u vaaia o le ata na fesoasoani lea ia te ia ou te iloa ai sa silafia e le Tama Faalelagi o'u tulaga ma o le a faamanuiaina au i le malosia e foia ai lo'u misia o lo'u aiga, fefe, ma le le mautonu. Sa ou iloa o le atavali o Navu o se alofa mutimutivale lea o le Alii. ■

Tiffany Taylor Bowles, Ilinoi, ISA

Ao ma a'ea'e atu i le faasitepu matagofie, sa tosina atu la'u vaai i se atavali suauu o se taulaga. Mata o le vaaiga tonu lea na ou mafaufau i ai?



AMATA Minoi LOA

Saunia e Elder Von G. Keetch

Fitugafulu Eria, Eria o Luta Aai o Sate Leki

Na faamatalaina se tala e uiga i ni vaega o tagata e faapauu mai i faamalulele e tape ni afi. O nei alii ma tamaitai totoa latou te tapeina ni mu e ala i le faapauu mai i ni faamalulele i luga a'e o se afi ma tape mai le afi e amata mai luga e agai i lalo, ae o isi e tapeina mai i lalo.

I se tasi la o mu tele lava o le togavao, sa potopoto ai se vaega sili ona lelei o tagata tineimu e faapauu mai faamalulele mo se fonotaga a o le'i o ese atu i a latou vaalele. Na ta'u atu e le avefeau—o se tagata tineimu atamai ma poto masani—i tineimu e faapauu mai faamalulele ua matuai maaleale lava mea uma ma e le mafai ona ia tuuina tonu atu ni faatonuga ia i latou. Nai lo lena, na faatonuina e le avefeau, e tatau i tineimu e faapauu mai faamalulele ona fesootai atu lea o ia i le ualesi i le taimi tonu lava e felelei a'e ai i le tuasivi i luga ae o le afi. Ona ia tuuina atu lea ia i latou o ni faatonuga i le auala e tatau ona latou uia e amata ai ona tape le afi.

Na vave ona o ese atu le au tineimu e faapauu mai i faamalulele i a latou vaalele, ma faapauu ifo i le tuasivi i luga ae o le afi aasa ma faatulaga ai i latou lava mo le faatinoga. Ao latou vaavaai mai i le afi mai luga, na mafai ona latou iloa mai le tele o auala e mafai ona latou oso mai ai e amata la latou galuega.

Ina ia tausia la latou feagaiga ma

O le malolo ai i luga o le tuasivi e ono foliga mai o se auala saogalemu lea e aloese ai mai le faia o mea sese, ae o se auala foi lea e aloese ai mai le alualu i luma.

le avefeau, na aumai ai e le taitai o le vaega se ualesi e uu i le lima, maua le alaleo talafeagai, ma valaau atu i le avefeau e fesili mo ni faatonuga po o le fea le auala e faaoga. Peitai sa na o le gogolo lava o le ualesi; sa le mafai ona latou faalogoina le avefeau.

O le mafaufau ai e faapea ai sa pisi le avefeau i nisi o tiute, o lea na filifili ai le au tineimu e faapauu mai faamalulele e faatali mo le 10 minute ona toe taumafai lea. Ae ina ua latou toe taumafai mo le taimi lona lua e fesootai atu i le avefeau, sa latou maua lava lea tali e tasi—o le leai o se leo ma le gogolo ma leai ni faatonuga.

Sa talatalanoa le au tineimu e faapauu mai i faamalulele. Sa latou iloa atu lava nisi o auala i lalo o le mauga e mafai ona latou maua ai se tulaga lelei e tape ai le afi. Peitai sa latou popole ona latou te le'i maua ni faatonuga mai le avefeau. Sa latou popole nei o latou uia le auala lea e sili ona lelei ia i latou, ae avea ma mea e agai ese ai mai le ala tonu lea e manao le taitai latou te ui ai ma e ono toe fosi i latou e toe foi i tua.

O lea sa latou filifili ai loa e faatalitali i luga o le tuasivi. I le sefululima minute mulimuli ane na latou toe taumafai atu i le avefeau. Sa leai lava se mea. Sa aveese a latou ato faafafa ma saofafai i lalo. O le tolusefulu minute na avea ma itula; o le itula na oo atu i le lua itula. Sa latou taumafai pea e faafesootai le avefeau. Ae e pei lava o le taimi muamua, sa na o le gogolo na latou mauaina.

Sa tonu loa i le au tineimu e fai la latou taumafataga o le aoauli. Ina ua uma lena, ina ua le mafai lava ona latou fesootai atu i le avefeau, ona latou aluluga lea ia latou ato faafafa ma fai si malologa. Sa le fiala i latou. Ana mafai lava ona faalogo mai le avefeau ia i latou ma tau mai le auala latou te uia, semanu ua latou o fiala ma mulimuli i lena auala ma amata a latou taumafaiga o le tapeina o le afi. Peitai na foliga mai ua le ano mai le avefeau ia i latou, atonu na pisi i nisi tagata. Ma sa latou filifili e le mafai ona latou minoi e aunoa ma se faatonuga mai le avefeau. O le mea moni lava, ua uma ona folafola mai na



faatonuga ae latou te le'i faapauu ifo i luga o le papa.

E fitu itula talu ona taunuu le au tineimu e faapauu mai i faamalulele i luga o le tuasivi, ae oo mai loa se taitai tineimu ua vaivai mai le vaega lea o loo tapeina le afi i lalo o le mauga, ma tau mai ia i latou. Sa matuai te'i lava o ia. Sa oo atu o ia i lo latou taitai, ma fai atu, "O le a le mea ua outou taotooto ai i luga o le tuasivi? Sa matou matuai manaomia lava la outou fesoasoani. Toeitiiti lava a le mafai ona matou tapeina le afi ona matou te lei maua se fesoasoani e tape ai. Ae o lea o loo outou malolo i lenei taimi atoa i luga o le tuasivi?"

Sa faamatala atu e le taitai o le au tineimu e faapauu mai i faamalulele lo latou tulaga i le taitai fuimu. Sa folafola mai ia i latou ni faatonuga mai le avefeau. Sa latou mataala i le taumafaiga e maua mai na faatonuga. Ae sa le'i ano mai lava le avefeau ia i latou, ma e le'i tali mai foi i a latou valaau. E moni, na mafai ona latou vaaia nisi o auala e o atu ai i lalo i le afi. Ae sa latou fefefe ne'i o latou ui i le auala sese. Ma o lea na latou filifili ai e faatali seia latou maua mai faatonuga ia na folafola mai e le avefeau.

Sa faalālā atu le lima o le taitai fuimu ma aumai le tamai leitio lea na faaaoga e le au tineimu e faapauu mai i faamalulele. Ona ia savali lea pe tusa ma le 50 iata (45 m) i lalo o se tasi o auala lea e agai atu ai i le afi. Ona ia tu lea ma faataitai le leitio. Sa leotele ma manino le sau o le leo o le avefeau. Ona toe savali lea o le taitai fuimu i luga o le tumutumu o le tuasivi ma savali agai i lalo pe tusa ma le 50 iata i le isi auala. Na ia tu ma valaau atu i le avefeau. Na vave foi ona toe sau le leo o le avefeau.

Sa toe foi atu le taitai fuimu i le au tineimu e faapauu mai i faamalulele

O le a oo mai le taitaiga sili ma le manino i o tatou olaga pe afai e le na o lo tatou faatalitali i le Tama Faalelagi e auina mai le fesoasoani ma le taitaiga ae o loo tatou galulue ma le punouai i le galuega.



ma togi atu le leitio i le taitai ma fai atu i ai, "O loo outou i ai i se nofoaga e le ola ai le leitio. Na pau lava le mea sa tatau ona outou faia o le amata minoi atu i lalo o se tasi o auala, ma semanu e faigofie lava e le avefeau ona ta'u atu ia te outou le auala sao ma taitai atu outou i le nofoaga sa matou manaomia ai outou. Peitai ua outou taotooto i luga nei, ma sa leai ma so outou aoga ia i matou."

E masani lava i taimi tatou te manaomia ai se taitaiga ma se taiala faaleagaga, e mafai ona faaosoosoina i tatou e fai le mea tonu lava lea na fai e le au tineimu e faapauu mai i faamalulele. Tatou te oo i ni nofoaga e le masani ai. Tatou te vaai i ni auala e mafai ona tatou uia, ae tatou te le mautinoa po o fea le itu e tatau ona tatou ui ai. Ua folafola mai ia i tatou ni musumusuga ma le fesoasoani mai lo tatou Tama Faalelagi. Ae peitai e le o taimi uma e vave oo mai ai. E oo mai lo tatou le fiafia ma filifili ai o le

a na o lo tatou saofafai ma faatalitali seia oo mai taiala ia na folafolaina mai. Tatou te faatali ma faatali ma faatali, ma mafaufau pe aisea ua le fesoasoani mai ai le Avefeau faalelagi ia i tatou ma lo tatou auala.

I le faia o lenei mea, ua tatou le amanaia ai se mataupu faavae taua o faaaliga. O loo faamoemoe mai lo tatou Tama o i le Lagi e faaoga lo tatou lava atamai, gafatia, ma tomiai e asa ai o tatou uluai auala. Ao tatou fetaomi atu i luma i le auala ua tatou filifilia, ua tatou i ai i se tulaga e sili atu ona lelei e maua ai ni faasaoga o le auala lea e ono tuuina mai e Ia mo i tatou. Ae afai ua na o lo tatou saofafai i luga o le tuasivi ma aluluga i a tatou ato faafafa seia tuu mai e Ia ni faatonuga, ua tatou i ai la i se tulaga lamatia o le mauaina o i tatou lava i se nofoaga e leai se faaleagaga.

Na aoao mai i tatou e Peresitene Boyd K. Packer, Peresitene o le Korama a Aposetolo e Toasefululua:

“Ua faamoemoe tatou te faaao-gaina le malamalama ma le potou tatou mauaina e galueaiina ai o tatou olaga. Tatou te le manaomia se faaaliga e faatonu ai i tatou e faataunuu o tatou tiute, aua ua uma ona ta’u mai na mea ia i tatou i tusitusiga paia; tatou te le faamoemoe foi e suitulaga ni faaaliga i le potou faaleagaga ma le faaletino lea ua uma ona tatou maua—ae ua na o le faalauaitelina. E tatau ona faagasolo pea o tatou olaga e pei ona masani ai, i se auala o aso uma, ma mulimuli i faatulagaga ma tulafono lea e pulea le olaga.

“O tulafono ma aiaiga ma poloaiga o ni puipuiga taua tele. Afai tatou te manaomia ni faatonuga e faaaliga mai e suia ai lo tatou ala, o le a faatali mai i le auala pe a tatou taunuu atu i le nofoaga e manaomia ai.”¹

Ou te molimau atu o le a oo mai le taitaiga sili ma le manino i o tatou olaga pe afai e le na o lo tatou faatalitali i le Tama Faalelagi e auina mai le fesoasoani ma le taitaiga, ae e oo mai pe afai o loo tatou galulue ma le punouai i le galuega. Mo outou na o loo faatalitali i le Alii mo se taitaiga i o outou olaga—o e o loo manaomia se fesoasoani i se faaiuga tele po o se fesili—ou te tuuina atu ia te outou le lui lenai: Ia faaoga ma le agaga tatalo ma le faautauta lou lava atamai ma au lava punaoa e filifili ai se auala e foliga o loo sa’o ia te oe. Ona amata lea ona auai ma le naunautai i le uia o lona auala (tagai i le MFF 58:26–28). Pe a oo mai le taimi mo le faasaoga o le auala, o le a i ai o la iina e fesoasoani ia te oe ma taialaina oe. ■

FAAMATALAGA

1. Boyd K. Packer, “O Le Sailiga mo le Malamalama Faaleagaga,” *Liahona*, Ian. 2007, 16.

E ALA I MEA FAATAUVAA

Saunia e Laurel Teuscher

Sa ou manatu o loo lelei lava a’u taumafaiga. Ua maea la’u misiona, faauu mai i le kolisi, maua se galuega tumau, ma mulimuli ane na ou see atu ai i so’u lava fale mautotogi. Sa ou auai i le lotu i Aso Sa uma ae o nisi o taimi ou te alu ai i gaoioiga. Sa toatele au uo, nofofua ma e ua faaipoipoina, ma sa te’i lava ua tele ou taimi ou te faitau ai, o se mea lea sa sili ona ou fiafia e fai ao o’u laitiiti. Ae e ui lava i le tele o nei gaoioiga, ae sa ou lagona lava le le mautonu.

I le Alema mataupu e 37, tatou te faitau ai i le fautuaga a Alema i lona atalii o Helamana. I fuaiupu e 41–42, o loo talanoa mai ai Alema e uiga i le aiga o Liae ma le Liahona. Na ia faamatala mai sa le’i galue le Liahona ona “sa paie i latou, ma ua galo ia te i latou e faaoga lo latou faatuatua ma le filifiliga” ma ua “le alualu i luma foi i latou i la latou malaga; o le mea lea na faatuai ai i latou i le vao, ma ua le malaga i le ala sa’o.” O le faitauina o nei fuaiupu na fesoasoani lea ou te iloa ai sa ou le alualu i luma. Sa ou le faaagaina lo’u faatuatua pe filiga i soo se mea i lo’u olaga. Sa ou le toe galue agai i se sini. Sa na o lo’u faatalitali lava mo se mea e tupu.

E le’i i ai se taimi faapitoa se tasi na ou faia ai se lisi ma tusi i lalo mea uma na manaomia ou te suia. Nai lo lona, na auuai mai na

suiga. Muamua, na amata ona ou alapo ou te alu e momo’e pe fai nisi ituaiga o faamalositino. Na sosoo ai, ma le amata ona ou vaavaai i polokalama o aoga lea e ono mafai ona fesoasoani i lo’u alualu i luma i la’u galuega pe mafai ai foi ona ou maua se isi galuega e ese mai ai. Sa ou maua se polokalama ona faaalu lea o lo’u taimi e tapena ai e fai ni suega e manaomia e talosaga ai. Sa amata ona taua ia te au le suesue i tusitusiga paia ma le tatalo, ma sa ou taumafai e faaalu se taimi i aso uma e fiafia ai i afioga a Keriso ma saili ia lagona le Agaga. Sa ou faia se taumafaiga faapitoa ina ia ou aafia atili i la’u uarota—tusa lava pe ositaulagaina ai nisi o taimi mo au lava ia.

Talu ona ou amata faia nei suiga laiti, ua sili atu le fiafia ua ou lagona ina. Sa ou lagona ua ou alualu i luma ma ua tuu mai e le Tama Faalelagi ia te au ni luitau fou. E mafai ona ou faafetauia na luitau ma le faamoemoe nai lo le fefe po o le lotovaivai. Ua ou aoaoina afai e taofi lo tatou galulue po o le faaagaina o lo tatou faatuatua ma agai atu i se auala, o le a le mafai ona fesoasoani le Tama Faalelagi ina ia tatou alualu i luma, ma o le a le mafai foi ona tatou oo atu i lo tatou taunuuga. Ou te matua faafetai mo suiga laiti i lo’u olaga lea na fesoasoani ou te iloa ai le ala i luma atu. ■

Tuusao i le **Mataupu**

**Aisea e tatau ai
ona lilofia
atoa i tatou
i lalo o le
vai pe a tatou
papatiso?**

Masalo na e auai i se papatisoga lea e toe fai faalua ai le papatisoga o se tagata o loo papatisoina ona e le'i lilofia atoa o ia i le vai i le taimi muamua. Ona o le papatisoga o se sauniga faaola, o lea e tatau ai ona

faatinoia tonu ma le sa'o.

O le papatisoga o se faatinoga faafaatusa. Ua "faatusaina i le maliu, tanumia, ma le toetu, ma e na o le faatofu lava e mafai ona faataunuaina ai" (Bible Dictionary, "Baptism"). O le faatofuina i lalo o le vai ua faatusaina i le maliu ma le tanumia o Iesu Keriso, ae ua faatusaina foi i lo tatou lava oti (tagai i le Roma 6:3-6). O le alu ae nai le vai o le faatusa lea o le Toetu o Iesu Keriso ma ua faatusaina i le toe fanaufouina e avea ma Ona soo o le feagaiga. O moli-mau e toalua lea e tutu i autafa o le faatanoa o le vai papatisoga e vaavaai ia mautinoa ua lilofia atoa le tagata o loo papatiso, ma o le faatusa lea o le toe fanaufouina atoa.

Pe a tatou papatiso, ua tatou mulimuli i le mamana lea na faatu e le Faaola, o lē na papatiso e ala i le faatofu i le vaitafe o Ioritana (tagai i le Mataio 3:13-17). E finagalo le Tama Faalelagi mo Ana fanau taitoatasi ina ia faamamaina mai a latou agasala ina ia mafai ona latou toe nonofo faatasi ma Ia. O se vaega taua o Lana fuafuaga paia le papatisoina e ala i le faatofuina, e pei ona sa faia e Keriso. ■



**Sa tatou ona
avea le
Agaga Paia ma
a tatou soa
tumau, ae ou
te le iloa pe ou te
lagonaina le Agaga
i taimi uma.
E i ai se mea o
sese ia te au?**

Afai o loo e agavaa ae e te le o lagonaina le Agaga i taimi uma, o lona uiga atonu o loo e aoao pea e iloa ma galue i le taitaiga a le Fesoasoani Sili. Na faamalamalama mai e Elder David A. Bednar o le Korama a Aposetolo e Toasefululua, “Tusa lava pe tatou te taumafai e faamaoni ma usiusitai, e i ai taimi e le iloagofie ai i o tatou olaga le taitaiga, faamautinoaga ma le filemu o le Agaga” (“Ina ia Tatou Maua Pea Lona Agaga e Faatasi ma i Tatou,” *Liahona*, Me 2006, 29).

Afai e te le o iloa pe o faatasi le Agaga Paia ma oe, ia faaavanoa se taimi e te filemu ai ma faalogo. Atonu e te lagonaina le uunaiga a le Agaga i se faamautinoaga filemu, ma le toafilemu. Taumafai ia e iloa le leo lemu, ma le itiiti pe a o e faia ni mea e valaaulia ai le Agaga, e pei o le tatalo, suesue i tusitusiga paia, po o le auai i sauniga faamautuga. Pe a e faatinoina musumusuga ma faataitai ona faalogo i le Agaga, o le a faaleleia atili ou tomiai e iloa ai na lagona filemu ma le maaleale.

E tatou ona e ola agavaa ina ia mafuta le Agaga ma oe (tagai i le Mosaea 2:36). Afai e te le o lagonaina le uunaiga a le Agaga i lou olaga, masalo o se faailoga lea o le lapataiga e tatou ona e salamo ma toe iloilo au mea e faamuamua. E mafai ona e valaaulia le Agaga i lou olaga pe a e salamo faamaoni, tatalo, suesue i tusitusiga paia, ma faia isi gaoioiga musuia. ■

**Pe tetee le Ekalesia
i taaloga
vitio uma pe
na o ata tau?**

Etele taaloga vitio e mama, faigata, ma malie, ma o nisi o taaloga e toatele le au taaalo e mafai ona avea ma se gaoioiga toatele faafiafia. E le o tetee le Ekalesia i taaloga vitio, ae o loo uunaia le autalavou ina ia atamamai i a latou filifiliga o taaloga ma le tele o le taimi latou

te faaaluina ai. Ua poloaiina i tatou e faaavaa ma le atamai o tatou taimi (tagai i le MFF 60:13). E le faapea a mama ma malie se mea o le a talafeagai ai le faia.

Na faamalamalama mai e Elder M. Russell Ballard o le Korama a Aposetolo e Toasefululua: “O se tasi o auala a Satani . . . e faavaivai ai lou malosi faaleagaga o le uunaia lea o oe e faaalu se vaega tele o lou taimi e faia ai ni mea e laitiiti lava sona aoga. Ou te talanoa atu i nisi o mea e pei o le nofo ai lava mo le tele o itula e matamata i le televise po o vitio, taalo i taaloga i vitio i po uma, [po o le] faasee i luga o le Initoneti” (“Be Strong in the Lord,” *Ensign*, Iulai 2004, 13).


E leai se afaina i le faaaluina o sou taimi e taalo ai i taaloga vitio lea e talafeagai ma tulaga o ala o faasalalauga o loo maua i le *Mo Le Malosi o le Autalavou*. Ae ia naunau e tuu i lalo ia ki faatonutonu pe tape le komepiuta ae agai atu i se isi mea. Aua nei faatagaina ia taaloga vitio e taofia mai oe i le faia o isi gaoioiga aoga e pei o le faamalositino, suesue i le talalelei, faia o meaaoga, po o le faaaluina o le taimi ma lou aiga. ■

FAITATALA

AUA LE TUUFAASOLOINA.



O Lo Tatou Avanoa



ONA OU FIAFIA I AI

2 Nifae 2:11

O lenei fuaiupu e avea pea ma ou taiala ma uunaiga i soo
se taimi lava ou te le mautonu ai, popole, pe i ai i se tulaga faigata.
Na avea pea ma a'u fuaitau e sili ona ou fiafia i ai talu ona ou fesiligia pe
aisea e tatau ai ona i ai le faafeagai. Aisea e tatau ai ona i ai ni feteenaiga? Aisea
e le mafai ai ona i ai na o le lelei, fiafia, faigofie ma le manuia i le olaga? Aisea
e tatau ai ona i ai le leaga?

Na fesoasoani lenei fuaiupu ou te malamalama ai i le olaga ma ona faigata. Na fesoasoani ina ia ou talisapaia atili ai le uiga o le olaga. Na ou iloa ai le faamoemoega o le faafeagai ma e tatau ona ou faafetai ai. Pe ana leai, semanu tatou te le iloa le aano moni ma le matagofie o le olaga. Pe ana leai le faafeagai, semanu tatou te le iloa ona alolofa atu, fiafia, po o le faamanuiaina. Ua ou aoao ia fiafia i le olaga.

“O la’u fautuaga mo i tatou uma ia tepa taulai atu i le moli o le ava a le Alii. E leai se puao e sili atu ona mafiafia, e leai se po e sili atu ona pogisa, e leai se matagi e sili atu ona malosi, e leai se tautai e sē e le mafai e le sulu o le moli o le ava a le Alii ona laveai. Na te aumaia le faailo i afa o le olaga. E auina mai e le moli o le ava a le Alii ia faailoilo e faigofie ona iloa, ma e le sese lava.”

Peresitene Thomas S. Monson,
"Se Upu i le Faaiuga," *Liahona*,
Me 2010, 113.



***Sa ou pueina le ata lenei i Thessa-
loniki, Eleni. E faamanatu mai ai ia
te au le ao pogisa i le miti a Liae
(taqai i le 1 Nifae 8:22–24).***

Kevin K., Siamani

AUINA

mai lau tala, ata, po o
se manatu faaalai i le
liahona@ldschurch.org. la
aofia ai lou igoa atoa, uarota
po o le paranesi, siteki po
o le itu, ma le faatagaga
mai matua (e talia le i-meli).
E ono faapupuina tala mo
le uumi po o le manino.

**O LE AUALA
E MAUA AI
MAFAUFAUGA
MAMA**

Etusa lava pe oo mai
ni mafaufauga leaga
ia i tatou, e le tatau lava
ona tatou faatagaina e
ofi mai ma nofo i o tatou
mafaufau. O le taimi sili
lava tatou te puipuia ai i
tatou lava mai faaoso-
osoga o le taimi lea ua
amata ona fotuai mai
se manatu; faatamaia
loa le fatu, ma o le a
le tupu lava le laau.

Pe a ou oo i sea tulaga,
ou te usuina le viiga e
sili ona ou fiafia i ai ma
ou taumafai e tuu foliga
o Iesu i lo'u loto seia oo
lava ina mafai ona ou
tete'eina. Afai tatou te
teena pea i taimi uma ia
manatu leaga, o le a o ese
mai ia i tatou.

Jorge G., Venezuela



O LE TALI I LE FUAIUPU E VALU

*Na maua e Iosefa Samita lana tali i le Iakopo 1:5.
Sa ou mauaina la'u tali i nai fuaiupu o loo sosoo mai ai.*

Saunia e Angelica Nelson

O le ta o le 11 i le po, ma sa ou i ai i lo'u potumoe ina ua uma ona matou tafafao ma nai a'u uo o le aoga maua luga. Sa ou iloa ou te le'i faia ni filifiliga sili ona lelei i lenei po. "Peitai, sa ou manatu e faapea, "ou te le'i faia foi ni filifiliga sili ona leaga."

I lo'u le fiafia, sa ou aumaia ai se meaaoga e fai i le fale. Sa ou matuai vaivai lava ma sa na o le fia faauma lava ae ou moe. "E manaomia ona faitau a'u tusitusiga paia. Ae o le a faamisi i lenei po," o lo'u mafaufau lea.

Sa amata ona ou mafaufau i mea uma lava sa tatau ona ou faia. Faitau a'u tusitusiga paia, auai i le seminare i le vaveao, auai i le lotu ma le Mutuale, ia maua ni togi lelei, ia auai i gaoioiga faaopoopo, maua se galuega le tumau . . . Ma sa faaauau pea le lisi.

Sa ou lagona le mamafatu i soo se vaega o lo'u olaga, aemaise e na o a'u lava le tamaitai o le Au Paia o Aso e Gata Ai i la'u aoga maua luga. Sa ou toe faamanatu ia te a'u lava ia, masalo e na o a'u lava le tamaitai o le Au Paia o Aso e Gata Ai na feiloai i ai au uo, ma o lea e tatau ai ona avea a'u ma se faataitaiga lelei. Ae na ou iloa ua amata ona ou seeseese.

"Maimau pe ana mafai ona ou

saoloto e pei o a'u uo," o lo'u mafaufau lea. Maimau foi pe ana faapea ou te le lagonaina le faanoanoa ina ua ou alu i se pati pe fai se upu leaga, ae o le mea moni lava sa ou lagonaina. Ou te lagona ai le ma'i faaletino pe a ou faia ni filifiliga ou te iloa e le sa'o. Peitai, mo nisi mafuaaga, sa faaauau pea ona ou faia.

Toeitiiti lava oo i le vaeluaga o le po ae uma loa a'u meaaoga. Toe lima itula tatagi la'u uati. Ou te ala i luga, alu toai i le seminare, ma taumafai ina ia uma atu se isi aso o le a'oga.

Ona oo mai lea o se manatu ia te a'u. E le faapea e tatau lava ona ou usitai i tulafono uma. E mafai ona ou le toe alu i le lotu, seminare, ma le Mutuale pe a ou manao i ai. E le faapea ona o loo o lo'u aiga, ona tatau ai foi lea ona ou alu.

Sa o se manatu faamalieloto tele. Sa ou tolotolo atu i le moega ma na toeitiiti lava a ou moe ae oo mai loa se uunaiga malosia e faitau ia tusitusiga paia. "Leai," o lo'u mafaufau lea. "Ua uma a'u mea e fai."

Sa ou toe lagonaina foi. O le taimi la lea sa ou mafaufau ai, "Atonu o le taimi mulimuli lava lea."

I le seminare i lenei tausaga, sa matou sutesue ai i le Feagaiga Fou. Sa ou sue i le mea o i ai la'u faailogatusi

i le Iakopo mataupu 1. O le mataupu lea na faitauina e Iosefa Samita ma musuia ai o ia e alu i le Vao Paia ma sasaa atu lona loto i le Tama Faalelagi. "Tai ese foi," o lo'u manatu lea. Sa amata ona ou faitau.

Sa ou masani i le fuaiupu e 5: "A e afai ua leai se poto i so outou . . ." Ae o le fuaiupu e 8 lea na tatalaina ou mata i lenei po. Na faapea mai, "O le tagata faalotolotolua e faaletumau ia i ona ala uma." Ou te le'i toe minoi. Ona ou toe faitauina lea.

Sa faalotolotolua lo'u mafaufau. Sa ou faapea atu o a'u o se tagata o le Au Paia o Aso e Gata Ai, ae ua amata ona ese le tulaga ua faia e a'u amioga. Ma afai ou te faaauau ai pea, e tusa lava po o le a le auala ou te filifilia, o le a ou faalotolotolua ma le mautonu ma matua faanoanoa.

Sa manaomia ona ou iloa pe moni le talalelei. Sa manaomia ona ou iloa pe aoga lo'u ala i luga i le 5 i taeao uma e sutesue i le talalelei. Sa manaomia ona ou iloa sa ou taumafai e ola i se olaga e sili atu ou te mafaia, e ui ina i ai taimi e ulagia ai a'u, aua o le aumaia moni ai ia te au le fiafia ma le olioli sili.

Sa toeitiiti lava ta le 1 i le vaveao i lenei taimi, ae sa ou tootuli ifo i autafa o lo'u moega ma sasaa atu lo'u loto



i lo'u Tama oi le Lagi. Sa ou ole atu ia te Ia e fesoasoani mai ina ia ou iloa le mea sa'o, ina ia iloa le auala e ui ai, ma taitai atu lo'u lima ma aveesea le le mautonu sa ou lagonaina.

Na oo mai ma le faigofie, manino, ma le toafilemu le manatu i lo'u mafaufau, "Ua uma ona e iloaia." Ma sa ou iloaia.

Sa ou tu ae i luga, tape le moli, ma ou moe loa. O le fa itula mulimuli ane na tatagi ai la'u uati. Sa ou tapeina ma le fiamoe. E tasi le minute mulimuli ane, ua ou sauni mo se isi foi aso, e aofia ai ma le seminare i le taeao po.

Ua leva tausaga talu ona tupu lena aafiaga matagofie o le vaeluaga o le po. Ae o loo faaauau pea ona tupu la'u molimau. O nisi taimi e sili atu le malosai nai lo isi taimi. O le eseesea, ua ou iloa ma e ou te le'i toe tepa lava i tua. ■



Saunia e Peresitene
Thomas S. Monson

O LO TATOU TALATUU FAAMAMALUINA O PAIONIA

E tele ni mea e mafai e i tatou uma ona aoao mai i o tatou tuua paionia anamua, o a latou tauiviga ma mafatiaga na faafetaiaia ma le lototele naua ma le faatuatua mausali i se Atua soifua

O Mafatiaga o Paionia

“O lena malaga muamua o le 1847, lea sa faatulagaina ma taitaia e Polika Iaga, ua faamatalaina e tagata tusitala faasolopito, o se tasi o tala e maoae le mataina o le talafaasolopito o le Iunaite Setete. E faitau selau paionia Mamona na pagatia ma maliliu i faama'i, leai ni malutaga, pe na matalaina foi. Sa i ai nisi sa leai ni a latou taavale solofanua ma ni solofanua, ma na faapea ona savavali atu i le 1,300 maila (2,000 km) i fanua valevalenoa, ma ui atu i atumauga, ma toso ma tulei ni taavaletosolima.”¹

Faatuatua Musuia

“E tele ni mea e mafai e i tatou uma ona aoao mai i o tatou tuua paionia anamua, o a latou tauiviga ma mafatiaga na faafetaiaia ma le lototele naua ma le faatuatua mausali i se Atua soifua. . . . O talavou ma tamaiti, o nisi ia o le faitau afe o i latou sa tosoina ma tuleia taavaletosolima, pe na savalia lena auala o paionia, e faapei foi o le Au Paia i aso nei o e o loo avea ma paionia i o latou lava eria i le lalolagi atoa. Ou te manatu e leai se tagata o lenei Ekalesia i aso nei e lei ootia i tala e uiga i paionia anamua.

O i latou sa faia le tele o mea mo le manuia o tagata uma, na mautinoa lava o lo latou faamoemoe o le musuia o le faatuatua. Ua latou ausia lenei sini i se auala matagofie.”²

Taulimaina o Faigata

“O itulau ua leva o se api talaaga ua pefua a se paionia o loo faamatalaina ai ma le ootia e faapea: “Na matou punonou i se tatalo ma le lotomaulalo i le Atua Silisiliese, ma loto na tutumu i le faafetai ia te Ia, ma faapaiaina lenei laueleele ia te Ia mo se nofoaga e aumau ai Lona nuu.”

“Na faamatala e se tasi sa i ai iina ao tamaitiiti ia fale le lelei i upu nei: “Sa leai se faamalama o lo matou fale. Sa leai foi se faitotoa. Sa tautauina e lo'u tina se palanikeke tuai, lea na avea ma a matou faitotoa i le taumalulu muamua. O lo matou potumoe lenei, potu malolo, potu nofonofo, umukuka, potu e momoe ai, o mea uma lava e faia i totonu o lenei potu pe tusa ma le 12 i le 16 futu [3.6 i le 4.9 m]. Ou te matuai le iloa lava pe na faapefea ona matou nonofo lelei ai i totonu. Ou te toe manatua upu na fai mai ai si o'u tina pele, e leai se masiofo sa ulu atu i lona maota na sili

atu ona fiafia ma mitamita i le malutaga ma faamanuiaga a le Alii nai lo ia i le taimi na ulu atu ai i lena ana ina ua uma ona eli.”

O tofotofoga na, ma faigata, ma tauiviga, ma tiga o aso anamua. Sa faafetaiaia ma le lototele ma le faatuatua mausali i le Atua soifua.”³

O Paionia i Aso Nei

“Tatou te faamamaluina i latou o e sa onosaia faigata uiga ese. Tatou te viia o latou igoa ma manatunatu i a latou osigataulaga.

“Ae faapefea o tatou taimi? O i ai ea ni aafiaga faapaionia mo i tatou? Pe o le a manatunatu ea tupulaga o le lumanai ma le agaga faafetai i a tatou taumafaiga, ma a tatou faataitaiga? O outou na le autalavou, e mafai ona avea outou ma ni paionia i le lototele, i le faatuatua, i le alofa mama, i le naunautai.

“E mafai ona outou faamalosi atu i le tasi; o loo i ai ia te outou le malosiaga e iloa ai i latou e le o amanaiaina. Afai e i ai ni o outou mata e vaai ai, ma ni taliga e faalogo ai, ma ni loto e lagona ai, o le a mafai ona outou aapa atu ma faasoina mai i latou tou te tupulaga.”⁴



O Le Paionia Tupito

“O le susueina o itulau o le talafaa-solopito faatusi paia mai le amataga e oo i le iuga, tatou te aoao ai i le paionia tupito—o Iesu Keriso. Na muai ta’u mai Lona soifua mai e perofeta anamua; o Lona afio mai i le tulaga o le olaga na fofogaina mai e se agelu. O Lona soifua ma Lana galuega ua suia ai le lalolagi. . . .

“O loo ta’ua i se fuaiupu se tasi o le tusi a Galuega e faapea: Na ‘femaliuai [Iesu] ma agalelei . . . aua sa ia te ia le Atua’ (Galuega 10:38). . . .

“O Lana misiona, o Lana galuega i tagata, o Ana aoaoga o le upumoni, o Ana galuega o le alofa tunoa, o Lona alofa e le maluelue mo i tatou e uunaia ai lo tatou agaga faafetai ma fiafia ai o tatou loto. O Iesu Keriso, le Faaola o le lalolagi—le Alo o le Atua—o le paionia tupito, aua na muamua atu o Ia, e faailoa atu i isi tagata uma le ala e mulimuli ai. Ia tatou mulimuli ia te Ia.”⁵ ■

FAAMATALAGA

1. “Sau ma Mulimuli mai ia te Au,” *Ensign*, Iulai 1988, 2; tagai foi i le *Liahona*, Nov. 1988, 2.
2. “Aoaoina o a Tatou Fanau,” *Liahona*, Oke. 2004, 4.
3. *Ensign*, Iulai 1988, 4; tagai foi i le *Liahona*, Nov. 1988, 3.
4. “O Tatou Uma o Paionia,” *Liahona*, Iulai 1997, 117.
5. “Taitaia e Paionia Faaleagaga,” *Liahona*, Aok. 2006, 8.

Fesoasoani le Tasi i le Isi

INITIA

Saunia e Elder Charles ma Sister Carol Kewish

Faifeau Faamisiona Matutua, Eria a Asia

Na ua faataumaoia e afa malolosi ma afa asiosio ia Initia i saute ia Oketopa 2009, sa galulue alii talavou ma le autalavou matutua mai Itu o Hyderabad ma Bangalore e fesoasoani e faamama avega i mafatiaga o i latou na afaina i lologa.

Na saunoa Peresitene Prasada Gudey o le Itu o Hyderabad Inidia, “Sa matagofie le galuega sa faia e o tatou alii talavou i le la’uina o meaai ma vai ia i latou sa manaomia. Na taunuu oloa o foa’i i le itumalo, ae sa le mafai e le malo ona tufatufa atu i le fiaafe o tagata na aafia sa i ai i tolauapiga e 200 mo tagata sulufai. Sa iloagofie lava o tatou tagata i o latou taoofu o Lima Fesoasoani Mamona, a o latou faatinoina la latou galuega lelei i le la’uina o meaai ma vai i tagata uma.”

Sa ta’ua e nisi o alii talavou ma talavou matutua o e sa faia le auaunaga, lo latou fiafia ma le faamalieina ona o le auauna atu. ■

Taumatau: “Sa ou matua fiafia lava ina ua ou maua se avanoa e auauna atu ai i o’u uso a tagata. Sa ou maua se aafiaga matagofie, ma sa tele mea na ou aoaoina e ala i le faia, ma sa matou fiafia ai foi e faatasitasi ma uo ma fu’e ma utu meaai ma sapalai na manaomia. Sa ou lagonaina le alofa ma le filemu o lo’u Faaola a o ou auauna atu i isi.” —Venus Armstrong

“Sa ou matua fiafia lava ina ua mafai ona fesoasoani i lenei galuega faatino. Sa ou maua ai le fiafia tele i le iloa sa ou fesoasoani e auauna atu i tagata sa matua manaomia le fesoasoani. Sa ou tatalo ina ia faamanuiaina tagata.” —Vishali Natta

Lalo ifo: O Prabhu Kumar (i luga o le loli) o se tasi o sui e 60 o le Ekalesia sa malaga i le tolauapiga a tagata sulufai i le Siteki a Karnataka i matu. Sa latou la’uina atu ia palanikeke, tapoleni, ma pusa o mea faamama na tuufaatasia e tagata o le Ekalesia. Sa fai mai o ia, “Sa matuai ofoofogia le fesoasoani atu i lenei galuega faatino o se toomaga mo lologa. Sa i ai lava lo’u naunau e fesoasoani ma auauna atu i isi. Sa ou matua faafetai ina ua mafai ona ou auauna atu. Sa maligi o’u loimata ona sa mafai ona ou vaai i na tagata sa leiloloa uma a latou mea i le lologa. O se faamanuiaga sili le mafai ona fesoasoani i tagata o lo’u atunuu.”





NA E ILOAINA?

Na aoao mai le Perofeta o Iosefa Samita e faapea, o se tagata moni o le Ekalesia "e fafagaina i latou e fia aai, faaofu e le lavalava, e tausia fafine ua oti a latou tane, e soloia loimata o e matua oti, e faamafanafana i e mafatia, pe o i totonu o lenei ekalesia, pe le auai foi i se lotu, po o fea lava na te maua ai i latou" (Aoaoga a Peresitene o le Ekalesia: Iosefa Samita [2007], 455). Ona o lo tatou naunau e auauna atu i isi, o lea ua lago-lagoina ai e le Ekalesia le toomaga ma le atiina ae o galuega faatino i le lalolagi i le polokalama o fesoasoaniga mo tagata. Mo se faataitaiga, i le 2009:

- E 763,737 aso na ofoina atu e galulue fua ai i fale o le uelefea a le Ekalesia.
- E silia ma le 8,000 faifeautalai o loo auauna atu i le Tautua a le Uelefea.

Mai le va o le 1985 ma le 2010, ua tuuina atu ai e le Ekalesia le fesoasoani mo tagata i atunuu e 178. O nisi o galuega faatino patino e aofia ai mea nei:

- Tuuina atu o le toomaga mo faalavelave faafuasei ina ua mavae mafuie i Haiti, Initonesia, ma Chile; ina ua mavae le galulolo i Samoa; ma ina ua mavae afā asiosio i Filipaina.
- Faatupeina se faalauiloaga o tui puipui mo le misela i Aferika.
- Auina atu le 10.3 miliona o pusa o mea faamama, pusa o mea e faaaga e pepe faatoa fananau mai, ma pusa o meaaoga.
- Tufatufaina le silia ma le 61,000 tone o meaai; e silia ma le 13,000 tone o sapalai mo falema'i; ma e silia ma le 89,000 tone o lavalava.

Mo nisi faamatalaga e uiga i le polokalama o le uelefea a le Ekalesia, tagai i le www.providentliving.org.



Luga: "Ina ua ou faamatala atu i a'u uo i le kolisi e uiga i le galuega faatino, sa matua fiafia i latou i le mea sa ou faia. Sa ou faamatalaina i ai mea sa matou faia ma faasoa atu i ai mataupu faavae o le Ekalesia. Sa ou lagona le fiafia ina ua ou fesoasoani atu i tagata i le galuega faatino. E faamalo atu i le faalapotopotoga a le Ekalesia i le aumaia o lenei avanoa ia i matou e auauna atu ai i isi."
—Deepak Shalma

Taumatau: "O se lagona lelei tele le galulue ai i le galuega faatino o le toomaga i lologa. Sa ou fesoasoani e vali faapea foi ma le tufaina o afifi meaai. O se faamanuiaga tele le i ai iina ma isi uso a perisitua ma mafai ona fesoasoani ma auauna atu i tagata sa matua manaomia le fesoasoani."
—Avinash Thomas



O SE MEA E LE TAUA I SE TASI TAGATA O SE O A LEA I SE ISI TAGATA

*O se tusi e auro ona mataitusi i le faavaa na avea o se
oa i se tasi na sailia le upumoni.*

Saunia e Andrej Bozhenov

O se aso vevila o le taumafanafana i la'u misiona. Sa ma savalia ma la'u soa magaala o St. Petersburg, i Rusia, ma le faamoemoe ia maua ai ni tagata sailiili fou. O le afiafi lena na matou feiloai ai ma se toeaina i talaane o lo ma fale ma amata loa ona matou talatalanoa. E ui sa lei faaalua sona fiafia i le talalelei, ae na taufai musuia i ma'ua e ave i ai se kopi o le Tusi a Mamona. I totonu o le tusi sa ma tusia ai o ma moomooga alofa mo ia, a ma molimau, ma faamatalaga e faafesootai ai i ma'ua.

Mulimuli ane i lena lava afiafi, i lo ma le iloaia, ae sa tafafao ai se taulealea e igoa ia Ilya ma lona uso. A o savalivali i se auala e tau le malamalama i lalo o le eleeele, sa vaaia ai e Ilya se ilaila mai o se auro i le faavaa o se tusi i luga o le palapala. Ina ua faatu ifo i lalo e vaai lelei i ai, sa ia

faitauina ni mataitusi auro na lolomi i luga o le tusi—O Le Tusi a Mamona: O Se Tasi Molimau ia Iesu Keriso. Sa tago ma aumai ma ave i le fale.

I le aso na sosoo ai, sa ma tau mafaufau ai ma la'u soa pe o le a faapefea ona ma maua nisi tagata sailiili fou. Sa vave ona oo mai i lo'u mafaufau ni manatu: "O loo ta taumafai malosi e sue ni avanoa fou. A o fea o i ai taunuuga? Atonu ua tataua ona sui se mea o loo ma faia."

E lei leva ae tatagi le telefoni. Sa ou pikiina i luga. Sa fesili mai le leo, "O se alii faifeautalai lea? Sa ou mauaina lau tusi na leiloa i le ala kolosi i lalo o le eleeele. Ou te manao e toe faafoi atu."

Sa vave ona ou tepa atu i le fata i le mea sa taatitia ai a'u tusitusiga paia. "Ailoga na leiloa a'u tusitusiga paia i le auala o nofoaafi i lalo o le eleeele." Na ou tali atu ai. "Leai, e le'i leiloa la'u kopi o le Tusi a Mamona, ae e mafai ona tuu ma oe e te faitau ai."

Sa fai mai le taulealea o lona igoa o Ilya ma sa ia faamatala mai o ia e sau mai Orsk, i Rusia, ae na sau i St. Petersburg e faigaluega.

"Ou te fia aoao atili e uiga i lenei tusi ma la outou ekalesia," o lana tala lea. "E mafai ona ta feiloai?"

Sa ou osooso i le fiafia. E le o aso uma e valaau mai ai ni tagata sailiili ma talosaga mai e faatulaga se feiloaiga e aoao atili ai i le Ekalesia.

"Toe, e mafai ona tatou feiloai, Ilya!" Sa ou tali fiafia atu ai.

Ina ua matou feiloai ma Ilya, sa ia faalogologo ma le toto'a ma fai mai ana fesili. Sa ma fiafia ona sa ia talia fiafia le talalelei.

I se tasi taimi a o faia le lesonea, sa ou susu'eina ai le kopi o le Tusi a Mamona a Ilya. A o ou susueina itulau amata, sa ou vaaia se tusitusi e foliga ou te masani ai—o la'u tusitusi lea! Sa ou iloa ai o le tusi lava lenei sa ma tuuina i le toeaina i le aso ua mavae. O le mea moni, na tia'i e



le tamaloea le tusi, lea sa lei leva ae maua e Ilya. Sa tumu au i le lotofaafetai ona sa ma filifili ma la'u soa e tuu le tusi i le toeaina, e ui ina sa ma le malamalama pe aisea.

E lei leva ae filifili loa Ilya e auai i le Ekalesia. Na amata ona ia faasoa atu ma le naunautai le savali o le talalelei i ona aiga faapea ma ana uo.

Sa ou aoaoina e silafia e le Tama Faalelagi le taimi ua saunia ai se tagata e talia Lana afioga. Na te manaomia i tatou, o ni faifeautalai ma tagata o Lana Ekalesia, ia tau lava ina faataunuu Ana polo-aiga ma gauai atu i Lona finalo a o tatou saili e faasoa atu le talalelei. O le tulaga lenei, sa silafia lava e le Atua e ui lava o le a le iloa e le tagata muamua na tuu i ai le ma Tusi a Mamona ia lona taua, ae o le a le faapena Ilya (tagai 1 Nifae 19:7). ■

Tau Lava o le Aau Pea

Efiafia lava Monika e sefululua ona tausaga e aau. O ia o se tasi o tagata aau pito i lelei i Niu Sila. Atonu e i ai sona itu i'a.

Ia, atonu e le mo'i le faapea e i ai sona itu i'a. Ae na pau le isi faamatalaga ua mafua ai ona lelei tele o ia ona o lona koleni malosi.

E lua itula e i ai i le vai i taeao uma o Aso Gafua, Aso Lulu, ma Aso Faraile i le 5:00 i le taeao. O Aso Lua, Aso Tofi, ma Aso Toonai e momo'e ai i le malae pe momo'e faataamilo pe a tuua le aoga.

O lana taga e faale-fiafia i ai o le aau faō ae apata limatasi, e tuu i luga lona auvae, ma e ta'i 100 mita ma ona lima. "E matua lailai lava ou tau'au," o lana tala lea.

Ae sa ia aoaoina, a oo ina faigata, e le faigofie le olaga pe a togile solo. O le faia o galuega faigata e atili ai lona malosi.

Galue Malosi ma Taimi Faigata

Sa fesoasoani uma lava lona galue malosi. Sa amata ona ia manumalo i pine i le 10 o ona tausaga. I le 11 o ona tausaga sa i ai o ia i le 10 pito i luga a le atunuu i lana vaega i le aau faō ma apata limatasi. O le 12 o ona

tausaga sa filifilia ai o ia mo se tolauapiga mo le atinaega o le aau ma le au a le atunuu ma sa filifilia ai o ia e aau i Taaloga a le Oceania i Samoa e tauva ai ma le au feausi mai isi atunuu.

Fai mai a ia, "O le tala e masani ona fai mai ai lo'u tamā, "E maua le manumalo i le galue malosi. E le te'ite'i lava ua oo mai.'"

Sa aoaoina e Monika e moni lona mea mo le aau, ma sa ia iloa ai e sa'o foi lona mea i le olaga ina ua maluu faafuasei lona tamā i nai masina ina ua mavae lona aso fanau e atoa i ai lona sefulutasi tausaga.

"Sa matuai o'u latalata lava i lo'u tama," o le tala lea a Monika. "O ia na amata aoaoina au e aau. Sa ia momoliina au i a'u aoga aau uma lava ma a'u tauvaga. Ina ua maluu o ia, sa pei ua leai se isi ou te toe talanoa i ai."

Aua Le Fiu

O le maluu o lona tamā o se mea faigata. Peitai e le fiu Monika i taimi o faataitaiga faigata, o lea ina ua maluu lona tamā, na te lei lafoaia foi lona faatuatua i le Tama Faalelagi.

"O lo'u tamā o lo'u faataitaiga lea," o lana tala lea. "Sa ia aoaoina a'u i le ala e ola ai i le talalelei."





*Na aoaina e Monika Saili o le togi
o le solo pe a oo mai mea faigata
e le faafaigofieina ai le olaga.*





AUA LE FIU

"E i ai i nisi
taimi ni aso
faigata mo i
tatou taitoa-
tasi. Aua le

faanoanoa. Aua le fiu. Vaavaai
mo le lasusulu i talaatu o ao."

Peresitene Gordon B. Hinckley
(1910–2008), "The Continu-
ing Search for Truth," *Liahona*,
Feb. 1986, 9.

*Faatasi ai ma le fesoasoani a lona
tina, ua mafai ai e Monika ona
tatalia nisi o taimi faigata. Sa ia
aoaoina i le aluga o le olaga e le
mafai e mea faigata ona taofia
o ia mai le fiafia.*



Talu mai lona maliu, ua amata ai e Monika ona suesue i
tusitusiga paia a o lei moe, "ma taumafai ia avea o se mea
e masani ai," o lana tala lea. E tu atu o ia mo ona talito-
nuga i le aoga. "E oo mai ia te a'u le tele o le mau fesili e
uiga i le Ekalesia," sa ia fai mai ai. Ma o loo galue foi o ia
o se faatonu o musika i le uarota.

"Ua faamanuiaina lava au i le avea ai o se tagata o le
ekalesia," o le tala lea a Monika. "E faamafanafanaina au
pe a ou atuavale tele."

Malosi Atu i le Faaiuga


E misia lava e Monika si ona tamā. Ae o le lagolago a
lona tina ma le aiga, o loo faaauau ai pea o ia.

E tumu lona olaga i lesona o le piano ma le vaiolini,
o fonotaga a le aufono a tamaiti aoga, aau, Alualu i
Luma o le Tagata Lava Ia, ma le taitaia o musika i lotu
faamanatuga.

Na te le o iloa lava pe o le a le mamao o le a oo i ai
lana aau pe o le a foi le umi o le a tumau ai. Ae o le talale-
lei lava ia, ua naunau o ia e tumau ai seia oo lava i le iuga.

"O nisi taimi e faigata ai le olaga," o le tala lea a Monika.
"Ae o le faia o mea faigata e mafai ona faamalolosia ai i
tatou. Pau lava le mea o le aau pea." ■


Ina ia maimoaina nisi ata mai lenei tala, asiasi i le www.liahona.lds.org.



Ua faasoa mai e Elder Dallin H. Oaks o le Korama a Aposetolo e Toasefululua nisi o manatu e uiga i lenei mataupu.

Aisea e taua ai le auauna atu i isi?

Mai le "Auaunaga ma le Le Manatu Faapito," Liahona, Me 2009, 93–96.



O le aai ma feinu i le faamnatuga i vaiaso taitasi, tatou te molimauina ai la tatou tautinoga e auauna atu i le Alii ma o tatou uso a tagata.

Na tuuina mai e lo tatou Faaola o la lava i se auaunaga e le manatu faapito. Sa la aoao mai e tatau ia i tatou taitoatasi ona mulimuli ia te la e ala i le taofia o i tatou lava mai mea tatou te manatu faapito ai ina ia mafai ai ona auauna atu i isi.



E sili atu lo tatou fiafia ma faamalieina pe a tatou galulue ma auauna atu i mea tatou te foai atu, ae le o mea tatou te maua mai.



Sa aoaoina i tatou e Iesu e faapea, o i tatou o e mulimuli ia te la e tatau lava ona taua ma tulaga ese, ina ia susulu atu ai i tagata uma.



Saunia e Peresitene Henry B. Eyring

Fesoasoani Muamua i le Au Peresitene Sili

Taitaiina Oe i le Aiga

Emanao lo tatou Tama Faa-lalagi alofa ia toe foi atu Ana fanau agaga uma ia te Ia. Na Ia auina mai Lona Alo, o Iesu Keriso, e faia se alavaa saogalemua. Na Ia tuuina foi taiala ma tagata laveai e fesoasoani i Ana fanau i le ala. O matua, uso ma tuafafine, matua o matua, uso o tina, ma uso o tamā ma tuagane o tina, o ni taiala ma ni au laveai malolosi ia.

E fesoasoani foi le au galulue i le Peraimeri e taiala le fanau. O se tamaitai, a o talavou o ia, sa i ai i le au faatonu aoao o le Peraimeri sa fesoasoani i le faiga o le mautauave o le FMT. Sa faiaoga o ia i le Peraimeri o lana uarota seia lata ina atoa lona 90 tausaga. Sa lagonaina e fanau laiti lona alofa mo i latou. E sili i lo mea uma, ona



o ana faataitaiga sa latou lagonaina ai ma iloa le Agaga Paia.

I se tasi aoauli sa ave atu ai e lo'u toalua lo ma atalii matua i le fale o se tamaitai sa aoaoina o ia e faitau. Sa tatau ona ou pikiina o ia pe a ou manava mai i la'u galuega.

Sa vave ona uma lana lesona nai lo le mea sa ma manatu ai. Sa ia mautinoa na ia iloina le auala i le fale. O lea na amata ai ona savali o ia. Ina ua tusa ma le afa maila (0.8 km) lana savaliga, sa amata ona pogisa. E lei taitai lava ona oo o ia i le fale.

Sa ia tau le iloina moli o taa-vale a o pasia o ia ona ona loimata. Sa ia iloina sa ia manaomia se fesoasoani. O lea na ia aluese ai mai le auala ma maua se nofoaga e tootuli ai.

Sa mafai ona ia lagona atu i le



togavao le agai mai o leo ia te ia. Sa faalogoina e ni talavou se toalua lana tagi. Sa la fai atu lea, “E mafai ona ma fesoasoani atu ia te oe?” Sa ia fai atu o ia ua se ma ua fia alu i le fale. Sa la fesili pe na te iloaina le numera telefoni o le fale po o lona tuatusi. Na te lei iloaina. Sa la aveina o ia i se nofoaga lata ane e nonofo ai i la’ua. Sa la mauaina le goa o lo matou aiga i se tusi telefoni.

Ina ua ou maua le telefoni, sa ou faa-natinati atu e laveai, ma le faafetai ona sa tuuina ni tagata agalelei i lona ala e agai i le fale. Ma e le uma lo’u agaga faafetai aua sa aoaoina o ia e tatalo ma le faatuatua ia oo mai le fesoasoani ina ua leiloa.

Ou te molimau atu e alofa le Alii ia te outou ma fanau uma lava a le Atua. A outou mulimuli i le taitaiga musuia i lenei Ekalesia moni a Iesu Keriso, e mafai ona laveaiina outou ma le saogalemu i lo tatou aiga i le Tama Faalelagi ma le Faaola. ■

Mai se saunoaga i le konafesi aoao ia Aperila 2010.



TAIALA FMT

Sa faamatalaina e Peresitene Eyring se faiaoga Peraimeri sa fesoasoani i le faiga o le mautauave o le FMT: Filifili le Mea Tonu. Ua tele tausaga o fesoasoani lenei mautauave e taiala ai tamaiti i le faia o filifiliga lelei. O le mama o loo faaalua i i o loo i le [gagana].

O AI OU TAIALA?

Fai mai Peresitene Eyring ua tuuina e le Tama Faalelagi ia taiala ma le au laveai i le lalolagi e fesoasoani i fanau ina ia toe foi atu ia te ia. E mafai ona e tusia se ata o ni tagata ua tuuina mai e le Tama Faalelagi e taialaina oe. A le o lea, e mafai foi ona e tusia se tusi e faafetai atu ai i se tasi o nei tagata mo se mea sa ia faia e fesoasoani ai ia te oe.

O SE TAITAI
O LE EKALLESIA PO
O SE TASI TAGATA
O LE EKALLESIA

O SE MATUA PO O SE
TAGATA O LE AIGA



O SE FAIAOGA



O SE MATUA PO O SE
TAGATA O LE AIGA



E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

O Le Malumalu o Le Maota o le Atua

“O sauniga paia ma feagaiga e maua i malumalu paia e mafai ona toe foi atu ai tagata taitoatasi i le afioaga o le Atua ma toe faatasia aiga e faavavau. (“O Le Aiga: O se Folafolaga i le Lalolagi”).

**Saunia e JoAnn Child
ma Cristina Franco**

O le a sou lagona pe a e vaai i le matagofie o le malumalu? Pe oo atu upu nei i lou mafaufau: “Ou te fia vaai i le malumalu. Ou te ulu i ai i se aso?”

O nisi taimi pe a usuina e tamaiti le pese “Ou te Fia Vaai i le Malumalu,”¹ latou te mananao e o i le malumalu i se aso, ae latou te le malamalama pe aisea ua i ai malumalu, pe o a mea e tutupu i totonu o le malumalu, ae po o a foi mea e tatau ona latou faia ina ia mafai ai ona o i totonu. Se’i o tatou suesue atili e uiga i le malumalu.

Aisea ua faia ai malumalu?

Na fetalai mai le Alii, “Ia fausia se fale i lo’u igoa, mo Lē Silisili e nofo ai” (MFF 124:27). E nofo le Agaga o le Alii i Ona malumalu. O le malumalu o le maota o le Atua. O se nofoaga tatou te osia ai feagaiga (po o folafolaga) ma le Tama Faalelagi. Afai tatou te

tausia a tatou feagaiga, o le a mafai ona tatou toe nonofo faatasi ma Ia.

O le a le mea e tupu i totonu o le malumalu?

E tatau ona papatisoina tagata uma e toe foi atu ai i le Tama Faalelagi. O le toatele o fanau a le Tama Faalelagi sa maliliu a o lei papatisoina. A atoa lou 12, e mafai ona papatisoina oe i totonu o le malumalu mo na tagata ina ia mafai ai ona latou mauaina na faamanuiaga.

I totonu o le malumlau tatou te maua ai foi se faaeega paia, po o se meaalofo. O lenei meaalofo o le folafolaga afai tatou te tausia polo-aiga, e mafai ona tatou maua le ola faavavau.

O totonu o le malumalu e mafai ona faamauina ai se tane ma le ava o se aiga mo le olaga nei ma le faavavau. O lona uiga afai e tumau

lo la’ua agavaa, o le a faaipoipoina i laua e faavavau ma mafuta ma a la’ua fanau i se aiga e faavavau.

O mea uma e faia i totonu o le malumalu e faia i le perisitua, po o le pule a le Atua.

E faapefea ona ou saunia e ulu atu i totonu i se aso?

Ina ia alu i totonu o le malumalu, e tatau ona le itiiti ifo ma le 12 tausaga lou matua. E tatau ona papatisoina ma faamauina oe. E tatau ona e talitonu i le Tama Faalelagi ma Lona Alo, o Iesu Keriso. E tatau ona e talitonu i Le Ekalesia a Iesu Keriso o le Au Paia o Aso e Gata Ai. E tatau ona e ola i poloaiga a le Tama Faalelagi. O le a faatalanoaina oe e lou epikopo po o le peresitene o le paranesi ina ia mautinoa ua e agavaa e ulu atu i le malumalu, o le a e mauaina se pepa faataga o le malumalu e faaali atu i le malumalu. O le i ai o se pepa faataga o lona uiga o loo e ola i le ala e tatau ai ina ia e ulu atu i totonu.

A e tumau ai i le ala e ave-atu ai oe i le malumalu, o le a e saunia e te alu atu iina “e lagona ai le Agaga, ma tatalo ai. O le maota o le Atua, e i ai le alofa.”² ■

FAAMATALAGA

1. (Tagai “Ou te Fia Vaai i le Malumalu,” *Tusipese a Tamaiti*, 99.)
2. “Ou te Fia Vaai i le Malumalu, 99.



GAOIOIGA

Tiloilo i ata uma e lua. O lē fea aiga ua saunia e o i se maimoaga i le malumalu? (1) I le ata muamua, li'o ia mea o loo fesoasoani i le aiga e saunia ai e asiasi atu i le malumalu. (2) I le isi ata, li'o mea e manaomia e le aiga e suia ina ia saunia ai e o. (3) Mafaufau i ni mea se lua e mafai ona e faia e te sauniuni ai e alu i le malumalu pe a e matua. Tusi na mea i lalo ifo o ata.



O le tasi mea o le a ou faia e sauniuni ai e alu i le malumalu o le _____.

O le tasi mea o le a ou faia e sauniuni ai e alu i le malumalu o le _____.

O Le Aso Paionia i Tahiti

Saunia e Maria T. Moody

Efiafia tele tamaiti o le Siteki o Papeete Tahiti i paionia! Sa latou faapotopoto ma o latou matua mo se gaoioiga a le siteki o le Aso o Paionia, e faamamaluina ai paionia sa malaga atu i le Vanu o Sate Leki i le 1847.

Sa fauina e uarota taitasi se taavaletoso a paionia—o nisi sa faia i uili o pasika ma le tasi sa faia i solofanua e fai i pepa malo. Sa savavali tamaiti i se solo, taaalo i taaloga faapaionia, ma fiafia i meaai mananaia.

O le Aso Paionia o se aso faapi-toa foi e manatua ai tagata i atunuu uma sa taliaina le talalelei ma fesoa-soani e aoao atu i isi. O tagata uma nei o ni paionia foi! ■



O le aiga lenei e tutusa o latou pulou, talieleele, ma taofi ofuvae.

Sa tosoina e tamaiti nei le taavaletoso a le latou uarota i le solo.




O nisi o teineiti sa fai o latou laulavalava ma pulou faapaionia.

Sa fai pulou ma fusi i ulu o nisi tamaiti.



O La Tatou Itulau



O Marcia V., e 5 tausaga mai Peru, o le mitamitaga ma le olioliga o ona matua, o Patricia ma Raul. E i ai o ia i le vasega a le FMT i le Peraimeri, ma e i ai lana mama FMT. E fiafia o ia e valivali ia ata i le Liahona, ma o le pese e sili ona fiafia i ai o le "O Le Atua Lo'u Tama."

E fiafia o ia e fesoasoani i le tausiga o tamaiti laiti, ma e fesoasoani foi i lona faiaoga e solo le laupapa. Na te taina le vaiolini. E fiafia Marcia i afiafi faaleaiga ma e fiafia foi e alu i le lotu. E alofa o ia i le Tama Faalelagi ma e iloa e alofa foi o la ia te ia.



Jair O., 10 tausaga, Peru

O SE AIGA FAAVAVAU

Ile aso 23 o Aokuso, 2008, sa faamauina ai lo'u aiga i le Malumalu o Sate Leki i luta. O se miti na taunuu mo i matou. Sa matou malaga mai le isi itu o le lalolagi—o se malaga umi, ma faalelavā tagata, ae sa aoga. Na matou taunuu i luta ua po, ma o le mea muamua lava sa matou faia o le o lea e vaai i le malumalu. Sa matua matagofie i le po i le susulu atu i ai o moli uma. Na faamauina i matou i le lua o aso mulimuli ane. O tamaitai sa vaaia tamaiti i le malumalu na fesoasoani i le faiga o o ma'ua ofu papae ma lo'u uso. Ona ma o ai lea e faatasi ma o ma'ua matua. Sa pei lava o le a ou alu e feiloai ma Iesu. Sa matou matua fiafia ina ua faamauina i matou! Ua ou iloa nei e mafai ona matou ola faatasi e faavavau ma lo'u aiga.

Dean F., 5 tausaga, Sri Lanka

I-meli mai lau atatusi, atapu'e, aafiaga, molimau, po o se tusi i le liahona@ldschurch.org, e tusi ai le "Our Page" i le laina o le mataupu. O tusiga taitasi e auina mai e tatau ona i ai le igoa atoa o le tamaitiiti, itupa, ma lona matua faatasi ai ma igoa o matua, uarota po o le paranesi, ma le siteki po o le itu, ma le faatagaga tusia a matua (e taliaina i-meli) e faaogaina ai le ata o le tamaitiiti ma le tusiga na auina mai. E ono faasa'o-ina tusiga e auina mai mo le manino po o le uumi.



Guillermo T., 8 tausaga, Venezuela



Sarah D., 6 tausaga, Pasila



O Le Valaauga

Saunia e Corine Pugh

E faavae i se tala moni a le paionia o John Carling

“Ia fausia se fale i lo’u igoa, i lenei lava mea, ina ia outou faamaonia ai outou lava ia te au tou te faamaoni i mea uma ou te poloaiina ai outou” (MFF 124:55).

“**I**saako, Isaako.” O le valaau lea a lona tina. “O loo manaomia oe e lou tamā i le pa o povi.”

Sa ea a’e i luga le ulu o Isaako ma autilo atu i le faamalama. E sa’o lava, ua i luga le la, ma o lona uiga ua oo i le taimi o feau. Sa tautevateva le tu a’e o Isaako mai lona moega ma aapa atu i lona mitiafu. Ua na lagona atu le fetagisi mai o povi.

A o ulufafo atu o ia i le faitotoa o le umukuka, sa ia vaaia Papa o taitai atu le aumatua i le faitotoa.

“O fea a e usu po i ai, Papa?” Sa fesili ai Isaako.

“I le pa. Ou te manao e te uuina le pakete saito ina le migoi ai Taurusi.”

Sa tagi leotele le povi, e pei o fesili, “O le a le mea lea ua tupu i lenei taeao?” Ae a o tuutuu atu e Isaako le pakete i lalo ifo o lona isu, sa filemu Taurusi ma amata ona etoeto ia saito i lona laulaufaiva umi. A o ‘ai le povi, sa nonoa e Papa le maea e taofi mau ai i le pa.

Ina ua oso mai Mama i luma o le faitotoa, sa fai atu i ai Papa, “E i ai sa’u galuega faatino faapitoa, Emeline. E mafai ona e aumaia faamolemole le penitala lautele kamuta mai le kesi?”

Ina ua toe sau Mama ma le penitala, sa tuu e Papa ni laupapa i luga o le palapala. Ina ua uma ona vaai lelei atu ia Taurusi, ona ia amata tusitusi ai lea i luga o le laupapa lamolemole samasama.

“O le a lau mea na e fai, Papa?” Sa fesili ai Isaako.

“Na tuuina mai ia ma’ua ma Uso Fordham se galuega taua mo le malumalu,” sa faamatala ane ai Papa. “O le a ma faia faatusa o povi e 12 e faatietie ai le faatanoa i le potu

mo papatisoga. O lea ou te tusia le mamanu, ma o Taurusi o la’u ata faataitai lea.”

Ina ua faalogo atu i lona igoa, sa ea ae i luga le ulu o Taurusi, ona toe foi ai lea i lana ‘aiga o le taeao.

Sa vaavaai atu Isaako i le tusiaina e lona tamā o ni laina uumi, lautetele. “O lona ua amata ona foliga mai e pei lava o Taurusi,” o le tala lea a Isaako. “Ae aisea na e filifilia ai o ia?”

“Aua e malosi o ia ma o le povi aupito sili foi lea ua ou vaai i ai. Ua e vaai atu i lana tu? E foliga mai ua na iloina lava lona taua. E usitai foi Taurusi.”

“O lenei galuega faatino o se valaauga e ese le faapitoa, Papa. A ea?”

“Toe, Atalii, e sa’o. Ou te faafetai lava ina ua faatonuina au ou te fesoasoani.”


Sa milimili e Isaako le ua o Taurusi. Sa mafai ona ia lagonaina maso malolosi o le povi. “O se faamamaluga tele mo oe, toeaia,” na ia musumusu atu ai.

Sa vave ona faauma e Isaako ana feau. Na vave atu foi ona uma le faiga o lana lua tasene o pine laau faamau lavalava nai lo le mea e masani ai. Sa ia iloa e uma loa ona maua lea o le taimi e fai ai mea e manao ai.

O le asō, na manao Isaako e tusi ni ata. Na tuu atu e ona matua ia te ia le faatagaga e tusi ai ana ata i luga o le magalafu, e faaoga ai fasi malala mai motumotu. Sa faigofie ona tape ese le malala, ma sa mafai ona ia faaogaina e tusi ai laina lautetele pe lauiti foi.

A o tusi e Isaako le ata o Taurusi, sa mafaufau o ia i lona tamā ma le malumalu matagofie ua fausia i Navu. Afai e malosi ma usiusitai Isaako e pei o Taurusi, atonu o le a filifilia o ia e le Alii e galue i le malumalu, e faapei lava o lona tamā. ■





“Faasoa atu au taleni,
aua o mea e te
naunau e faasoa, tatou te
teuina.”

Thomas S. Monson, “O Le
Agaga o le Aualofa,” *Liahona*,
Iulai 1992, 126.

ATA NA TUSIA E JIM MADSEN



Faatasi e Faavavau


Saunia e Rebecca Cornish Talley

E faavae i se tala moni

“Na te faaliliuina mai loto o matua i fanau, ma loto o fanau i o latou matua, ne’i ou alu atu ma ou taia le lalolagi ma le faafanoga” (3 Nifae 25:6).

1. A o lei faapaiaina le malumalu e lata ane i lo latou fale, sa valatinamatua la te o e aulia e Olivia lona matamata i le malumalo ina ua tatala mo maimoaga.

2.



4.

O le a faia faamauga i le potu leni.
Tu i luma o le faaata leni ma tilotilo atu
i le faaata i le isi itu o le potu. O le a le
mea na e te vaai i ai?

E pei o la tatou te o pea lava
pea e oo i le faavavau.

E faapei foi o lo tatou aiga, a ea? O le a
tatou toe vaai foi ia Tamamatua i se aso.

E sa'o oe. Afai tatou
te tausia poloaiga, e mafai ona
tatou toe faatasi ma Tamamatua
ma o tatou aiga uma aua ua uma ona
faamauina i tatou i le malumalu.



5. Sa mulimuli atu Olivia ma Tinamatua i le taiala
i totonu o le potu selesitila o le malumalu.

Ou te fiafia i le lagona o loo maua iinei.
Ou te lagona le fiafia.


Ma a'u foi.

6.

Ou te fiafia lava i le malumalu, Tinamatua.
O le a i ai se aso, pe a ou matua, ou te toe foi mai
ai ma faaipoipo ai iinei. Ua ou fiafia e mafai ona toe
faatasi e faavavau lo tatou aiga—e faapena
foi Tamamatua.






E sa'o lelei. Ou te matua faafetai
lava mo le malumalu, mo le tatalaina
mo maimoaga, ma mo oe foi.






FAUSIAINA O SE MALUMALU

E 40 tausaga na fausia ai le Malumalu o Sate Leki e i latou na mua'i taunuu i le Vanu o Sate Leki. Faatasi ai ma le fesoasoani a se tagata matua, ia 'oti ese ia vaega nei o le malumalu ma tuufaatasai 'oti'otiga e fau ai se ata.



ATA NATIA O LE MALUMALU

O loo fiafia faatasi le aiga lenei i lafanua o le malumalu. Vaai pe mafai ona e maua mea nei i le ata: Mama FMT, taavaletoso ua puipui, ipu o le faamanatuga, papatusi auro, tusipese, papafalaoa, siata o gafa, ofagapi.



Kata o Upusii Faamamafaina o le Konafesi

E mafai ona e 'otieseina nei kata ma faaaoga e faamanatu atu ai ia te oe mea sa e aoaoina i le konafesi aoao.



"A'u uo talavou e . . . , ia i ai pea lava pea a outou vaaiga i le malu-malu. Aua lava nei faia se mea o le a taofia ai oe mai le ulufale atu i ona faitotoa ma 'ai ai i faamanuiaga paia ma le faavavau iina."

Peresitene Thomas S. Monson



"O se mea matagofie tele le avea ma se Kerisiano, ma ola e pei o se soo moni o Keriso."

Elder L. Tom Perry o le Korama a Aposetolo e Toasefululua.



"O mea foi la e ono foliga mai ia te outou o ni filifiliga laiti, o le a taitai atu ai outou e le Alii i le fiafia tou te mananao ai. O a outou filifiliga, o le a mafai ai ona la faamanuiaina isi e le mafaitaulia."

Peresitene Henry B. Eyring, Fesoasoani Muamua i le Au Peresitene Sili



"E mafai ona tatou faauo ia i latou o loo tatou auauna atu i ai e ala i lo tatou agalelei ma auauna atu ma le loto atoa. Mai nei faauoga latou te malamalama atili ai e uiga i lo tatou tuuto atu i le talalelei ma se manao e aoao atili e uiga i le Ekalesia."

Elder M. Russell Ballard o le Korama a Aposetolo e Toasefululua



"Aua nei alu se aso e aunoa ma le faia o se mea e faatino ai uunaiga a le Agaga."

Peresitene Dieter F. Uchtdorf, Fesoasoani Lua i le Au Peresitene Sili



"E le mafai ona tatou vaai i lo tatou Tama Faalelagi, ae e mafai ona tatou faalogoina Lona siufofoga e aumaia ia i tatou le malosi tatou te manaomia e onosaia ai luitau o le olaga."

Jean A. Stevens, Fesoasoani Muamua i le Au Peresitene Aoao o le Peraimeri



"Ua outou o mai i le lalolagi i lenei taimi . . . ma ua uma ona tuu mai e le Alii Lona aao e saunia le lalolagi mo Lona toe foi mai ma le mamalu. O aso nei o avanoa maoae ma tiutetauave taua. O ō outou aso nei."

Elder Neil L. Andersen o le Korama a Aposetolo e Toasefululua



"Ma e le o tuulafoaiina outou! . . . A outou tausia a outou feagaiga sa faia, o le a taialaina outou e le Agaga Paia ma leoleoina outou. O le a siosiomia outou e au agelu o le lagi."

Elaine S. Dalton, Peresitene Aoao o Tamaitai Talavou

Tala Fou o le Ekalesia

Saili e le Ekalesia Talaaga o Paionia o Aso Nei

Saunia e Hikari Loftus

Mekasini a le Ekalesia

A mafaufau tagata o le Ekalesia i paionia, e tele lava ina latou vaai faalemafaufau ia i latou o le seneturi lona 19 o e sa malaga atu i le Iunite Setete i sisifo e ala i vaa pe savavali foi.

E toatele atonu latou te le iloa o i latou o paionia taulamua o aso nei.

O loo sailia i le taimi nei e le Matagaluega o Talafaasolopito o le Ekalesia ia talaaga o paionia o aso nei. A o taliaina e le matagaluega ia tusiga o talaaga patino, o loo faapitoa lava ona latou faame-melo i talaaga o tagata liliu mai, tagata o loo alaala i se eria o loo fausia pe sa fausia ai se malumalu fou, faifeautalai o loo auauna atu i se misiona fou, ma i latou o loo ola i le talalelei i o latou olaga ae latou te le o mafuta ai ma nisi tagata e toatele o le Au Paia o Aso e Gata Ai.

“O talaaga patino o isi e mafai ona fesoasoani ia i latou o e atonu na oo foi i ai nei lava aafiaga pe nonofo foi i le nofoaga po o le eria e tasi,” o

le faamatalaga lea a Brad Westwood, o le pule o atinaega fatufatuai i le Matagaluega o Talafaasolopito o le Ekalesia.

Na saunua Brother Westwood, o talaaga patino e mafai ona tumu i talaaga o le olaga po o soo se mea, e pei o mea e manatua mai se misiona, aafiaga patino o se matua, po o isi tala faapitoa e faatatau i se mea taua na tupu.

“Tatou te talitonu e tutusa uma lava fanau a le Atua i Lana silafaga,” na saunua ai Brother Westwood. “E tofu uma i tatou ma se tala taua e faamatala—e tofu i tatou ma se aafiaga faataitai i lenei lalolagi, ma ua tatou iloa o lena talaaga e fesoasoani e fausia ai molimau.”

Fai mai Brother Westwood, i le selau tausaga mai le taimi lenei, atonu e faitau ai e se tasi e le'i i ai sana ia lava faamaumauga o talaaga faaleaiga ia lou talaaga ma faapea mai, “E faapenei la le mea e ta'ua o le tagata liliu mai.”



O se ata puupuu i le soifuaga o Joseph Millett, o loo maua i le gagana Peretania i le news.lds.org, o loo faamatala ai se tala faa-tupu faatuatua ua maua i aso nei aua sa teuina e ala i talaaga patino.

A malamalama tagata i tagata o o latou aiga po o isi paionia—e aofia ai tauiviga sa latou oo i ai, o lesona sa latou aoaoina, ma le poto na latou maua—e mafai foi ona latou maua ai fautuaga ma fesoasoaniga mo o latou lava olaga.

A auina mai talaaga i le faletusi, e lisiina ma e avanoa mo le maimoaina ma le faitauina e tagata e asiasi i ai. O tusiga po o tusi ua teuina i le siosio-maga e puipuia ai mai le tau i le Faletusi o Talafaasolopito o le Ekalesia, lea e umi ai ona faasaoaina.

Na tuuina mai e Brother Westwood, le fautuaga lenei ia i latou o loo mafaufau e auina mai a latou talaaga patino i le Faletusi o Talafaasolopito o le Ekalesia.

Ia tusitusi mo le faaaogaina e tagata lautele. E ui lava o tusi ma api talaaga o ni punaoa matagofie ia o mea na tutupu i aso ua mavae, ae e masani lava ona faatatau i mea na tutupu i aso uma ma mafau-fauga o le tagata lava ia, lea e le talafeagai ai mo tagata lautele. O nisi taimi o nei tusi ma api talaaga e mafai ona lamatia ai le tulaga faalilolilo o se tagata. Afai o talaaga e aofia ai faamatalaga e mafai ona faaleagaina ai se igoa tauleleia o se tasi, o le a taliaina ae o le a le mafai ona faaalua i tagata lautele.

Ia tusi tala i ni vaega ma mataupu. E masani lava, o le taumafai e amata mai i mea e manatua mai lava i lou laitiiti ma aofia ai mea uma e tau mai i le asō e ono lofituina. Amata i se tala se tasi i le taimi. Mo se faataitaiga, amata ona tusi e uiga i lau misiona. A uma loa, see atu i se vaega e ese mai o lou olaga.

Faaaoga faamatalaga autu. Afai o i ai sau tusi, sii pe tuu i totonu o se tusi. Afai o i ai ma se ata, ia tuu i ai. Afai e te faaaogaina faamatalaga mai se tusi faapitoa, ia tusi se faamatalaga puupuu e uiga i ai. O api e faapipii ai ni ata, tusiga, ma ototiga po o isi mea e i ai foi o latou sao i talaaga patino. Peitai, o i latou e faia ia api e masani lava latou te le aumaia ai ni faamatalaga pe tusitusi foi e uiga i mea na tutupu o loo faaalua i ata, o le tala lea a Brother Westwood. Na ia fautuaina mai le faaaluina o ni nai minute e tusitusi ai e uiga i mea o loo tutupu i ata e faapipii i se api o ata, tusiga ma ototiga.

Faafesootai ma faatalanoa isi. “E masani ona tatou mafaufau e uiga i o tatou talaaga patino o

ni o tatou lava manatu, ae o le tele lava o manatu faaalua e te tuuina i ai, o le tele foi lena o lona taua,” na saunoa ai Brother Westwood. O le faatalanoaina o isi tagata e maua ai se vaaiga fou ma fesoasoani ai foi e faalelei atili lou talaaga.

Tusi e uiga i aafiaga faaleagaga, taimi e sili ona taua, ma aafiaga, tagata ma mea na tutupu. Fai mai Brother Westwood, “E fiafia tagata i se tala e lelei ona faamatalaina.” Tusitusi e uiga i aafiaga e i ai se amataga, ogatotonu, ma se faaiuga. “Aua

le faaaluina ni itulau se 60 e uiga i lou olaga ao le'i atoa le lua o ou tausaga. Atonu e te le tusia, ma o le a le faitauina e tagata.”

Tusi e uiga i mea e te faamemelo i ai. Na fautuaina mai e Brother Westwood e faapea, nai lo le tusitusi i se faasologa o le taimi na tutupu ai ia mea, e mafai ona e tusitusi e uiga i ni autu po o se mea foi e te fiafia i ai.

Ae o le mea e sili ona taua, e le tataui tagata ona auina mai se talaaga patino pe faaleaiga i le Ekalesia e aunoa ma le

tufaina atu muamua i tagata o le aiga, aua e tataui ona faamalosia ai le aiga lea e aumai ai.

E talitonu Brother Westwood, o i latou e faaaluina le taimi e faamaumau ai se talaaga patino, tusitusi faamaoni e uiga i taimi faigata ma taimi lelei, o le a mafai ona latou vaaia le aao o le Alii i o latou olaga, ma o le a faapea ona tuua ai se talatuu ma mea e manatua o le a faapea ona faamalolosia ai o latou aiga ma isi tagata o le Ekalesia.

Afai o oe o se paionia o aso nei ma e te manao e faasoa mai ou aafiaga, ia auina mai lou talaaga i le Matagaluega o Talafaasolopito o le Ekalesia.

E mafai ona momoli mai pe lafo mai lou talaaga i le: Church History Library, 15 East North Temple Street, Salt Lake City, UT 84150-1600, USA, Attention: Acquisitions.

O taimi e mafai ona momoli mai i le 9:00 i le taeao e oo i le 5:00 i le afiafi, Aso Gafua i le Aso Faraile.

E mafai foi ona i-meli mai lou talaaga i le ChurchHistoryAcquisitions@ldschurch.org pe telefoni i le ofisa autu mo valaau a le Church History Acquisition i le 1-801-240-5696. ■



© 2006 DAVID STOKER

O talaaga patino e mafai ona fesoasoani i isi e faamalolosia ai o latou faatuatua.

Fai mai Elder Perry, E Tatau Ona Avea le Autalavou Matutua ma Tupulaga Silisili.

“Ua ou vaai i le mana naunautai faaleagaga o le autalavou matutua i lenei Ekalesia,” o le saunoaga lea a Elder L. Tom Perry o le Korama a Aposetolo e Toasefululua, i se faeasaite a le Ofisa o Aoga a le Ekalesia, sa faasalalauina mo le autalavou matutua i le aso 6 o Mati, 2011. “Ua ou iloa lo outou malosiaga.”

Sa ia aoaoina atu ni mea se fa o le a fesoasoani i le autalavou matutua e faataunuu ai mea latou te gafatia ma fesoasoani ai i isi ia toe maua lo latou faatuatua ia Keriso: tatalo i aso uma, susesue i tusitusiga paia i aso uma, agavaa mo le malumalu, ma galuega auauna atu i aso uma.

“O outou o le tupulaga ua faasaoia e le Alii mo lenei taimi. . . . Ou te luina outou ia avea ma ‘tupulaga silisili,’ na saunoa ai Elder Perry.

Faitau, faalogologo i ai, pe maimoa i le saunoaga i le tele o gagana i le institute.lds.org. Kiliki i le **CES Firesides**, ona filifili lea o se gagana.

Na Ta’u Atu e Elder Cook i le Au Paia i Asia, O Le Talalelei e Aumaia ai le Olioli

Mai le aso 12 e oo i le aso 20 o Fepuari, 2011, na asiasi atu ai Elder Quentin L. Cook o le Korama a Aposetolo e Toasefululua i le Au Paia i Korea ma Iapani.

Sa ia aoao atu i tagata o le Ekalesia i Seoul, Korea, e tatau ona tatou faafetai mo mea ua tatou maua nai lo le taulai atu i mea tatou te le o maua. Sa ia faamanatu atu ia i latou, o le talalelei e aumai ai le olioli, fiafia, ma le filemu o loo tatou sailia uma.

Sa feiloai foi Elder Cook ma le au tusitala mai nisi o nusipepa mo se fonotaga o fesili-ma-tali.

Sa faaaluina e Elder Cook le taimi e aoao atu ai, fautuaina, ma le taliina o fesili mai faifeautalai o le Misiona a Korea Daejeon ma sa auai i se konafesi



ATA NA PUENA E GEON WOO JUN

I lana malaga i Korea i Saute, sa faamanatu atu ai e Elder Quentin L. Cook i le Au Paia o Aso e Gata Ai, o le talalelei e aumai ai le olioli ma le filemu o loo tatou sailia. O loo maua ata faaopoopo i le news.lds.org.

a taitai perisitua mo le eria a le Misiona a Korea Daejeon.

Sa faaiiina le asiasiga i le auai atu o Elder Cook i se konafesi faalesiteki sa faia i le Siteki a Cheongju Korea, o le taimi muamua lea ua asiasi atu ai se Aposetolo i le siteki.

Sa auai foi Elder Cook i se konafesi a taitai perisitua i Kobe, Iapani, ma le konafesi a le Siteki o Okayama Iapani; sa feiloai foi ma sui mai Meiji Shrine i Tokyo, Iapani; ma faia foi se asiasiga puu-puu i Viatename.

O Tulafono e Mafai Ai ona Tatou Ausia o Tatou Tulaga Gafatia, na Saunoa ai Elder Christofferson

“Ua faasafua mai e le Atua ia i tatou, o Lana fanau, le avanoa ma le tiutetauave e faavae ai ni tulafono ma ni faiga faaletulafono e limataitaiina ai sootaga ma amioga a tagata,” o le saunoaga lea a Elder D. Todd Christofferson o le Korama a Aposetolo e Toasefululua i sui o le Sosaiete a J. Reuben Clark i le aso 4 o Fepuari. Sa ia saunoa i le tiute o le tulafono i le faatagaina o tagata taitoatasi ia ausia o latou gafatia atoatoa i lenei olaga ma le olaga a sau.

Sa faamanatu atu e Elder Christofferson i le

aofia e faapea, “e le mafai ona tatou ausia le faamasinoga tonu mulimuli e ese mai ia Iesu Keriso,” ma o le “lelei aupito sili e mafai ona tatou faia e fesoasoani ai i isi ia avea ma tagata e mafai ona latou oo i ai, o le taitai atu lea o i latou i le Faaola.” Sa ia molimau atu i le mana o le Faaola e faasa’o ai mea sese ma “suia o tatou le atoatoa ma ta’uamiotonuina i tatou i luma o lena tulafono lea e mafai ai ona avea i tatou o ni suli faatasi ma Ia i le ola e faavavau.” Sa ia faaiuina i lana molimau o loo soifua ia Keriso.

I le taimi foi o le faeasaita, sa taua’o atu ai ia Elder Christofferson le Tau’i mo Auaunaga Maoae a le Sosaite a J. Reuben Clark Law mo lona sao i galuega faaletulafono.

Na Faamamafa Atu e Sister Beck le Matafaioi o le Aualofa i le Fuafuaga a le Atua

Sa feiloai le peresitene aoao o le Aualofa o Julie B. Beck ma le toetiiti 10,000 o uso ma taitai o le Aualofa i le lotoa o le BYU–Idaho i le aso 26 o Fepuari, 2011, e faamallosia o latou faatuatua ma uunaia i latou i a latou matafaioi i le Aualofa ma i le ata o le faaolataga.

I se sauniga lautele ma se sauniga o aoaoga mo le au taitai, sa taulimaina ai e Sister Beck ia fesili mai tamaitai ma taitai perisitua mai le silia i le 40 o siteki i Idaho, sautesasae, ISA.

Sa molimau atu Sister Beck, a o manatua ma teufatuina e i latou o loo aafia i le galuega o le Aualofa ia faamoemoega o le Alii, ma faataunuu Ona faamoemoega iinei i le lalolagi, o le a faamanuaina, faamalolosia, faamamaina, ma faamaloloina i latou.

“Ua i ai sa tatou faalapopotoga ua faatuina e le Alii e faamanuia ai Ona afafine,” na ia saunoa ai. “O loo silafia oe e le Alii, aua o Lana galuega lea. O le a Ia faamallosia ma faalauteleina oe.”

Faitau atili i mea na aoao mai e Sister Beck ma maimoa i se vitio e faatatau i ai i le news.lds.org. (O le vitio ma le anotusi e na o le Igilisi e maua ai.) ■

I LE AOA O LE EKALEZIA

O Laau Su’isu’i ua Totō ai le Faalagolago o le Tagata ia te Ia Lava

O le foaiina atu e le Ekalesia o laau su’isu’i e 50 i le Matagaluega o le Uelefea mo Tagata Lautele o Fiti i le 2010, ma se foai o loo loma mo le isi 50, ua faapea ona faateleina ai le ola faalagolago o le tagata ia te ia lava, faapea avanoa faigaluega mo tamaitai o loo nonofo i nuu maotua o Fiti.

O foai a tagata o le Ekalesia i le tupe mo galuega alofa ua mafai ai e le Ekalesia ona taulimaina nei manaoga i le lalolagi atoa i galuega faatino e pei o le foai o laau su’isu’i. E galulue vavalalata sui o le Ekalesia ma taitai o nuu ma le malo ia malamalama i tulaga o le lotoifale ma aloa’ia manaoga o tagata o le lotoifale.

“Matou te faia lenei mea ma galuega faatino e pei o lenei aua o i matou o soo o Iesu Keriso,” o le saunoaga lea a Elder Taniela B. Wakolo, Fitugafulu Eria, i se faatalanoaga ma le nusipepa o le *Fiji Times*. “O lo matou faatuatua e taitai atu ai i matou e . . . fai mea lelei i le lalolagi.”

Ua Maua e se Tagata Iapani o le Ekalesia se Tau’i

I le aso 9 o Novema, 2010, i le fa masina ao le’i tupu le mafuie faatafunia i Iapani, na maua ai e Yoji Sugiyama, o se tasi o le Siteki a Fujisawa Iapani, se

vaega faaleogalua o le Faatula-gaga o le ‘Oa Paia [Order of the Sacred Treasure] mo lana tautua tauleleia i lona atunuu.

I le avea ai o se tasi o le Matagaluega o le Va-i-Fafo mo le tele o tausaga, sa matuai punouai

ai Uso Sugiyama i le

faiga o feutagaiga o maliliea a o avea o se amepasa mo Iapani.

Ua silafia e Uso Sugiyama e tuuina

mai e le Alii ia i tatou uma ni avanoa e fai

ai ni mea lelei i o tatou lava siosiomaga. Fai mai a ia, “O nisi taimi e tuuina mai ai e le Alii ia faigata ina ia mafai ai ona tatou maua mea tatou te manaomia. A unoa ma na mea e tatau ai ma le avanoa e maua ai ni fofō lelei, o le a le alualu i luma tagata ma lē aumaia ai se fiafia i lenei lalolagi.”

Tuuina Atu e Galuega Alofa a le Au Paia o Aso e Gata Ai ni Vai Mama

Toetiiti piliona tagata o le lalolagi e le mafai ona maua ni vai mama, lea e masani ona iu ai ina maua faama’i e pei o le kolela, manavatātā, ma le taifo. Ae talu mai le 2002, ua fesoasoani atu ai le Ekalesia i tagata e fitu miliona i le silia ma le 5,000 o alalafaga ia maua ni punavai o vai mama. O le vitio *O Le Suavai o le Fiafia Lea*, o loo maua i le Igilisi i le news.lds.org, o loo faaalua ai se tala i le auina atu e Galuega Alofa a le AAG o le vai mama i se afioaga i Sierra Leone. ■



NAI OTOTOGA O LE LALOLAGI

Aoaoga a Perofeta Soifua Ua Tatala Mai le Faafouga

Ua tatala mai e le Ofisa o Aoga a le Ekalesia se tusi lesona fou e lanu atoa o, *Aoaoga a Perofeta Soifua*. O le tusi lesona fou ua faamamafa ai le taua o perofeta o ona po nei, o loo faamatala ai le matafaioi o le Au Peresitene Sili ma le Korama a Aposetolo e Toasefululua, ma faamalamalama ai le soloa'iga i le Au Peresitene Sili.

E mafai ona faatauina mai le tusi lesona i le store.lds.org po o fale-tusi autu i le Iunaita Setete. O loo maua i le taimi nei le tusi lesona i le gagana Peretania ma le Sipaniolo ma o loo faaliliuina i isi gagana.

Talimalo le Ekalesia i Saafiafiga a Ekalesia Soofaatasi

O se saafiafiga faamusika a ekalesia soofaatasi e faaalua ai pese, siva, mau, ma tatalo mai faiga



© 2007 IRI

O le Saafiafiga Faamusika a Ekalesia Soofaatasi na amatalia i le vaitaimi o Taaloga a le Olimipeka o le 2002, ma e faia ia Fepuari o tausaga uma.

masani a ni tapuaiga eseese na faia i le Aso Sa, 20 o Fepuari, 2011, i le Tapeneko i le Lotoa o le Malumalu.

Na amatalia le konaseti i le Aso Sa i se vaega o mea sa faia i sunako, falelotu, malumalu o Initu, ma isi nofoaga ma faaalua ai agaifanua o tapuaiga i lotoifale o Iuta. ■

FAAMATALAGA

O Se Aiga ma se Faaipoipoga e Faavae i le Faaola

Ma te faaagaina ma lo'u toalua le *Liahona* mo afiafi faaleaiga. Ua avea o se aafiaga e faagaetia ai. I savali mai le Au Peresitene Sili, ma te sailia ai saunoaga musuia e fesoasoani ia i matou ma o matou luitau i aso uma. Ua faapea ona matou faamalolosia ai faavae o se aiga ma se faaipoipoga e faavae i le Faaola o lesu Keriso.

Patricia Oliveira de Souza Balena Leal, Pasila

Fiafia i le Lotolotoi o Faanoanoaga

O savali o loo i le *Liahona* ua matuai faamalolosia ai a'u, aemaise lava le taimi talu ona maliliu lo'u tina. E oo lava foi i le lotolotoi o o'u faanoanoaga, ou te fiafia lava e avea o se vaega o lenei galuega maoae ma maua faamanuiaga uma o le talalelei i lo'u olaga. Ou te iloa afai ou te tumau e oo i le iuga, o le a mafai ona ma toe faatasi ma lo'u tina. ■

Dinabel Zelaya, Honotura

Faamolemole auina mai sou finagalo faaalua po o fautuaga i le liahona@ldschurch.org. E ono faapupuuina tala mo le uumi po o le manino.

MANATU MO AFIAFI FAALEAIGA

O lenei lomiga e aofia ai tusiga ma gaoioiga e mafai ona faaaoaga mo afiafi faaleaiga. O nai faataitaiga nei.

"Minoi Loa," itulau e 42: I le avea ai ma se vaega o le lesona, mafaufau e fai le taaloga Simon Says (Fai mai Simona) e faaalua ai le faatalitali mo se tasi e fai atu ia te oe e minoi. (O le faiga o le taaloga, e fai mai se tagata se toatasi, "fai mai Simona . . ." ona fai atu lea i isi e fai se taga faapitoa, e pei o le sii o le lima. E faaaauu ai pea mo ni nai taimi ona ta'u atu e se tagata e fai, ona taumafai lea ia fai e isi se taga ae na te le'i fai atu muamua, "fai mai Simona." Mo se faataitaiga: "Fai mai Simona e sii lou lima. Fai mai Simona e patipati ou lima. Tatu lou vae." Tuu atu lau molimau e uiga i se taimi na taialaina ai oe a o e agai i luma.

"O Le Tali i le Fuaiupu e Valu," itulau e 50: Faitau faatasi le tusiga ona faitau lea o le lakopo 1:8. Talanoa po o le a le uiga o le faalotolotua. Atonu e te manao foi e faitau le Mataio 6:24 ma le Iosua 24:15. O le a le mea ua aoao mai e lenei tusiga e uiga i le sootaga i le va o a tatou filifiliga ma o tatou manaoga? O le a le mea o loo aoao mai ia i tatou e uiga i lo tatou Tama Faalelagi? O le a le mea na fai e Angelica e maua ai tali i ana fesili? Mafaufau e molimau atu i le taua o le suesue i tusitusiga paia ma tatalo.

"O Le Valaauga," itulau e 68: Ua faamatalaina ai lenei tala. Mafaufau e talanoaina auala e mafai ai ona faamanuiaina e taleni a tagata o lou aiga ia isi e ala i auunaga ma valaauga o le Ekalesia. Ia fai se tautinoga e aoao pe faalelei atili se taleni po o se tomali. ■



O LE TAUSAGA LENEI O SE VAO— VELE ESE

Saunia e Mont Poulsen

Ao ou ola ae i Liae, Iuta, ISA, sa lava le tele o le faatoaga a lo'u aiga ma sa feauaua'i ona toto ai le sana ma le pateta i tausaga taitasi. I se tasi aso na fai mai ai lo'u tamā ou te tago e vele ia sana ae vele e ia ia pateta. A o o'u galue i se laina sana e ono-futu-le maualuluga (15 cm), sa ou maua ai se pateta ua matuai ese lona ola ma aulelei atu nai lo pateta i le itu o le faatoaga la e i ai Tama. Sa ou valaau atu ia te ia ma fesili atu, "O le a la'u mea a fai i lea?"

Sa le'i ea lelei mai i luga tamā. "Vele ese."

Ona o lo'u talitonu na te le'i iloa mai o la sa ou tusi agai i se pateta, sa ou faasalavei atu ai, "Ae Tamā, e le o se vao. O se pateta." Sa toe fai mai o ia e aunoa ma le tilotilo mai, "E le o le tausaga lenei. O le tausaga lenei, o se vao. Vele ese." O lea sa ou faia ai.

Talu mai lena taimi sa ou mafaufau soo ai i le poto o upu a lo'u tamā. Sa ou iloa ai, o le usiusitai e le na o le faia o se filifiliga sa'o ae o le faia o se filifiliga sa'o *i le vaitau sa'o*. Pe a ou mafaufau i mea uma e finagalo le Tama Faalelagi ou te faia i lenei olaga, o le faia o na mea i le taimi sa'o e foliga mai e taua tele e faapei lava o le faia uma o na mea. Mo se faataitaiga, o le faia o se misiona, tafao



*Pe a ou
mafaufau i
mea uma e
finagalo le
Tama Faale-
lagi ou te faia
i lenei olaga,
o le faia o na
mea i le taimi
sa'o e foliga
mai e taua tele
e faapei lava o
le faia uma o
na mea.*

faaamasani, faaipoipo, faia o se fanau, a'otauina, ma le amata ona faigaluega tumau o ni filifiliga sa'o ia. Ae a faia e

tagata nei mea i le faasologa sese, e tele lava ina matautia ona taunuuga.

Sa aoao mai e le Tupu o Peniamina e faapea e tatau ona "faia nei mea uma . . . i le poto ma le auauai lelei" (Mosaea 4:27). Na aoao mai Elder Neal A. Maxwell (1926–2004) o le Korama a Aposetolo e Toasefululua, "O le faatuatua e aofia ai foi le faalagolago i le taimi a le Atua, aua na Ia fetalai mai, 'O mea uma e ao ina oo mai i ona aso' (MFF 64:32)."¹

Ou te talitonu e faaseseina i tatou e Satani i le faatalitonuina lea o i tatou e faia mea sa'o i le faasologa sese: o feusuaiga a o lei faaipoipo, tafafao faamasani a o lei atoa le 16 tausaga, avea o se matua ona faatoa faaipoipo ai lea, ma isi lava mea. O poloaiga sili a le Atua, a oo ina fetuutuunai pe faaleagaina, ona avea lea ma laau e ola a o lei oo i le vaitau e tatau ai—o ni vao. Ina ua faaosoosoina au e ta'uamiotonuina le faia o le mea sa'o i le vaitau sese, sa ou faafetai lava mo le lesona taua a lo'u tamā: "E le o le tausaga lenei. O le tausaga lenei o se vao. Vele ese." ■

FAAMATALAGA

1. Neal A. Maxwell, "Ne'i Faavaivai o Outou Loto ma Outou Le Lavatia," *Liahona*, Iulai 1991, 96.



O Tamaitai o Atunuu Uma o loo Atinaeina le Manuia, saunia e Emma Allebes

"Aua le atuatuvaale o outou loto, aua foi tou te matatau" (Ioane 14:27).

"Ua ou fai atu nei mea ia te outou, ina ia outou

maua le manuia ia te au. E maua foi outou e le puapuaga i le lalolagi: a ia outou loto tetele; ua ou manumalo i le lalolagi" (Ioane 16:33).



O Victor Vasquez (luga) ma Ruth Lopez Anderson (faavaa pito i luma) o le toa 2 mai le 24 o Au Paia o Aso e Gata Ai i Latina Amerika na faasoa mai a laua tala musuia o le liliu mai ma molimau mo le *Mi Vida, Mi Historia*—o se faaaliga na faia lata mai nei i le Falemataaga o Talafaasolopito a le Ekalesia i le Aai o Sate Leki. Faitau e uiga i nei tagata e toa 9 o le Au Paia o Aso e Gata Ai i itulau e 16–21. E mafai ona e maimoa i le faaaliga atoa i luga o le initoneti i le gagana Sipani-olo po o le Igilisi i le **[lds.org/churchhistory/museum/exhibits/mividamihistoria](https://www.lds.org/churchhistory/museum/exhibits/mividamihistoria)**.